

主 羅家倫  
編 中華民國史料叢編

# 浙江 潮



中國國民黨  
中央委員會  
黨史史料編纂委員會印行

浙  
江  
潮



## 本會雜誌部要廣告

一本誌第一期同人以體例未盡完善方滋愧恨乃謬承海內 閱者不棄疊加贊詞慚感何似第二期大加改良 第三期更添入插畫爲中國報界開未有之特色 此後更當精益求精以副 閱者諸君之雅望

一本誌第一期業經售罄第二期改良後銷路更拓各地來函索購紛紛竟致無以報 命用特將第一期第二期再版並將第一期體例駁雜之處悉加釐訂 贅者去之不足者增益之誤字更糾正之俾與第二期體例一律現已付印不日 再版出來 內地 欲購者請速向各代派處索購可也

一第一期再版以浙江全省輿圖係屬舊本廢棄不用俟十一府新地圖及沿海港灣新地圖逐期刊畢全省總圖再行刊登俾 閱者購閱本誌一年可得全浙地圖十數頁 無殘缺不全之弊

一本誌自第二期改良後頁數每溢出百八十以外加以五彩地圖及添入插畫印費徒增成本不敷過半 每期由同鄉會捐款賠貼良由本誌以輸入內地文明爲天職非同牟利主義賠貼固所不辭惟同鄉會中捐款其徵全恃 各代派處速將售資收清隨收隨寄不致延擱庶能竭力支持區區苦衷應所共悉 閱者諸君鑒之 代派諸君鑒之

## 浙江潮第一期目錄

### ◎圖畫

●浙江同鄉會攝影

### ◎社說

●國魂篇

### ◎論說

●民族主義論

●公私篇

### ◎學術

### ◎政法

●論日本近時政府與政黨之衝突

### ◎經濟

●日本財政考

### ◎哲理

●續無鬼論

錄

目



●教育

●盎格魯索遜人種之教育並中國今日

教育之方針

●歷史

●印度滅亡之原因

●大勢

各國內情 俄人之性質

極東經營 俄羅之東亞新政策

◎記事

●內國近事……………二十二條

●外國近事……………三十二條

◎雜錄

●東報時論……………二篇

●奇々怪々……………二種

●解頤雜錄……………四種

●瑣談片々……………二十三條

錄

目

◎小說

●軍事小說 少年軍

●偵探小說 專制虎

◎新浙江與舊浙江

●浙聲

●浙江文明之概觀

◎文苑

◎調查會稿

購閱畧則

一定閱本誌在東京者可函向本發行所掛號每期當按址寄送在內地者可就近向上海各代派所購取或逕寄函本社亦可但必須將報費郵資先行付下自然按寄無誤  
向本社定購者由本社發給收條向代派所定購者由代派所發給收條遇有已付報資而報未誌按期送到者可憑收條向原定處函索

售報價目表

全年十二冊	半年六冊	每冊
三元二角	一元七角	三角
購閱十份以上者照半年例二十分以上者照全年例又定閱十分以上者每份價三元日本各地悉照前例八折內地郵費酌加		

廣告價目表

洋裝一頁	洋裝半頁	一行
五元	三元	二角
惠登告白者須於本編定期發刊之前交到價目先付登長半年者當格外從廉		

四號十七字  
五號二十二字  
字起碼



### 清國留學生會館招待規則

- 一 本館因東渡留學之士人地生疎故特設專部代爲招呼一切凡有函致本館者本館即盡招待之義務
- 一 招待地方有二一在橫濱一在新橋凡由神戶起岸者本館幹事當至新橋招呼由橫濱起岸者本館幹事當至橫濱招呼其神戶上海天津三處均有本館贊成員代爲經理
- 一 神戶孫君實甫 神戶海岸仲通清商益源號
- 一 計開 上海王君培孫 上海大東門內育材學堂
- 一 天津張君亦湘 天津王皇閣前日新開社
- 一 各省東渡留學者可於就近本館贊成員諸處詢問購買船票一切情形於動身前七日先行函致本館以便至日前往招呼
- 一 天津航路至神戶起岸船抵長崎後可發一信致孫君言明乘坐何船何日何時可至神戶屆時孫君代爲照料神戶易車後可託孫君代爲電知本館
- 一 京本館幹事即至新橋招呼
- 一 上海航路至橫濱起岸可由長崎或馬關函知本館船於何日何時至橫濱屆時本館幹事至橫濱招呼
- 一 東渡之士行李物件務以少帶爲便其烟酒綢緞各項爲入口應稅者萬勿攜帶免至致多生枝節
- 一 到京後或入預定學校之寄宿舍或暫寓旅舍均聽本人自便
- 一 本館招待幹事一切費用均由本館公款供給至本人一切費用由本人自理
- 一 本館各處招呼之人如有更動之時當隨時登報申明

## 浙江潮發刊詞

歲十月浙江人之留學于東京者百有一人組織一同鄉會既成眷念故國其心惻以動乃謀集衆出一雜誌題曰浙江潮且述其體例而爲之辭曰

我浙江有物焉其勢力大其氣魄大其聲譽大且帶有一段極悲憤極奇異之歷史令人歌令人泣令人紀念至今日則上而士夫下而走卒莫不知之莫不見之莫不紀念之其物奈何其歷史奈何曰昔子胥立言人不用而猶冀人之聞其聲而一悟也乃以其愛國之淚組織而爲浙江潮至今稱天下奇觀者浙江潮也秋夜月午有聲激楚若怨若怒以觸于吾耳者此何爲者也其醒我夢也歟臨高以望其氣象雄其聲勢大若有萬馬奔騰以觸于我目者此何爲者也其壯我氣也歟夫子胥之事文明之士所勿道雖然其歷史可念也嗚呼亡國其痛矣不知其亡勿痛也知之而任其亡勿痛也不忍任其亡而言之而勿聽而以身殉之而卒勿聽而國卒以亡嗚呼忍將冷眼觀亡國于生前剩有雄魂發大聲于海上古事往矣可勿言矣而獨留此一紀念物狹其無窮之恨以爲吾後人鑒吾後人可勿念哉

抑吾聞之地理與人物有直接之關係在焉近于山者其人氣質而強近于水者其人文以弱地理之移人蓋如是其甚也可愛哉浙江潮可愛哉浙江潮挾其萬馬奔騰排山倒海之氣力以日日激勵于吾國民之腦以發其雄心以養其氣魄二十世紀之大風潮中或亦有起陸龍蛇挾其氣魄以奔入于世界者乎西望葱龍碧天

萬里故鄉風景歷歷心頭我願我青年之勢力如浙江潮我青年之氣魄如浙江潮我青年之聲譽如浙江潮吾願吾雜誌亦如之因以名之爲鑒且以爲人鑒且以自警且以祝茲將其章程之概列如左

## 第一章 宗旨

一近頃各報其善者類能輸入文明爲我國放一層光彩雖然國立於世界上必有其特別之故以爲建國之原質有萬不能雜引他國以爲比例者本誌負雜誌之資格其搜羅不得不廣然必處處着眼于此焉一本誌立言務着眼國民全体之利益于一人一事之是非不暇詳述一欲爭自由先言自治然必于其本土之人情歷史地理風俗詳悉無遺而後下手之際乃游刃而有餘先以浙江一隅爲言此非有所畛域限于所知也

## 第二章 門類

一社說 發揮本社之宗旨

二論說 新理新說雜出不窮錄之以補前所未逮

三學術 留學生何事學也紹介新學術于我國過渡時代所必負之責任也都其類凡八

(甲)政法

(乙)實業及經濟

(丙)哲理

(丁)教育……………女學及兒童教育兩種用白話演之

(戊)軍事

(己)歷史地理……………傳記附焉

(庚)科學

(辛)文學

四大勢 處今日而不知世界大勢之所趨則深山窮谷其苗裔矣都其類凡四

(甲)世界一般大勢

(乙)各國內情

(丙)國際政局……………專論各國之交涉其關係于中國者在下

(丁)極東經營

五談叢 短篇小文蓋有絕精之論焉

六記事 越在異國于本國情事未能詳悉然舉其有關係者言之或附以說

(甲)中國近事

(乙)各國近事

浙江潮

七雜錄

(甲) 近報時論……中國各報之佳者亦附焉

(乙) 來稿雜文

(丙) 故老遺聞

(丁) 來函及問答

(戊) 解頤雜錄

(己) 紹介新著

(庚) 留學界記事

八小說 小說者國民之影而亦其母也務取其有關繫者或譯或著其類凡三

(甲) 章同體

(乙) 傳奇體

(丙) 雜記體

九文苑 錄詩古文辭不拘體例可以驗社會全體之狀態可以動國民之感情

十日本聞見錄 內地之士不能東遊者欲知東方新國之規模氣象乎茲以紹介焉其門類隨時訂定

十一新浙江與舊浙江

(甲) 歷史上之浙江

(乙) 兵事上之浙江

(丙) 教育上之浙江

(丁) 物產經濟上之浙江

(戊) 浙江之地理

(己) 社會一般之風俗

(庚) 交通機關

(辛) 浙江之統治機關

(壬) 農工商業上之浙江

(癸) 外八于浙江之勢力及其注意

(子) 浙江人之海外事業

十二圖書 卷首必附以圖書令讀者醉心焉

第三章 體例

一本誌每冊以八萬字爲率所載各類及子目每冊未能全登然一冊中至少必在十六門以上

一本誌月出一冊用洋式裝訂每冊定價大洋三角定閱全年十二冊三元二角半年六冊一元七角外埠酌加郵費概不零售

一本誌准於癸卯正月二十日發行嗣後每逢二十日發行著爲例

一本誌以杭州萬安橋白話報館上海永記書報代派所爲總代派所

一有願爲本誌代派者請函告本社自當按期寄送函寄日本東京神田區駿河臺鈴木町十八番支那留學生會館轉交浙江同鄉會雜誌部取

一欲購本誌須先繳費後寄報代派所於本誌既出第二期後應將定報費一律收齊彙寄本社否則一概停寄仍追取前費

第四章 特色

浙江潮



一本誌全體皆由同人撰述編纂雖不專工於文辭然務適於我國民之用說理必明暢記事必簡賅非如直譯剪抄者令讀者昏昏欲睡也

一本誌有調查部之稿件按期刊登讀本誌可以於浙江全省之事上自朝政下逮民俗無不瞭如指掌  
一本誌有日本閱見錄一門彙集旅居同人之見見聞事無鉅細並著兼收令讀者不必遊歷其地而得遊歷之益

一東報偉論日出不窮同人皆編選擇尤登錄內地志士不能東遊及不能讀東報者得讀是冊於東方大概形勢即可洞若觀火

一本誌中各科學說半為各學校著名教師之講義間附已意亦必經歷實驗字字皆有根據非如道聽塗說者可比學者得此不啻有無數之名師良友環坐討論可以自修可以自進

一本誌有白話一種純以官音演說女學及兒童教育俾略識之無之婦孺皆能通曉並可學習官音

一本誌每期至少有插畫三四頁凡吾浙之名勝景皆竭力搜求陸續印登自餘各圖非徒供閱者悅目怡魂要皆切實有用可以增長智識激發志氣

## 浙江同鄉會簡章

### 第一章 定名

是會為吾浙留學生及官紳之游歷或寄居日本者所組織故曰浙江同鄉會

### 第二章 宗旨

以篤厚鄉誼為主

### 第三章 義務

#### (甲) 對待會內之義務

一凡會友有疾病事本會有救助之義務  
一凡會友有無故為人毀損名譽事本會有力爭之義務  
一凡會友於私德上有關礙公共名譽事本會有勸戒之義務

一凡會友有困難事須得公同扶翊者可由本人或同人報告幹事經幹事酌度事宜開臨時會集議視力所能為竭力贊助  
一鄉人初到海外者除會館例應招待外本會更盡招待之義務

#### (乙) 對待會外之義務

一本會對待內地有輸進文明之義務  
一本會對待會外之同國人有互相聯絡互相親愛之義務

## 第四章 事業

一本會出雜誌一種每月一回發行(雜誌另有專章)

一本會調查部專調查浙省事宜(調查另有專章)

## 第五章 職員

本會設幹事員七人分掌各項事務

本會幹事員及責任表

幹事	員數	責任
庶務	三	一切庶務兼糾儀
書記	一	紀事及一切往來信件
會計	一	銀錢收支並豫算一切用費
雜誌	一	總理雜誌事宜
調查	一	總理調查事宜

另設評議員參看第六章第二條

## 第六章 經費

一常年捐 會員每年輸常年捐銀三圓六角按月分收以充一切公費其冬夏兩次懇親會席料仍臨時籌集  
一特別捐 本會因有雜誌調查等事業招待救助等義務必須寬籌經費方足敷用蒙海內外士夫樂助捐金



當儲蓄妥實銀行以期推廣其捐數在十圓以上者本會公推為贊助員五十圓以上者為名譽贊成員百圓以上者為本會評議員并將姓氏爵里隨時謹登雜誌(評議員當本會開會集議時有提議及修補章程之權)

一墊款 是款專備雜誌用先由各會友籌墊埃雜誌消行後力能支持視其墊數之多寡按期陸續派還  
一會中收捐事宜由各校自行公舉一人管理統於月終收齊彙交會計(不入校者逕交會計)逾期不繳會計有催索之權特別捐當隨捐隨繳或定期分繳亦可  
一雜誌用費浩大遇有支絀時計支用會中存款  
一雜誌部獲有贏餘除提還墊款外即為會中公積  
一本會一切支拂預金閱半年由會計報告一次即登本會雜誌中

### 第七章 會期

一本會每冬夏二季各開懇親會一次會所及日期由幹事報告下二條同  
一本會每春秋二季各開茶話會一次  
一本會有特別事由許開臨時會集議參看第三章甲之四

### 第八章 規則

#### (甲) 開會規則

一凡開會前三日由書記報告同人不得無故不到遇有疾病及回國或游歷等情須先時函告書記開會時由書記將會員姓氏榜示會所

一開會次序首由職員申說開會緣由次演說次提議  
一凡演說員須將演說大旨留稿交書記錄存  
一開會閉會時間久暫由職員臨時酌定  
一凡開會閉會時間既經酌定後各會員不得逾時不來亦不得先時出席

#### (乙) 議事規則


一本會舉凡決事均經公共集議參用投票舉手之法以多數為準  
一凡議一事須俟提出者及反對者各將已意表明然後公決是非既經多數決定後不得再以前事爭執  
一凡演說及議事時不得雜沓諠譁

#### (丙) 辦事規則

一凡辦事人員既經公舉委以各事其各事之範圍內均聽其人自由處置有直行開辦之權  
一凡辦事人員既經擔任各事不得放棄責任遇有疾病及回國或游歷等情許其臨時囑託代理期內一切責任仍由本人擔當  
一各會員如有以辦事人所辦之事為不滿意儘可函知其人或於開會時提出公議惟不得於會外讟議是非

#### 附則

以上各條本會員須各遵守埃會事擴充於此章有未盡合宜處臨時修改列入  
壬寅冬十月本會同人公擬



浙江同鄉會攝影

五官四肢 5 Sinne & Gliedmaßen.



社說

# 國魂篇

## 第一節 緒論

五官具。四肢備。圓其顙。方其趾。則謂之爲人矣乎。而或者曰。是非人也。傀儡也。何以故。曰無魂。故是以戮之。斬之。勿知痛。有土地。有人民。有政府。有法令。則謂之爲國矣乎。而識者曰。是非國也。傀儡也。何以故。曰無魂。故是以戮之。割之。勿知醒。

諸君乎。諸君乎。以爲是特玄理空談。而无當于實際乎。吾姑就一二言之。今日深識之士。知中國之患不在一人。而在全體也。于是汲汲言教育。固也。未有民德卑。民力弱。民智塞。而國能自存者也。雖然。夫同是言德育。智育。體育。而何以德有德之教育。而不同于美。日有日之教育。而不同于法。嘻。我知之矣。蓋必有一物焉。挾其无上之力。以盤踞于國民腦質中。教育家乃能炯眼而灼見之。因其特性而發揮之。故其結



果也。德之國民不能強之使同于法。英之國民不能強之使同于日。夫至于國民不能相強。則吾知任天下至大至強之一國而終無術以亡之也。而教育之能事畢矣。然則其所以爲此教育之宗旨者。果何物也。吾更就軍事言之。夫軍人者。輕生死。絕利欲。棄人之所樂。而就人之所危者也。自非有一種奇物以鼓之舞之。啓其固結。不可解之一種精誠。欲言不能言之。一種迷信而欲其舍樂就苦以出于此。其能乎其不能乎。茲固非若中國昔日之所謂鼓之舞之者矣。夫紅頂也。花翎也。則亦求之有道得之有命矣。而又何必舍生死以求之。此則好人不當兵之說之所由來也。然則其所以爲此軍人之精神者。又何物也。嗚呼。吾思之。吾重思之。今日而勿言救國則已。苟言之。則未有不從根本處着想。而能有濟者也。上所言者。特以淺焉者耳。吾今欲明我國魂之說。則先就其于國家上最大之關係言之。有二義。其一曰統一。力其

一曰愛國心。

所謂關係于統一者何也。曰統一者。國之所恃以爲國者也。夫集多數人民以成一國。此多數者。人各其心。心各其思想。其不能同也必矣。而其能鍵之結之而成一國。

二

則必有一物焉以牢籠亭毒之矣。雖然。嚆昔之國恃一人之勢力以統一。今日之國則恃多數人民共同之意志以統一。國家之種類有優劣。而一興一亡其機遂決。故今日而言救國。則不得不進國種而改良之。然吾默鑒天下之大勢。以觀各國內情。則歐洲已由分裂而日趨統一。而我中國則將由統一而漸趨于分裂。蓋世界則民族之競爭日益烈。而中國則方入新舊之交。危乎危乎。吾嘗謂一火國而亡。則必在過渡時代。何則。新者未來。舊者未去。一髮之繫。實國家死生存亡之大關鍵也。一髮者何。即吾國魂之說也。嗚呼。十年以後。吾不患中國文明之不長進。而特恐人之恃之以成國者。而中國乃恃之以亡國也。抑自近頃以來。新學之士。常以合羣公德之義。提倡奔走。而卒無效。且有內潰者何哉。蓋所謂講新學者。其各人之歷史不同。家庭不同。其所處之地之習慣風俗又不同。且既吐棄其舊矣。而所謂新者。又人各一說。家各一理。其所受之于外者。則一視其歷史。家庭習慣風俗以爲衡。而驟曰羣之羣。之其能乎。其不能乎。故就不能合羣之種種方面觀之。則無公德也。無法律也。忌克也。皆是也。而就其歸結之總綱言之。則無統一之原質已耳。然則果其無歟。中國

果遂不可救歟。嘻。其不然哉。其不然哉。是皆藏之于人人腦中。而特未之思耳。雖然。使非博觀今古以求其通。而明目張膽。提出一目的。以爲衆目之趨。則是擾擾紛紛者。徒可憐耳。而其物之藏于腦者。終不發現。而吾中國終不可救也。此則我國魂篇之所由作也。

所謂關係于愛國心者何也。曰。吾聞歐人之言。有所謂國民宗教者焉。其意若謂國民愛國之誠。有如迷信宗教者也。雖然。吾尋其所自發而解剖之。有智識的愛國心。有習慣的愛國心。有感情的愛國心。三者缺一則其物不能成。即成矣。而不真。智識的。自學理經驗而得者也。習慣的。自風俗制度而得者也。感情的。則自種種方面上。若歷史。若地理。若外界之情事。與內界之衝突。及夫熱情之所鼓動。言語之所刺激。而生者也。雖然。智識也。習慣也。感情也。其厚薄深淺。則一視其國家與人民之關係。奚若。以爲衡。吾就其關係之總綱言之。則國魂之說也。嗚呼。吾中國人以無愛國心聞天下。夫未有國民不自愛其國。而國乃能存者也。夫未有國民腦質中無一點國魂。在而愛國心能發達者也。嗚呼。璀璨哉。莊嚴哉。吾若聞愛國者之言。其言曰。吾不

自知其何從。吾不自知其何從。惟吾祖國能使我歌。能使我悲。能使我泣。吾不知彼何以具此一種魔力。能移我若是之甚也。吾遊矣。吾思吾國。吾足不知其何爲。而自止。吾望矣。吾思吾國。吾目不知其何爲。而無所見。嗚呼。其夢耶。其譫耶。其顛耶。其迷信耶。使非其腦質中有一點國魂。在以煽之鼓動之。而何以至此。而何以至此。然則言救國者。其知所從事矣。夫知其病。而藥之。惟知其身之可愛。乃始懾于病。而汲汲求治。今日之中國。使自知其病。猶易使自知其身之可愛。則更難。且夫世界萬物之有改革進步也。必稍受苦痛。而始有濟。而況一國故自非有固結不可解之深情。則彼又何能忍目前之苦痛。而願享將來無窮之福哉。言救國者。其亦知所從事矣。

由是一義。而吾國魂之說。可以知矣。若曰。有一物焉。可以統一吾民之羣力。發達吾民之愛國心者。吾即認之爲國魂。何以故。則以所謂國魂者。必當具此能力故。雖然。吾尙欲進一言焉。則風俗是也。國魂之于風俗。猶靈魂之于腦筋也。其間有密切之聯繫。在故腦有病者。則其魂若失。而風俗腐敗。則國魂亦如之。夫人。心。風俗。與



政治宗教之關係自今識微之士則亦有能言之者矣雖然風俗者有原之自天然者有原之自人爲者野蠻之世則純乎其天然也人治稍進則有因天然而利用之以漸入于人爲者今之世界人治雖未達極軌而較國家強弱之差數則觀其風俗之爲天然爲人爲其間可以立比例矣是故土地也人民也政治也則國之形骸也風俗者其腦也國魂者則藏之于風俗之中者也不知俗變政而不變俗政不行不知魂知其變不知其何以變變不行而言國魂者若并風俗而忘之則又知其變而不知變之方法者也其于理論爲無當

## 第二節 國魂之定義

一民族而能立國于世界則必有一物焉本之于特性養之以歷史鼓之舞之以英雄播之于種種社會上扶其無上之魔力內之足以統一羣力外之足以吸入文明與異族抗其力之膨脹也乃能轉旋世界而鼓鑄之而不然者則其族必亡茲物也吾無以名之名之曰國魂

國魂之發生也復有二種有自民族優性而自然發生者有自千百志士流淚流血

以鼓鑄而成者雖然則亦相須也矣雖民族有優性亦必有一二人出以代表其餘不然勿顯也而一代志士苟欲以无量熱血鑄造國魂者則亦必洞察本族之特性因其勢而利導之不然勿濟也同胞乎同胞乎爾知彼歐美之民族挾其區區之地而能磅礴世界者果何由乎日人有松村介石者常作歐族四大靈魂論而謂其國之致興之由蓋在于是吾今略譯其意而參酌其言以爲我國民告焉

其一曰冒險魂 冒險殆彼族所有之特性也雖以中世之暗黑時代而此精神終不磨滅凌重濤冒萬死以縱橫于海上者踵相接嗚呼此特其于商界一斑耳更進之則彼于種種事業直無不挾其破釜沉舟一瞑不視之氣概以臨之仆者仆繼者繼乃至拋無量數之頭顱血肉而不悔以目前之苦痛購未來之希望以一身之苦痛易衆生之幸福而卒以開闢今日之世界嘻我儕雖欲不拜倒而不可得矣後之生者食其賜沐其福想望其丰采崇拜而歌舞之而不知當時之失敗又失敗挫折又挫折其困苦有衆人莫喻之情形其精神有隻手擎天之氣概嗚呼于宗教界于學術界于商業界于政治界立于今日而一推其致此之由何一非冒險之精神乎



其賜也。吾是以知彼族之所由興。誠非無因哉。

其二曰宗教魂。姑勿論彼族之宗教何如。而要之其影響之及于國民品性者。有數端。挾其迷信之力。人心中無不有第二之世界。在故其于一身之苦樂不屑屑。注意其結果也。能大解脫。能大勇猛。能犧牲一身。以爲衆生。能忍苦耐勞。以排百難。嗚呼。自古英雄烈士。能造驚天地泣鬼神之事業者。蓋無不由三分迷信力而來者。也。此其關係于精神者也。上帝臨汝。毋貳爾心。中國之所特以律上哲者也。而彼雖下愚之士。能攝之以迷信力。則其精神亦有所統攝。而不至于放逸。有所畏懼。而不至于無事。不爲此。關繫于道德者也。若夫冒萬險以行其說。雖窮谷深山。亦必一往而經十年數十年而不歸。而歷一死再死而不悔。其氣魂之強毅何如也。雖異國異種。異地而一言同信。則無不信之親之。視若一體。其統一之精神又何如也。也。夫科學進而宗教衰。然今日宗教一事。尙挾一統攝人心之大力者。蓋匪僅以世界之文明未及極點。而其教之有功于彼族。誠有不可誣者在也。

其三曰武士魂。武士魂者。導源于希臘。而盛行于今日。德意志其宗子也。蓋軍人

者。非戰爭爲用之。以言其統一紀律之精神。則立國之本也。以言其強毅堅壯之氣魄。則資生之原也。以言競爭共同之敵愾。則愛國心之所由發達也。故曰處帝國主義之世界。其國家必以軍人之精神組織之。進則齊進。退則齊退。蓋非是不足以立于大地也。夫美世之所謂最好平和之國民也。然一有戰爭。則義勇兵雲集而風動。雖以十五六年之童子。亦無不樂趨而爭先。嗚呼。其挾天下莫強之勢。蓋有由哉。即近東之日本。亦舉其所謂大和魂者。而沾沾自喜。大和魂者何。日人之所謂武士道是也。故日人以尙武立國者也。以有此魂故。而克奏維新之功。而雄視三島。

其四曰平民魂。美之獨立法之革命。英之改革。十九世紀演種種活劇。皆是魂之產出物也。雖然。蓋有由也。自近古以來。歐洲大行干涉政策。人民與政府之關係。日益接近。故一令之下。一事之行。無不聳目疾視。視爲切己之物。而彼族之政治能力。又甚強。故國家學說曰。益昌明而干涉政策。適流于極弊。于是汲汲起而爭政治上之自由。政治上之自由者何。則人民參政權問題是也。因此而民族建國問題生焉。而階級破壞問題生焉。而貧富問題亦生焉。雖然其種種之事實。理論吾姑勿論一

言以蔽之。則曰社會無自由。不能存自由。無道德。不能存道德。無職分。不能存此理  
密條明而析。是平民社會之骨髓也。謂之曰平民魂。此理其精

作者述既竟。乃喟然曰。嗚呼。英雄。負民族。耶。民族。負英雄。耶。夫英雄。亦何負于民族。  
吾母。艷美人。吾且自思。夫我祖國。固于世界上。有最久之歷史者也。彼之所謂特性。  
吾豈其無之。而胡爲至于此。至于此。夫英雄。亦何負于民族。吾中國。無宗教。習慣。則  
除第二義外。其第一第三第四義。則吾固有之矣。今試思。張騫之通西域。玄奘之入  
印度。其與哥倫布。麥基命。其精神。又何以異也。其功業。又何以異也。而修我干戈。與  
子同仇。陳于古者。且勿道。而寸心未盡。前路斜陽。劇飲而醉。相與大哭。其精神。吾尚  
于夢魂中。彷彿見之。而以民爲天之代表。以君爲天所統屬。邱民之意。亦猶有三致  
意者。嗚呼。夫英雄。亦何負于民族。其在彼。立一義制。一行則崇。拜之鼓舞。之發揮。而  
光大之。其在此。則摧陷焉。廓清焉。以彼成功者。猶若此。則其失敗挫折。而不復徒  
辭。爵長埋于蔓草。荒林中者。又何可勝道。嗚呼。事之有幸。有不幸。殆亦遇耶。吾于是  
重爲我祖國歌。吾于是重爲我祖國泣。使中國而竟至于此者。固誰之咎。歟。固誰

之咎歟。

雖然上數者。謂爲彼族之特性。則可。若夫建國之原質。則近頃以來。猶有新發明之  
一物。在拿破崙與之戰而死。梅特涅與之戰而死。舉世界之君主。日日勞心。盡力以  
拒之。而卒不勝其物。奈何。民族建國問題。是也。民族建國問題者。何。曰。凡同種之人。  
務獨立自治。聯合統一。以組織一完全之國家。是也。其在德意志。其在意大利。則所  
謂祖國主義。是也。若曰。日耳曼。吾祖國也。吾誓守之。羅馬。吾祖國也。吾誓守之。其在  
俄羅斯。則所謂斯拉扶司統一主義。其在美。所謂美人之美。洲。其在日。所謂大和民  
族。萬世一系。凡茲諸說。其始不過一二人言之。一二人信之。而其究竟也。乃爲其愛  
國心之源。泉自尊之種子。統一之原動力。雖刀刃迫于身。彈丸迫于目。而彼腦質中  
終有一「誓死以守祖國」之靈魂。在嗚呼。彼蓋以爲是國也者。我祖長子。是我父長  
子。是非人之所有。而我之所有也。雖欲不愛。又何可得也。彼又以爲我之國。于以前  
之歷史上。有無限之光榮。于以後之歷史上。有無窮之希望者也。雖欲不自尊。又何  
可得也。彼又以爲。凡我同國之人。皆我祖所自出。皆吾同胞之兄弟也。雖欲不相結



不相統。又何可得也。嗚呼。十九世紀中。擲其無量之頭顱血肉。有萬死不顧。屢爭不已者矣。嗚呼。吾知其由。吾知其由。

### 第三節 論鑄國魂之法

吾今言陶鑄國魂之法。所當豫備者有三事。其一曰察世界之大勢。其二曰察世界今日之關係于中國者奚若。其三曰察中國今日內部之大勢。夫一國國政之進運也。恒不外二大主義之衝突調和而後成。所謂兩大主義者何。曰世界主義。國粹主義而已。爲世界主義之言曰。事無善否。惟求其適。一國而欲自存。則必詳察世界大勢之所趨而變易其舊俗。吾中國自古孤立于大地。在昔之所述。固未嘗不可以偷一息之安。及一旦比較而競爭起。而猶固守其舊以自足。則無惑乎其日蹙于天壤間也。故今日而欲建國本。而不洞察世界大勢之變遷。所謂坐井觀天而不自知其愚者也。此一說也。爲國粹主義之說曰。中國者有歷史的人種也。凡一民族立于世界其遺傳之歷史甚久者。則必有固有之特性。種之于數千年以前。根深蒂固。決非可以一旦拔除之者也。其進也。有次序。有階級。是故貴因勢而利導之。若一躍而飛。

則未有不蹶而仆者也。夫等是言共和政體也。而何以法民之自治。乃不同于美。等是言自由也。而何以法民乃激烈而得之。英人乃平和而得之。不識病症。而誤投藥。未有不亡者也。慎哉。慎哉。普天下愛國諸男子。欲發一言。立一策。苟不深察中國內容之大勢。則吾知其說之必不能行也。其甚者則且至于釀大禍。此又一說也。由前之說則吾前二義之所由立也。由後之說則吾後二義之所由立也。

然則請言世界今日之大勢。今日之世界則孰不知曰帝國主義哉。帝國主義哉。雖然亦知其發達之由乎。帝國主義者。民族主義爲其父。而經濟膨脹之風潮則其母也。十九世紀之中葉。全歐之人。既勞心盡力。日日以建造民族的國家爲事。及夫國家已成。憲法已立。則昔日之願望。遂優哉游哉。以生息于好天地之下。于是休養生息而生齒益以增。讀近時之人口增加表。可以見也。夫地不加闢。而人口日繁。于是不得不出而殖民于新地。此亦天然強迫力之大。使之出于不得不然者也。此關於人種者也。夫精神以愈用而愈強。而慾望者無窮者也。昔日之勞心盡力以求之者。今則既得之矣。以彼活潑好動之民族。又安能坐享此閒日月乎。于是復生一大動



力。其二則物質是也。科學進而製造興。交通機關。日益完備。而工商業界遂大受其影響。因之于學術者也。其一則資本家是也。自昔愛自由之心。勝于愛財產也。今則少數之資本家。已萬目齊注。務必擴充其財產。內之復有社會黨之騷動。則目的之向外者。更不得不益烈。此原因于慾望者也。并此數因。而帝國主義之風潮起。商工業其一也。海運業其二也。殖民事業其三也。所謂政治則經營是。所謂外交則疏通是。所謂軍備則保護是。嗚呼。近頃以來。無論天之涯地之角。有一事之起。則無不是帝國主義者為之根。其為說豈不然哉。豈不然哉。

至其影響之關係于中國者何如。曰。中國者帝國主義之目的物也。雖然其禍皆吾民受之。皆吾民受之。英人之獨占印度也。全歐之人羨之。慕之。妬之。莫知所極。百無聊賴。乃取非洲而分之。未幾而大漠中一粒沙。皆有主人焉。而經濟之風潮。乃日進而未有已。彼其汲汲皇皇者。蓋有日矣。而亞洲之東。忽又現一黃金世界。其土廣其產富。其氣候適。天下之可愛者。未有如中國者也。于是甲午一役。而政治上之野心起。庚子一役。而經濟上之野心起。國民乎。國民乎。須知自今以往。外人之侵我中國。

者皆吾民受之。皆吾民受之。二十年之後。政府可以如故。官吏可以如故。而吾民而吾民將有一絕大之禍患。起其形狀奈何。曰。其商淒涼。其農憔悴。其土困。其工苦。聞其聲則號寒啼飢也。問其事則鬻兒蕩產也。是其由非刀兵非水火。則以經濟上之侵略起。而資生將窮。故外人之商業日益甚。則我民之生計日益困。况乎衣食窮則盜賊伏莽。日增一日。而水火刀兵之禍。又何能免也。此非吾嚇人之言也。夫資本厚則收利廣。以小民之渙而不羣。一年之所得。曾不足以當彼一日之收吸。夫閉關之世。遇一二水旱。尚足以釀成大禍。而況彼又日日之吸我膏血者哉。夫以言人則我中國人最富于商業上之知識者也。以言地則我天產之富冠絕大地者也。以斯人據斯土。而成敗異數。功業相反。吁。是亦天耶。雖然。何以故。曰。无國故。夫未有無國之民。而能自存于大地者也。

而翻然中國之內情。則何如。諺所謂「駝子上高墩。兩頭不着實」。其今日之謂乎。過渡時代。哉。其誰不知之。誰不言之。雖然。吾更欲進一說也。過渡云者。舊者已去。新者未來之謂也。而當此兩端未接之時。則必有一種惡魔生焉。挾其怪力以牢籠一切。

社會茲何物曰種種之惡習慣是已今日之中國所謂「習慣神聖時代」是也何以立國曰習慣嗚呼吾于是不得不重爲中國恫也吾思吾中國立國於大地最早而又以保守主義聞天下者也則必有高尚崇大之特質迄于今猶尙存者嘻而孰知以吾所見乃有大相刺謬者在也他姑勿論即以道德言之舉吾所聞于古者以律于今其然乎其不然乎吾中國之不知進取固也以吾觀之并保守而不知也雖他人之所謂守舊者守其國也守其國粹也猶有以不合于世界之大勢而亡者雖然猶可言也中國之所謂守舊者守其私利也守其向來之惡習慣也不可言也吁文明之胥耶禮樂之裔耶用以自悞則可耳究何當于人事矣夫使頑固者而猶能固守其舊也則吾喻之以勢曉之以時彼尙可以移其心以從事于彼若日本之攘夷論是也而一轉強其國而若之何并此而無之也語以古則譏謂迂語以今則駭而走當此不迂不駭之間惟一種惡習慣之是崇拜故吾觀中國之惡習慣殆與吾之所謂國魂類彼亦養之于歷史彼亦根之于特性而彼更有無數惡魔盡力以爲天下倡是故習慣不去國魂不來吾思之吾思之彼歐洲文明進化之階級其徑路

奚若則所謂有古典興復時代者發其先彼日本改革之次序其徑路奚若則所謂王政復古時代者當其首夫由黑暗時代而進入文明而必經由此一階級者則何以故嘻吾知之矣黑暗時代者何則所謂習慣神聖時代是也復古云者蓋掃除其惡習慣而復古人創業之精神是也嗚呼世界之大勢愈進而愈烈彼終不能待吾之從容不迫歷階而進則自非有一二雷霆之舉足以震撼摧磨掃盪羣習則遙哉遙哉吾知必不能矣雖然吾姑就其根本次序方法言之而以國魂終焉



何則  
蓋然

君不見東家老翁防虎患  
虎夜入室啣其頭  
西家兒童不識虎  
執竿驅虎如驅牛



論說

# 民族主義論

余

一

緒言

亘十九世紀、二十世紀之交、有大怪物焉、一呼而全歐靡而及于美、而及于澳、而及于非、猶以爲未足、乃乘風破濤、以入於亞、亞人未識之也、乃爲無意識之亂動、見其皮與毛、以爲其全體也、則曰皮曰毛、見其手與足、以爲其全體也、則曰手曰足、其稍稍上焉者、則見其筋、見其骨矣、然不能舉其全體、而解剖之、其構造其生長其發達、皇乎、瞠乎、其未之聞也、三十年來之製造派、十年來之變法派、五年來之自由民權派、皆是矣、夫言各有當、其時吾誠不敢拾後者以傲前、所可痛者、則以吾數千年神明之胃業、將迫之于山之巔、水之涯、行將盡其類、而後已、環宇雖大、竟無容足之區、病將死矣、曾不知其病之



所在死之所由。嗚呼！今吾不再拭一掬淚，以爲吾同胞告。則吾恐終爲所噬而永永沉淪，萬劫不復也。乃言曰：今日者，民族主義發達之時代也。而中國當其衝，故今日而再不以民族主義提倡于吾中國，則吾中國乃眞亡矣。

歐臘丁、凌倫通、決決乎大風哉！斯拉夫種族，其將來之雄主矣乎？雖然，彼其始也，乃爲倫通人種所束縛，抑抑不自勝，而卒至今日者，何以故？誠哉！天下事皆人爲也。吾乃消消以思，在昔百年以前，則有約翰哥拉其人者，乃實以民族主義提倡于其族，所謂斯拉夫統一主義者是矣。其始也，抱一荒唐無據之主義，以自信，以自解，其繼也，發於文章，被於詩歌，以浸潤於國民，其終也，及行之於政略，用之於外交，以之爲教育，而天下咸受其影響矣。嗚呼！夫孰知莫大之事業，乃自區區一僧正基之誠哉！天下事皆人爲而已。英雄去人若此，其未遠也。

德意志之未建聯邦也，各邦無所統，一群侮紛來，岌岌乎危哉！然其一戰而稱名振天下者，則何以爲之也？曰：民族主義。意大利之未建新國也，過羅馬之故都，則禾麥離離，有不傷心者乎？然而三傑出一統成，至今偉然成一強國者，則何以爲

之也？曰：民族主義。當其義之未昌，有也一二志士提於前，繼於後，奔走號呼於其國，精神格之矣。其未得之也，則有粉身碎骨，一瞑不顧，瀝血以告天者。然後知今日彼之安其安樂，其樂夫固自食其力，自享其功，而昔日之奔走呼號者，其功爲不可及矣。

緬彼先哲，顧我邦人。我祖我父，胡寧忍予用述，芻言敢告兄弟。嗚呼！風潮急矣，勢力大矣。及早回頭，猶恐勿及。一再遲疑，則若紅若櫻，其前例也。天之下地之土，凡我黃帝以來，繼續續二千餘年，以至今日之血族若叔伯諸兄弟都來聽者。

## 第一章 總論

### 第一節 民族主義之定義

合同種異種以建一民族的國家，是曰民族主義。解之曰：吾聞之哲人矣。國家之起，原由於民族之競爭也。吾故逆用其例，以言曰：凡立於競爭世界之民族，而欲自存者，則當以建民族的國家爲獨一無二。義古者荒矣，吾無論自有人類以來，當其始也，界以一山間，以一水周旋經營于一小天地內。

則無論優者劣者強者弱者皆足以自存偷一息焉然而水土平男女生種發而智進則觸接交通而競爭起競爭起而勝敗見勝敗見而死生存亡之機決于是數羣之內有其智力強者則能羣同族以造一組織體以禦他羣他羣細其組織之善焉者則勝其拙者焉其尤善者則尤勝焉數千年興亡之跡視此矣其組織體之進化也則名之曰國凡立於一國之下而與國家關係休戚者則曰國民立於一國下而與國無關係休戚者則曰奴隸有國之民存無國之民亡有國民之國存無國民之國亡國也者必視其國民之數之多寡國民之力之強弱爲比例而凡可以爲國民之資格者則必其思想同風俗同語言文字同患難同其同也根之於歷史胎之於風俗因之於地理必有一種特別的固結不可解之精神蓋必其族同也夫然後其國可以立可以固不然則否

條頓民族者實今日世界上最優之民族也自羅馬解紐以來彼即能自認其政治上之天職以建一最善之組織體彼能倡代議制度使人民皆得參預政權定團體與各個人之權限定中央政府與地方自治之權限彼遂能發揮其本族之特性合

人民之權以爲權合人民之志之力以爲志以爲力彼遂能力戰羣族而勝之使其本族日益滋長發達而未有已茲其賜則何自而得之也曰民族主義曰民族國家惟民族的國家乃能發揮其本族之特性惟民族的國家乃能合其權以爲權合其志以爲志合其力以爲力蓋國與種相劑者也國家之目的則合人民全体之力之志願以謀全体之利益也而種競之公例則彼所得此所失彼之興此之禍也然則一國而容二族乎以言特性則各異其異孰從而發揮之以言合其意合其權則其意相背其權相消長又孰從而合之故曰一國之內而容二族則舍奴隸以外無以容其一否則滅之否則融之化之而已滅亡之烈者也融之化之亡於無形者也奴隸亡於久者也其亡一也彼其於國也則亦無關係也已矣有茲國也則我奴隸則我亡則我融無茲國也則亦亡亦融亦奴隸一而已矣何有於國若夫其一族之智而強者則恐其亡也無已離而去之以自建國其上者若日耳曼之於奧其次若伊大利其次若匈牙利若羅馬尼亞無論其大其小其強其弱而要之彼終不能合異族以建國蓋十九世紀中之戰爭之政略之外交紛擾變幻磅礴天地而要之皆民族

內主義之風潮爲之也。其爲說豈不然哉。

雖然今日歐族列強立國之本在民族主義。固然彼能以民族主義建己之國。復能以民族主義亡人之國。嗚呼。若吾叔伯諸兄弟。苟讀亡國之史。睹縹緲之慘。其亦有惻惻而悲者乎。亦有悲焉而一爲深思者乎。夫物競之例。適者生存。非必虔劉而侵殺之。而彼自蹙于天壤間。嗚呼。彼不自存。何尤于人。然而彼之所以不能自存。與夫人之所以亡之之術者。蓋亦可以深長思矣。夫今日者。民族膨脹之時代也。內力不充。自相離亂。而適以處民族膨脹壓力最盛之時代。是猶覆空杯於水。而欲水之不入其中也。其可得歟。其可得歟。而數千年以來。繼繼承承之血族。皆自此斬矣。若吾叔伯諸兄弟。將何以處此。

今既述民族之所以建國之原。則請就民族的國家而解剖之。蓋有二大原質也。其一曰發揚固有之特性。其二曰統一全體之羣力。

以民族主義而亡人之國也。其大要有二策。其一則以戰鬪力直接而亡之。直接以亡之者何。凡優強民族移植于別地。與其土著遇。始則離其同族之心。繼則掘其全

體之權終則遂厄其資生之具。此以戰鬪力勝之者也。非必日執干戈以從事也。而一戰而敗。一敗不復存。試舉其例。其在外則若英是也。彼殖民之於海外。凡土著與之遇。無一而不風靡者。其數日以下。其占領土日逼。以狹局局於山之巔。水之涯。世界之事業。彼遂不能與聞矣。其在內則漢族是也。其初發也。沿黃河。以南日逐發達。遂使昔時在支那土地上占最大之勢力之苗族。日逼於南。至今日則無遺種矣。其故跡之猶可見者。則苗搖是也。此一策也。由此策而生統一羣力義。統一羣力者何。曰凡一族而欲競自存者。則未有其內力不一而能有濟者也。人類夥矣。試問其名各親其親子。其子而何以有國。生也。而何以有國者。存無國者亡也。而何以國矣。而歐洲非民族的國家。乃絕跡于十九世紀也。則豈不以一人之力不足。以敵羣而一人之生。必分業互濟。而其生始遂者乎。是故種不能統一。則不能成國。則其種亡。國不能統一。則不復成國。則國亡。而種隨之。故曰民族主義者。對外而有界對內而能羣者也。民族膨脹之風潮起。而歐美之政黨政治。日即衰頹。斯非其明徵哉。



其以同化力間接而亡之者則奈何。曰：凡優強民族與劣弱相遇，其文明之同化力乃能吸入而融化之。如冰雪之鎔于水，不瞬而無餘跡矣。試舉其例：其在外則美之於異族，其在內則漢族之於蒙古諸部。由此而有發揮特性義、發揮特性奈何。曰：厲其固有使足與世界相競而已。故凡同化力之大小，一視其文明程度高下以爲差。不可強也。夫國于世界而有歷史，則自其「祖宗社會」之所遺固有不能不自國其國者矣。不能不自國其國，而其國民之文明力乃不能與人抗。則天行之壓力乃迫之，使不得不去舊而取新。雖然，去之取之，自己者則能吸入而融化之，而活用之。其種存其國興，則必國民善用其特性者也。與之去之，自人者則奴隸而已矣。其種絕其國亡，是必其不能善用其特性者焉。故吾謂一民族之于世界，猶個人之于學，同一理。同一書，十人百人學之，則所得必十必百。蓋外界之所異，必視其內力厚薄以爲差。久之內外復互相劑焉。此則歷攷文明進步之階級而得之者也。故曰：特性者運用文明之活力也。種之強弱，視其文明文明之高下視其運用力而不然者，則何以希臘羅馬爲文明之祖，而今日之享其光明者乃在日耳曼林中之蠻族也。未完



## 公 私 篇

聞吾國憂時士大夫之言曰：今其公天下，今其公天下。法蘭西之革命，其公也。美利堅之獨立也。其公也。彼其視天下爲天下人之公共產物，而非敢攬之。扁之則天下人亦時出其財，若物以與君一人共享其樂利。若是者，其國昌，其民強，其君亦與民同體而無害而不然者，則否。

嗚呼！如此言，世蓋有不能公覆其國者矣。惡有不能私覆其國者哉？著者曰：有之。有之自中國始。

何以言之？今夫種族之戚，屠慘之慘，天下之至痛也。而吾中國則甘之。競爭之劇，抵拒之烈，天下之至危也。而吾中國則安之。奪吾主權，隳吾國防，蹂躪割割吾祖宗墳墓之地，子孫生息之鄉，天下之至辱也。而吾中國則置之聽之。彼其心，寧不知凡若

此者。誠至可痛至可危至可辱之事也。而卒甘之安之置之聽之者。何也。亦曰吾身一私人也。吾國一世界公國也。世界大矣。何患無君。夫是以其視中國也。恆不以我之中國視中國。而以君主之中國視中國。且不以中國人之中國視中國。而以天下人之中國視中國。遂乃以順民之資格。實行公天下之主義。簞食壺漿以迎來者。以斬爲奴。爲隸於異性異種之箝制之下。而不自愧惜。嗟沈沈二千餘年。黯黯二十四姓。猶其史焉。徘徊其鐘虜焉。吾民族之性質。未始不如是。是豈足道者。而要其原。因。則一言以蔽之曰。惟公之故。惟無私之故。

厲乎哉。公私之界說。之禍吾中國也。出一言焉。行一事焉。託於公則羣稱道之。鄰於私則羣非笑之。且不獨非笑之。抑必排之斥之。僇辱之。腐儒淺夫之守此學說。數千年於茲矣。其意蓋曰。公與私之二主義。固至反對而至不相容者也。夫使此二主義。誠至反對。誠至不相容。則嚴其界而固防之也。亦宜。然亦一即公與私之實義而思之否耶。今夫孝子。何以不孝他人之親。而孝其親。今夫寡妻貞婦。何以不愛他人之夫。而愛其夫。今夫令主。誼辟。何以不保他人之子孫。而保我子孫。何以不保他人之

黎民。而保我黎民。則私之爲也。寢假而孝子者。不獨孝其親。而且孝他人之親。寢假而寡妻貞婦者。不獨愛其夫。而且愛他人之夫。寢假而令主誼辟者。不獨保我之子孫。黎民。而且保他人之子孫。黎民。則豈非至公乎哉。然而不轉瞬而指摘必加之。而訴評必隨之矣。由斯以譚。則夫私之云者。公之母也。私之至焉。公之至也。在吾國人。非不諗之。而奈何至於與身有密切之關係之國家。則獨相諉相讓。相距相離。推而遠之。引而避之。必不肯以我之中國視中國。而以君主之中國視中國。且必不肯以中國人之中國視中國。而以天下人之中國視中國。聲息渺不相聞也。利害渺不相涉也。休戚渺不相關也。痛癢渺不相問也。易一主則復一主。覆一姓又經一姓。怙怙倪倪。蜷伏其下。長此諗古而不自覺也。

且夫茲心也。自吾民族言之。則誠禍甚。而於君主言之。則又利甚何也。人人不欲私其國。而君主乃得獨私其國矣。而汚吏敗類。乃得奉其國以爲君主一人之私物。而上以僕妾色。以求榮俳優狗馬行以求祿。而下以逞其縱恣殘賊之手段矣。語曰。『物必自腐而後蟲生之。權必自喪而後盜擅之。』勢有固然。無足怪者。雖然。蓋亦自

人人不欲私其國。而國之血脈乃不貫注。而國之軀殼乃不完備。而國之病乃日益深。乃昏。乃髦。乃益不可治療。『吾於是知創此公與私之名。而發爲此至公與私之見者。必自專制君主始無疑也。不則必一二嬖倖臣爲此以推波而助虐者。也不則必一二鄙儒爲此以獻媚而乞憐者也。蓋私之一念。由天賦而非人爲者也。故凡可以入人類界中者。則無論爲番爲蠻爲苗爲貉。自其生時。已罔不有自私自利之心存。然人人有自私自利之心於專制君主。則不便甚。且罔不有能憂心能忿心能思想心能担任心存。然人人有憂心忿心思担任心於專制君主。尤不便甚。故必皇皇焉朝夕思所以剷除而推鋤之。然而顯以剷除而推鋤之。則又慮夫世必有起而與之爲難者。計不若以隱不若以晦不若以不剷除爲剷除。以不推鋤爲推鋤。於是擁立出私之名號。以爲之俛俾世無魁驚智不肖。罔不束縛於吾術中而不得自脫。然後出其一人之至私指而說之曰。是天下之至公也。赴之赴之。吾將祿女。潰之潰之。吾將僇女。是故黨會一國之分子也。則諡之曰結黨營私。興學一國之元氣也。則號之曰假公濟私。究之其所謂私者。不過曰不利吾君主一人之私而已。然而愚

者不察。動率相戒。偶一言論。遭大詬訾。推而極之。至於爲其國之民而不敢擬議其國之政府之得失。昌言一邑之利弊。以播以衍。以有今日。遂以構成。一不痛不癢。麻木不仁之中國。嗟嗟。風雨如晦。燈燭無光。長夜昏昏。鼾睡未已。集塗夫而圈處之。羣死尸而一室之。私乎私乎。亦既遏之。亦既排之。亦既錮之。亦既斬之。則又何自而激發乎。

且吾聞東西儒哲。著書立說。昌言大號。以震撼其國民之精神也。不曰獨立。則曰自主。不曰競爭。則曰愛國。要其歸宿。則亦一私之代名詞而已。故其言曰。『文明與文明接。則以道理爲勢力。文明與野蠻接。則以勢力爲道理。』又曰。『凡爲一國民。不得由外國人管轄之。又其國之全体。以至一部分。不得被分割於外國。蓋國民者。獨立而不可解者也。』夫是以日兢兢於物競天擇。優勝劣敗之理。務求國權日益伸。民力日益漲。民氣日益奮。種界日益峻。以出而制勝於外人。外國外族。雖至斷頭折脛。夷傷遍野。血流成渠。不稍退悔。是豈有他哉。亦由於自私自利之一念。磅礴鬱積於人人之腦靈之心胸。寧爲自由死。而必不肯生息於異種人壓制之下。之爲之力也。



可愛哉私也。可畏哉亦私也。今日不然。則美何以必排英而獨立。意何以必踣奧而建國。今日不然。則和爾士達固之被領於丹麥。猶之被領於德意志也。而何以必血戰圖恢復。印度之夷於英。君猶是君。國猶是國也。而何以人人唾罵之。鄙夷之。是蓋既立國於世界上。即不得不有界。既有界。即不得不有爭。私也。者爭之原動力也。順原動力而颺舉電掣以赴之者。與逆原動力而隱忍姑息以媮旦夕安者。亡理固如斯。無可幸者。雖然。斯義也。吾中國儒哲亦有言之者矣。孟子曰。『人人親其親長其長而天下平。』楊朱曰。『人人不拔一毫。人人不利天下。則天下治矣。』顧亭林曰。『雖有聖人。不能禁民之有私。善爲國者。亦惟合天下之大私。以爲天下之大公。』旨哉言乎。證諸西國史傳。則如彼。考之中國儒先之說。又如此。嗟我國民。可以悟矣。而難者曰。一金之微。至於賣友。借父糶鋤。慮有德色。從井下石。往往而是。由斯以譚。未見其不能私也。否。否。吾聞之。凡能私者。必能以自私者。私國必能以自利者。利人。今夫中國。地則四千萬也。人則四萬萬也。然而起視其世。間有一人焉。能營營終日。五內薰灼。私其一邑事。如其一家事者。否。即間有之。而平均以計之。果能一邑得一

人否。夫一邑。至小也。一人。至少也。然且不可得。則謂中國亡於不能私。誰曰不然。不然。則非我族類者之攘奪吾之權利。迫蹙吾之生命。如蛇如蝎。如狐如鼠之詐如羊之狠。雖至懦者。必有鏗自由之鐘。揭獨立之旗者矣。而顧夷然讓之。夷然受之。甚且甘爲印度之續。而不喻則如何也。

然而往者已矣。來者可追。諺曰。『從前種種事。譬如昨日死。以後種種事。譬如今日生。』及今而人人挾其私智。出其私力。奮其私。一國私。一省私。一府私。一州縣私。一鄉區之熱心。以圖救其私。一國一省一府一州縣一鄉區之私人。勵獨立之氣。復自主之權。集競爭之力。鼓愛國之誠。以與暴我者相抗拒。拒相角。逐以還吾中國真面目。則中國雖弱。未有艾也。不然。爲奴爲隸。寧豈有幸。西語曰。『生人之大患。莫患於不自助。而望人之助。我不自利。而望人之利。我』然則存亡之責。夫豈在人。我國民以中國爲我中國人之中國。則中國人之中國矣。以中國爲天下人之中國。則天下人之中國矣。公之爲愈乎私之爲愈乎。願我國民。亟自審之。



政 法

## 論日本近時政黨與政府之衝突

吾人居他國。他國之內政。無與吾國事也。然無與吾國事。而試放眼於他國政界之風潮。以反證諸吾國之國民。而覺吾國民政治思想不普及。政治知識不養成。痛苦在身。不知呼籲。束縛待斃。不求擺脫。則雖無與吾國事之他國內政。亦足種種激刺吾腦界。使吾懼。使吾悲。而不得不繁稱詳說。以爲吾國民告。

吾國民乎。亦知吾國於世界爲何等國乎。吾國政體於世界爲何等政體乎。吾不忍言。吾言日本。日本者新造出於世界之一等國。而其政體則所謂立憲也。立憲政體有二。一君主國體立憲。一民主國體立憲。日本則所謂君主立憲也。其頒布憲法不過十三年。召集議會不過十七次而下議院之被解散已六度矣。第一次明治二十



四年。時內閣爲松方。第二次明治三十六年。時內閣爲伊藤。第三次明治二十七年。時內閣爲伊藤。第四次明治三十年。時內閣爲松方。第五次明治三十一年。時內閣爲伊藤。今又以地租繼續問題。議院全體否決。遂至停會。遂至解散。而政黨與桂內閣之衝突。乃達於極點。

夫一國政治之進化。恒視在朝黨與在野黨決戰之勝負。以爲民權消長之比例。差在朝黨勝則政府勢力進一寸。而民權之縮力亦進一寸。在野黨勝則政黨勢力高一寸。而民權之漲力亦高一寸。故政府舉一事。發一令。而其民不敢有異議。相爭執。相攻難者。必其民之無政治思想知識者也。使其民而有政治思想知識也。則政府之舉動。稍有一不利於己。必將觸發其感情。協力奮鬥。務抑舊政府使不得行其暴虐手段而後已。是故世界愈文明國。在朝黨與在野黨之衝突必愈多愈烈。而其政治亦必愈引愈上。否則在朝黨與在野黨。愈安靜。愈調和。而其政治亦必愈疲。爾而愈不能善。然則欲觀一國政治之進退。不可不先觀一國政黨之進退也已。

立憲政體爲國民自由思想發達之機關。其機關實掌握於代表多數國民意見之

國會。國會之成。成於議員。議員之起。起於政黨。政黨者必心有一定之政治主義。而其方針不外計畫國家全般實際之利益。故政黨者實有沮遏政府屬民政策之義務。國會未開。民權未伸。政黨固將犧牲一己之生命財產。供獻國民。以求達其目的。國會既開。民權稍伸。政黨尤必熱心企畫。以增進人民之幸福。今欲觀日本政黨。請先言英美政黨。

英國政黨。始於一千六百七十九年之權利請願。其目的在擴張民權。是謂請願黨。Detainers 後又有非請願黨。Abhorreys 請願黨稱 Whigs。非請願黨稱 Tories。千七百〇七年開設英蘭聯合第一國會。此 Whigs 寡頭政治。自千七百二十年。至千七百六十年間。始終貫徹其政治主義。及千七百九十二年。承法蘭西革命之風潮。英國政海大波動。其時則有二黨崛起。前者稱急進黨。The radicals。後者稱純正保守黨。The Tory party。純正保守黨屬非請願黨。由地方紳士財產家及請願黨之一部組織而成。急進黨屬請願黨。由請願黨之一部組織而成。千八百三十二年開英愛聯合國會。又有二大政黨起。一爲保守黨。Conservative party。一

爲自由黨。Siderat party 自由黨奉帝國主義。保守黨奉非帝國主義。二黨互持英國政局。迭爲消長。以迄於今日者也。美國政黨之起原。在千七百八十九年。此時當憲法制定之會議。其言保存自由之行動者爲聯立黨。Federalist 言服從國家主權者爲共和黨。Republicans 又或爲民黨。Democrat 或爲民主共和黨。Democrate-Republican 至一千八百年又有二政黨起。一民主黨。Democrate 一國民共和黨。Republican 前者抱持共和黨之主義與政見。後者抱持英國請願黨之主義者也。屢經變易以至今日。共和黨乃稱爲帝國共和黨。民主黨乃稱爲社會民主黨云。要之英美政黨。雖繁蹟如此。其目的實不外擴張民權與防止虐害之兩大義務。日本政黨。始於明治七年。小室信夫等游歐洲。見英國政治之美。歸國大倡設立民撰議院之主義。遂起愛國公黨。其本誓云吾國數百年來。奴隸人民之餘弊未盡剷除。誓與同志之士。主張人民之權利。以保全其天賜。後以西村茂樹建言之誤。板垣退助憤然脫黨。自糾合一大團體。起愛國社。鼓吹自由民權之說。後改稱國會開設願望有志會。又改稱國會期成有志公會。明治十四年國會開設之詔下。此黨乃純

粹變爲自由黨。其盟約書云吾黨擴張自由。保全權利。增進幸福。改良社會。務盡力確立美善之立憲政體。至十五年大隈重信發起立憲改進黨。其綱領爲省中央干涉之政略。立地方自治之基礎。惟自由黨偏重民權。改進黨稍重王權。兩黨正立於反對之地位。然其目的在破壞藩閥之政府。則兩黨如一。全時更有一大奇黨起。乃大和人樽井藤吉等所起發。稱東洋社會黨。其綱領專持平等主義。其手段則游說演說及發刊雜誌。其盟誓則務與富有精神愛國之士交結和協。然內務卿終以結社妨害治安。禁止傳達。黨遂解散。全年七月大阪立憲政黨。九月帝政黨。十七年十月自由黨。亦皆相繼解散。改進之河野大隈亦皆脫黨。而別組織進步黨。二十三年板垣乃再與自由黨。始終持此自由主義。當時民權之聲。洋溢全國。蓋日本國會開設之完成。實此自由黨愛國丈夫板垣退助之力居多云。二十七年中日事起。乃爲自由進步兩黨合同之一大動機。其宣言曰藩閥之餘弊尙固結。吾黨務協力以振起國務之沈滯。至三十一年大隈板垣遂代伊藤。此實日本政黨內閣之始。然旋即分裂。二十三年伊藤博文起立黨政友會。其趣意書曰吾黨明紀律。整秩序。專誠奉

公以革黨派之宿弊。當時論者謂讀其書。莫得要領。此大政黨實一無主義之會合云。然日本政治之進步。全在此諸政黨互相起伏。互相抵排。各鼓吹其政說。以求媚於國民。而民亦因是得發達其政治之思想知識。以馴至今日之地位。今自由黨勢力稍衰。其有大聲勢于國中者。爲伊藤之政友會。而大隈之進步黨。實與之並立而頡頏。兩黨素不相容。以政府地租繼續一問題。遂忽相聯合。忽相提携。毅然不撓。以與內閣抗。

何謂地租繼續。日本地租原率二分五厘。明治三十一年其時內閣松方。乘議員之腐敗。種種啗利。而地租增徵三分三厘之案。遂得通過於議院。然又慮世論之反抗。加一二修正。定五年復舊之期限。今度三十六年豫算案內。政府又以擴張海軍問題。而遂有地租繼續之事。爲國結難。爲輿論所不容。夫一國政黨與政府之衝突也。其始決非一二日。二人與一二端之事。力所能致。必有種種近因遠因。含蓄其間。伏之既久。破綻四起。然後一朝橫潰而不可遏。而政府經年累載所積之垢惡。亦得盡決而知之。而政治於是進一級焉。日本近時政局之決裂。所含之原因甚複雜。

今試舉之以貢於吾國政界。使有所鑒焉。

一憲政上之問題也。日本憲法。非如英美各國。糜數十萬生命。歷數十年時日。以鐵血購入之者也。故憲政至今尚在幼稚時代。不能發達。而民之擁護憲法亦不甚力。西人恆言曰立憲政體者。歐美人之專用物。他人種不能適用者也。吾思其言。而知民智民德民力不足者。非特不可言民主立憲。即君主立憲亦不可言。使其民智民德民力而既進也。則二者政體。果將何擇焉。曰不審國內之感情。而徒慕他國之君主立憲。謂是可以省破壞十之六七也。不知始以有所顧忌。不忍一度大破壞。而後必再度二度之大破壞。而未有已也。治水而增堤防。則潰也愈甚。治疾不審本原。則復發必死。禍胎不絕。無論立憲不能就也。即就矣。二十年或數十年。適以利他族之用。而仍歸於專制政體。且又加毒焉。此必然之勢也。日本所謂天皇万世一系之國。而其憲政之危機。猶時時發見。其自言曰。明治二十七年以前。是精神的憲政。明治二十七年以後。是體制的憲政。挾私權以蹂躪公權。專制暴戾之隱微畢露。故政黨宣言。謂今日不可不乘政海風潮。一掃腐敗以改進憲政。求全人民之幸福。此其



衝突之原因一也。

二藩閥上之問題也。昔時歐西各國。貴族與平民階級甚重。凡種種風雲慘澹血肉橫飛之烈劇。幾無不從平民與貴族爭權一大問題演出。日本維新以來。藩閥之勢雖稍殺。然其餘波剩沫。影響所被。猶時相軋轢而不絕。今表面政局。雖在政黨。而其實勢則仍生存於藩閥之手。陸軍海軍。惟薩長兩藩之人執其實權。兩省之參謀本部。亦必俟舊閥之將軍而貴族院諸員。又皆有一種頑冥的痼疾。但知保護自己之權力。忌避政黨內閣之成立。故時與政府相因依。相狼狽。以各固其地位。蓋維新以來。飛揚跋扈。擾亂政界之秩序者。實在此閥族。夫富貴者之對於貧賤也。其不免妄逞私意。破壞公德者。亦必然之勢。而行政之無信。用無責任。尤爲閥族政府之慣例。今日本政黨奮身肉薄。以與政府決戰者。亦在求達此打破藩閥與貴族院固陋之一大目的。此其原因又一也。

三國情上之問題也。政府之言曰。熟審世界之大勢。不得不充實國力。欲充實國力。不得不擴張海軍。欲擴張海軍。不得不繼續地租。雖然難之者亦有辭矣。二十世紀

之時代。經濟競爭之時代也。歐美各國。表面雖裝武力。其實際則皆努力於和平之經營。故于廣漠之亞細亞大陸。務伸張其利益線。以補助本土之富力。蓋世界大勢。雖在軍備與實力<sup>實業</sup>之競爭。而最終之勝利。則必在經濟。擴張軍備。實有害經濟之發達者也。經濟不發達。則國力亦因之消耗。然則國家之方針。當急謀富力之發達乎。抑將急急謀兵力擴張乎。二者並急。而同時應付。當以何者爲先乎。此其說一也。伊大利頻年擴充軍備。費非常之巨額。調查某學家之言曰。伊大利國會之表面。雖爲租稅之增加之敵。然實則經濟節減之大敵也。至於今日。財政困難。幾幾不能自救。故欲拓殖國力。不可不先注意於生產業。英國于世界到處有殖民地。有貿易線。遂不得不擴張海軍以擁護實利。今日日本除台灣朝鮮之軍備。擁護人民安寧外。在本土域外。更有何物可擁護乎。日本商船搬運滿洲之大豆類。及朝鮮之米穀。與南北支那之綿絲布及其他雜貨。有二十五萬噸之軍艦。游弋海口。殆可安寧無事。故擴張海軍之說。實爲外交家之野心。全與商船商民之保護相離。今試舉商船與兵船噸數相較。日本之國力亦可見矣。然則欲擴張海軍。不可不察一國之實力。此

又一說也。西班牙最長於政治與戰爭。因能組織武士與政治家。然遂不能勝荷蘭之經濟的能力。故史家謂西班牙當日但知消費金錢。不知生產。實一大病原。日本亦一尙武國也。歷史上素持尙武主義者也。所短者惟致富之策而已。國債已募。國稅盡課。而財用犹患不足。此實由經濟界之萎靡不振。兵愈強。民愈貧。飽受貧名。而無實益。且不自振興實業。而但多製軍艦。將吸取此衰弱之民。以盡供獻外國之工業家乎。此其說又一也。凡此皆因原于國情上之問題也。

四社會之問題也。世之區別社會有上等等中等下等之分者。果何準據而云然乎。亦準據於其貧富貴賤耳。富而貴者爲上等。貧而賤者則爲下等。世界上富貴者常占少數。貧賤者常占多數。而介於富貴貧賤之中者亦常占中數。故欲調和社會。不得不籍此中等。社會之力。蓋有調和而後有損益。有損益而後尊者降其尊。卑者脫其卑。階級化。勢力均政治乃至於平等。今日各國政治家。無不以社會問題爲最恐怖之事業。凡所謂農民問題。貿易問題。勞動問題。無不由社會問題生出。封建時代。農民殆如奴隸。以最低之生活。受最重之負擔。近世以來。四民平等。漸重恒產。海外文明諸

國。無不注意於農界。保護擁衛。以求發達。而農業上之最大關係。實在地租。今地租苛稅。冠絕世界者。惟一奧國。是不脫封建之餘習。不知地租之重。其痛苦不在地主而在小作人。蓋地租高則兼併易行。大農專其利益。小作人必受地主之威嚇迫脅無疑。且商工界之發達。由於農業之增進。農民社會困阨。則凡貿易與勞動之人。亦且必蒙其餘波而後已。故中央政府之誅求過重。疲弊所至。不獨農業損害。即商工業亦皆受打擊。夫政府者所以保護農工商而使之發達。其事業者也。若不顧全國一般之利益。妄用強硬手段。是政府對於平民之無情。爲至不平等。豈非社會上之公敵耶。社會之公敵不去。則幸福何時得進。此又日本政黨與政府衝突之原因也。要而言之。則以上所舉諸問題。實一責成政府之問題也。蓋政府者亦國民中之一分子。非多數之國民。必當盲從屈服于少數之政府也。故國民對於政府而負有種種監督之權利。且立憲政體。君主無責任。大臣則不可無責任。而大臣者又非以能圓滑其行政手段爲責任。必當于行政之外。確有政治的公德見地。公德者何。即政府對於人民之信義也。假使政府與人民立一契約。此契約明明有界限。明明有期限。

而或侵其界限。或逾其期限。是政府顯違政治的公德也。一事如此。事事如此。將種種暴虐手段。皆無不可逞政府一己之私意而爲之。是久長蟠伏于專制政體之下。無智無識之人民。爲可一任其播弄耳。若人民稍有智識。不肯自放棄權利。則必團結多數之人之力。以起而攻擊政府。者亦情理之至正也。日本爲立憲國。而政府之手段。猶時不免于專制。故此大政黨宣言。一則曰政府無責任。再則曰背國民之公約。損國家之威信。而其最終之要言。則曰政府欺瞞人民。非真有整理行政之能事。吾國民不可不竭力以廓清中央之政界。今日此議會散矣。衝突極矣。自此以後。日本政黨之改進。閥族之絕滅。社會上或被百般之利益。凡此皆不得預知。要之政府之蹶焉必矣。何也。蓋少數之政府。以不能與多數之政黨爭也。必不能與多數有政治思想知識之國民爭也。故國民自不欲權利則止。苟其欲之而爭之。則立於多數地位者。未有不能勝少數之政府者也。然則政府亦何樂乎與民敵。而身爲集矢之的也。由是觀之。日本民智民德民力。雖下於歐美數等。而僅以一關於財政之地租繼續問題。與政府爭之力也。猶如此。豈非以財政者。關係一國生命。非可任政府之紊亂。

而不一問者耶。夫國之有政府。所以代人民謀畫全般之利益。而此直接間接之利益。又不可不先放擲巨額之資本以敷設之。於是取於民而有租稅。而此租稅者。實則仍以支配於全體之社會。而民甘願割棄其胼手胝足終歲勤勞之所獲。以納於政府者。亦謂此乃吾身家安寧之代價耳。夫以求身家安寧之代價。而政府乃任意監督焉揮霍焉。不一爲之經理焉可乎。政府任意濫費揮霍。不爲之經理。而納此代價。顧亦安然坐視。不一起而詰責焉又可乎。嗟乎胥吏追呼。則風雲變色。堂皇敲朴。則血肉俱飛。當其橫征暴斂。索之惟恐不盡。虐之惟恐不力。曰此國家之要課也。此天庾之正供也。而及其度支之若何出入。則非特不與民商榷。且不一使民共見也。此於納租供稅之外。息焉游焉。以終天年。以長子孫。亦若凡國家事。吾儕小人。可弗預焉嗚呼。有國者不愛其民。謂之賊民。有身家者不愛其國。謂之自賊。賊民者有民而無民也。自賊者有國而無國也。無國無民。尙何言哉。雖然奴隸之服於主人也。任其箝制。任其笞撻。不敢與校。亦或積威約之漸耳。及一見他奴隸之對於主人也。有義務亦有權利。而後知奴隸而無思想無知識。必將永永爲奴隸。不能自拔。則至此



而不奮然悲恥。亟亟謀脫於沈淪之悲境者蓋鮮矣。然則觀日本近時之政局。爲國民者可以興已。



經濟



日本財政考

二十世紀男子

第一 銀行業發達之情形

銀行者國民全體信用之媒介及貨幣流通之機關也。其源肇於英國。全球濫觴。莫不師是。其重要處有二點。一受動業務。即收貯存款并發行券是也。一加動業務。即借金取息是也。距今約四百六十七年。日本政府頒定質屋法令數條。一日用品物皆得質入衣類以一年爲限。武器以二年爲限。二息重限以五分。三凡營質屋事業者須有十分資力。否則處罰。若質屋行爲不當。則鄰民皆負担質任。後又制息不得過二三分以上。德川秉政。別須百條。凡質物經八月後該質屋債權者。即得變售其物。其時有所謂札指者。即政府米廩之看守人是也。此米廩專支給祿於士族。而給以領米之憑單。有一定限期。凡欲先期領米者。則應將憑單交付看守人而請其墊

付。看守人此時即可依照憑單。米數扣除利息。然後給米。及領米期到。該看守人即持此憑單。向米廩支取全額米數。此爲慣例。故米廩看守人。漸漸充富。益擴張此業。凡各士族有抵當物持往。或將該憑單抵當者。并可借與金錢。政府亦以此事有利可圖。於是制定條例。凡借金者得以二倍半之物作抵。譬如借金百元。須以三百五十元之物作抵。而繳納五分利息於政府。此實爲日本全國銀行事業發達之始。明治六年以前。大約皆行此種業務云。

大阪地方從前爲許多諸侯。米廩所在地。且爲商業之中心點。距今百餘年前。即元祿時代之際。證券之業務。大爲擴張。此種證券施行。出於大阪天王寺屋五兵衛所創造。商業家卒稱便利。蓋即如我中國錢莊之類。日本稱之爲兩換商。兩換商與顧客所交易之證券。與今日銀行證券無異。又兩換商相互之中。有所謂親兩換者。亦猶今日中央銀行之於普通銀行之類。但當時所謂親兩換者。不過有最大資本。而究與兩換商無異。營業者亦極多。非若今日之中央銀行。僅有一所。此則兩者情形不同之處。此外各種證券。皆盛行於商業間。維新草創之際。諸事破壞。信用制度信

用機關等。亦爲之搖動。因而大阪各銀行家。或廢止其事業。或縮小其範圍。信用制度。阻滯不行。交易率以現金爲度。於是金錢缺乏。怨聲載道。市面爲之大壞。政府再三研求金錢流通之法。遂創造爲換會社。由明治元年起。至八年。支出資金七十六萬四千三百七十六元。然無甚成效。

維新之初。諸事取法米國。銀行之例。政府亦仿照米國式。創設國立銀行於明治五年。制定國立銀行條例。此時政府發行金札。引換公債證書。以期維持恢復。從前帑幣之價格。使不致下落。於五年內銷除其帑幣。其銷未完者。不論何時。有持此種未銷除之紙幣來者。政府皆可給與金札。交換公債證書。政府發行此種公債證書之方法。係由該國立銀行。提出資本紙幣十分之六。呈送政府。政府即依其提出之數。以金札公債證書保管之於大藏省。由大藏省給以同數之銀行券。其餘十分之四。則爲現金。以預備銀行券之兌換。此時政府又因監督國立銀行之故。於大藏省內設立銀行局。

政府欲創設國立銀行。以達其融通金錢及整理紙幣之兩目的。故於東京設第一

第三銀行。橫濱設第二銀行。新潟設第四銀行。共設銀行四所。統共資本金三百六十五萬元。以十分之六算之。該銀行券發行之總額。爲二百十九萬元。但此時市場需用現金。所發行之銀行券。無不向銀行兌取現金。於是銀行堆積銀行券甚多。而現金所預備者。頓因而減少矣。

明治七八年之交。因信用機關阻滯之故。現金流出殊甚。政府始改正銀行條例。一面增設銀行。使金銀容易流通。一面開土族等謀生之路。明治九年八月土族等奉還秩祿者。雖新以前土族皆有一定秩祿。皆廢止其年金。而給以五厘或一分利息之公債證書。但土族等狃於故態。鮮衣飽食。無所事之。未免入不敷出。政府又迫使彼等以此公債爲資本。創設國立銀行。爲彼等將來生計。

銀行條例改正之要點。一、國立銀行。創設後以二十年爲限。得以營業。二十年以後。則變爲私立銀行。此時則該銀行先發行銀券之權。二、國立銀行之資本。最少須十萬元以上。人口二十萬以上之都市。則須二十萬元以上。然經大藏大臣之許可者。亦可創設五萬元以上之小銀行。三、銀行以該資本總數相當八分之公債證書。存


貯大藏省。大藏省給以銀行券。該銀行即得發此券。四、銀行須預備法貨。在資本總數五分之一以上。五、發行券總額之半數以上。不得用五元以下之券。

此外又有數項。一、銀行不得買賣不動產。二、銀行不得從事製造工業。三、不經大藏大臣。不得與外國銀行交涉。四、不得以本行之銀行券或股票。借與他人。五、不得以總資本十分之一以上借與一人。又該存款總額中至少須預備四分之一。以便支付。此預備款內十分之一。須用公債證書。

該條例改正以後。銀行但預備銀行券四分之一。存置不動。其餘四分之三皆得任意使用。以致大得利益。又存置大藏省中之公債。亦年年生利。遂坐收二重利益。故不獨以前所設之四個銀行。生意融通。且因之續立許多國立銀行。明治十二年之末。增至百五十三行。資本金總額四〇六一六〇六三元。發行券總額三三九六五二八二元。

(未完)





哲  
理

## 續無鬼論

義烏陳梈

西儒聽特爾之言曰。『觀犬羊諸畜而知其未嘗留心於物理也。惟人則異是。凡所見事物。不特感外官之覺。抑且動內心之思。又必原及始終而求其關係焉。』斯言也。甚言乎人畜知識之淺深也。畜類之知識無多。故當時則昧。後時則忘。人則有所防也。故有遷避。心有冀倖。心由是有祈禱。心有崇奉。心有迷信。心而昏瞶于禍福鬼神之說者。遂居其大半矣。間嘗絮民族國家興亡之故。其與禍鬼福神之說大有關係。非洲之人聚木石而拜之。以爲無上之尊。而種將盡矣。印度之人信天堂地獄之說。至以溺死。宛伽河爲登天堂而社已墟矣。埃及人以尼羅河流卜歲豐歉。而國已奴矣。安南人喜蠱覽之術。而邦已覆矣。回教謂其始祖出於天神。至今猶禮拜之。勿替而土耳其波斯非利賓殆或亡矣。亞洲之東有待亡之老大帝國焉。亦一信鬼神。

之國也。各行省中廟宇不知其幾千萬。落壇壝不知其幾千萬。家香火不知其幾千萬。種浸淫滂濫忘反流連故風俗如中國實可信爲純信鬼神之國而窺信者之心以爲鬼之智甚超而權甚赫。君相有生死鬼神主生死國家有興亡鬼神宰興亡。凡民有起居飲食鬼神察起居飲食嗚呼鬼神信如是卓絕也。固宜泥首聽命矣。雖然人之于畜其圈人所賜之居也其芻人所賜之食也其行則人鞭之東而東鞭之西而西者也。故人負其卓絕之智力以統馭之而畜類遂莫敢誰何以至宰之割之而莫或倖免使鬼神於人亦猶是也。吾烏知宰之割之者畜受諸人而人且受諸鬼神也。故幸而無鬼神人類尙未蒙此慘毒乃猶全息相告謂夫陰界冥冥上界昭昭要自有赫聲濯靈者爲之主宰一挾此見捕風捉影之談援爲實據鬼神若乃或遇之矣。諺云『疑心生暗鬼暗鬼生疑心』今之所謂鬼神者抉其弊實不過疑心暗鬼之因依而遷流久而附會多而濡染酷遂使世界各處之弊俗我國乃兼而有之門徑岐迤支派囂紛必欲一一舉之幾于更僕罄管而不能覩縷茲特辨其大畧。(一)偶像(二)魂魄(三)妖怪(四)符咒(五)方位(六)識兆叙類匡謬爲我同胞告焉。

一 盈尺之木堆泥具耳目口鼻手足形而拜跪于其前曰其能禍福人也。城隍之廟出入生死入其庭爲隸爲卒爲皂爲役怖其狀或春或磨或鋸或烙腥其刑睨者乃戰慄自慄曰冥罰之可畏固如此。雖然人何由而生何由而死權果屬於城隍與否此理明而城隍之妄將不言而自明夫人之有生命乃始號時而爲城隍所授者乎。據流俗所說大抵如斯也。不知在乃母腹中時早已生矣且不在乃母腹中時早已生矣何則人與人之相替以種相傳者也。西人攷究人種知爲極細之虫形蝌蚪而長尾其初胎也亦不止一精虫而羣精虫相競爭惟强者獨存後乃變成人形竊爲比而觀之植物之種受肥料之滋養而萌人類之種受血液之滋養而嬰故謂動物之獨有生命誤也。既嬰而有人之生命未嬰而有虫之生命故謂弧悅之旦而始有生命尤誤也。植物之生命農夫有樹藝之權動物之生命乃父母有生育之權故謂城隍之輪迴主此生命更誤也。人之死也如老樹之必歸腐朽如舊機器之必歸損壞乃新陳代謝之公理必曰城隍吾無能與之辨。雖然近年恆多疫如鼠瘟如虎列刺時有所聞鼠瘟之病乃極細之菌集于皮膚上透入膚內而至血管而病源

在于菌。故具傳染性。一人病此。其餘菌即足以傳染他人。虎列刺之以菌相傳染亦然。然而同一鼠瘟虎列刺。發于中國之牛莊。福建上海。蘇州。杭州等地者。誦經號佛。以治之。罹而死者多。發于日本之神戶。東京。新潟等地者。棚居燬室以防之。罹而死者少。一多一少。視乎防與不防。則防疫有權。而城隍之死人無權。防在菌。不防在城隍。則菌有一時之權。而城隍并無一時之權。則死與城隍何與也。夫至生死于城隍。無與而猶以其像爲神者。吾知必無是人。不以城隍爲能生死人。而以他神爲能禍福人者。吾更知必無是人。故舉一城隍。而凡廟食如城隍者。皆無煩吾之贅述矣。

二 魂魄之說。其爲鬼之推波助瀾耶。俗云薦亡魂。俗云賑孤魂。俗云三魂七魄。推其意。似魂與鬼甚相似。而魄則爲鬼之所守。按人之靈能。由于腦。腦有大腦小腦之分。一主知覺。一主運動。而傳知覺運動之媒介物爲神經。人死時。目無視。而視官之神經熄矣。鼻無息。而嗅官之神經熄矣。耳無聞。而聽官之神經熄矣。口無言。而語官之神經熄矣。手足腰脊不能運動。而肢體官之神經熄矣。夫神經俱熄。爲靈能已寂之証。何則。靈能者。出令者也。神經者。傳令者也。神經之于靈能。如傳電體之于電。如

傳光體之于光。如傳音體之于音。如傳熱體之于熱。故必有電。有光。有音。有熱。而後可傳。否則無所傳也。爲靈能傳令之神經。亦若是焉耳。已靈能之于腦。如電之發于電池。各音之發于振動體。如光與熱之發于燃燒體。而其寂也。如電量之已竭。如振動之已止。如燃燒之已畢。故老而健忘。爲腦弱之初死。而全忘。爲腦弱之終。馴以漸至老。瀕于死。成歛級數焉。由是觀之。生前有靈能。死後無靈魂也。又人之身體。爲磷爲炭。爲養。爲輕。爲淡。各元質所組合而成。屍之腐爛。由于淡氣之易發出。與夫空氣中養氣之易酸化。葬諸墓內。酸化較遲。然而潮濕之薰蒸。終必腐盡而後止。當其腐也。或爲氣體。而散出。或爲液体。而流出。要皆性質迥異之化合物。其能稍持久而不遽變爲化合物者。雖有纍纍之枯骨。然膚盡則骨繼之。生化合物。亦性質迥異耳。而過古壘之前者。輒心計曰。是有墓焉。是必有魄焉。抑必有憑依之鬼焉。不知殘骸剩骨。以待化。合化而去者。屍生此。非屍而亦生此也。化合而留者。墓有此。非墓而亦有此也。故夫墓有何物。物果魄否。可知也。屍即魄乎。魄即屍乎。吾亦不敢強爲流俗定。然而化合之物。有公理。墓內之物。有定名。三尺馬鬣封之內。第問其化學作用。何



六  
如。而。無。魄。即。可。斷。也。夫。死。後。無。魂。魄。則。夜。間。無。鬼。物。可。知。夜。間。無。鬼。物。則。一。切。新。鬼。故。鬼。之。現。形。其。爲。八。公。山。草。木。之。兵。者。夫。亦。可。以。息。噪。矣。

(未完)



Amphispiza (5. 22. 11)



教 育

### 盎格魯索遜人種之教育并中國教育之方針

非有翻天倒海之氣魄。佐以快刀切麻之手段。則不能言教育。非有若保赤子之誠心。佐以如電之眼光。則不能言教育。何以故。則以言教育。當先破壞。故當首建設。故我今欲首先提議者。有一事。則教育與學校。學校與學科之界限是也。夫學校者。教育之主體。之機關部。而非其全體及目的物。而學科者。則又學校之主體。而非其全體也。言教育。而僅及學校。言學校。而僅及學科。謬與朝廷爲國家等。故自今不患學校之不興。學科之不備。然以言教育。中國則必無効。夫以一學校之力。勢不敵社風之所趨。即教以愛國。教以愛羣。彼退而息焉。若父母若朋友。一言以挑之。彼即舉昔受者而忘之矣。此就學校與社會之關係言之也。至于學科。向所謂『書上說說』耳。然則非打破此難關。雖舉數千百倫理大師口講指畫。其不流于昔所謂者幾希矣。而

況并此而無之也。雖然并此無之，其因蓋仍在社風與學風之未變。故今日言教育，必自改變社風與創造學風始。

知此可與言破壞建設矣。今學子將以為教育者，乃和平之事業。雖然，天下之破壞事業，孰有大于教育者哉！凡天演之理，國民之品性，其合於世界大勢者存，否則亡。中國立國四千年矣，其羣治之組織，乃生一種特別現象，其國民之眼光，常注于一小圈。于是于無量數之方面，造種種之原因，遂以成今日之形勢。嗚呼！使此社會而果合于世界大勢，則文明又復何讓而孰知適於昔者，乃大反于今也。然其組織則固已年長月久，根深蒂固，如連環相續，牽而復轉，故為吾中國除一弊，常因一而十，而百，乃出不可紀，極使不辨本末先後而欲掃除一切，則固未有能濟者也。

雖然，言破壞矣，使無建設也，則未有能破壞者也。夫社會習俗，必有所趨，徒舉其惡者而痛心疾首而掃除之，微論其青黃不接，乃釀大禍也。且吾知其必不能去，雖然建設云，建設云，又非可以鹵莽滅裂而為之者也。吾前之所謂破壞者，在去其舊染固已。雖然，凡一國立于世界上，有歷史者必有獨具之特性，秉之于歷史、地理、宗教

學術上，若悉舉而去之，微論其不能也，且其新者又從而不可固，而必于此混淆腐敗空氣中，別擇其善者而守之，勿使滔滔者隨與俱去，此其勢之甚難固已。即就別擇言之，又斷非僅以中國一圈內之眼光而遂能別擇者也。蓋必其洞察世界今日之大勢，求其歷史以觀其發達之所由，而推及其將來，夫然後縱橫上下以求其通計，其全則始，宗旨可定，而建設有其基礎也。而苟其得之，則又必其精神足以呼吸萬類，貫注全體，其氣魄足以鎔鑄羣倫，而感化之，苟不爾者，則其人既不見信于其羣，則其宗旨必不能貫注于人之腦，嗚呼！言破壞難，言建設尤難。世固有悲智兼大，以從事于茲盛業乎？雖為執鞭所忻慕焉。

吾今敢正告天下曰：今日中國之大患，蓋不在顯見而在隱微，而吾之所以汲汲皇皇痛心疾首而欲救之者，乃正在諸君所謂「是亦母傷」「是亦人情」「是蓋積重難返之習俗」之一點也。吾嘗謂國而亡也，必亡于不知不覺中，蓋謂此也。聞者疑我言乎？吾請舉盎格魯索遜人種之教育與我社會相比較，願一一劾之，一一對之。若以此事為難能，為母傷乎？嗚呼！斯果予所勿屑也。

當歐洲五世紀。有上陸于台母士之南之一羣索遜族。至六世紀之初。有盎格魯族者。侵入與之混。此則盎格魯索遜人種之所由來也。其特性。逐漸發達。其民族。逐漸膨脹。首固其本。于大不列顛及愛蘭二地。其文明。遂大進。其膨脹力。遂出口。挾其農工商業。以與異族競。而美而澳。而非而亞。建大強國。二一英。一美。統率人類。至四分之一以上。占領陸地。至四分之一以上。偉大哉。其民族之歷史。莊嚴哉。其社會之文明。而其民族前途之活動力。尙決決乎其未有艾。嗚呼。自有歷史以來。未有繼全之人種。如盎格魯索遜人者也。然則一民族而苟欲自存于世界。其亦知所取法矣。嘻。使彼而生。是使獨也。則吾亦已焉。而已。其不然哉。其不然哉。彼其所以致此之由。其原因。非一。而教育。特其重大者也。彼其于家庭。于學校。于社會。其教育也。與尋常異。與尋常異。其堅忍不拔之性質。其獨立特行之精神。其強大之體力。皆是教育之結果也。吾就其特別之點言之。蓋有數端。

其一。彼父母之視其子女也。不以爲己之繼續物。而以爲國民之分子。不以爲己之所有。而以爲國之所有。其子女而能離父母而獨立也。則歡喜無量。彼其苦心經營。

營。以教育其子女也。必曰。『如何而使吾子。可以得獨立之精神。也。如何而使吾子。可以得獨立之技藝。也。』彼父母。蓋爲子女而教育子女。非爲己而教育子女。非爲其養老。送死。而教育子女。彼常曰。爲自己而教育子女。而視其爲吾之所固有物。是蓋以利己心。而賊其子女者也。故常有二人垂老。而其子。乃冒重洋。越萬死。數十年而不歸者。而彼亦未嘗有所戚戚于其心也。彼又曰。爲父母一人之私利。而左右子女強之使順從。己是視其子女爲其慾心之玩弄物也。吾之子女。不若是之賤也。毅巨曰。懷哉。懷哉。彼族之所以獨優于世界。蓋有由哉。而我中國。則何如。謂出門三百里。發懷鄉病。泣虫歟。弱虫歟。雖其性質薄弱。蓋亦漸漬浸潤。由來久矣。然而固曰。子吾之所有也。養生送死。父母之所以樂有子也。是固人情也。天理也。何足道。嗚呼。而孰知此。即致亡之因也。

案吾述是言。吾知人必大駭。雖然。蓋何疑焉。夫倚賴者。人之惡根性。而報恩者。則又世界之大義也。故父母不可依賴。其子而不可以不報恩于其父母。且使父母而固視其子爲所有物。果何利乎。莊子曰。有人者。累吾中國人。抑何見累之甚。



也。吾嘗見有以中年後之人而坐是累故卒身因之弱神因之困者矣。而國遂因之而不振。嗚呼。是亦可以已。夫雖然彼英人之所以能致此者。蓋有由也。遲婚。一也。女學。二也。人各有職業。三也。凡社會一風俗之成。必有種種方面互相連絡而始立。故是又不可一端論也。要之生子而教育之。父母天職之義務。而爲之子者受其恩而報答之。亦天職上之義務。兩無可辭者也。吾願讀者勿誤解也。

其二 彼父母之親子女也。又甚重彼。不僅不視其爲己之所有物。并不願其爲人之附屬物。其教育之大宗旨曰。一人爲一人。故責之重。責任使之盡。義務教之主張。權利其啓發智慧也。務在實地。使自驗之。其造就品性也。務在尋常。使自覺之。故彼不以小兒視子女。而以成人視子女。彼常曰。重之。則人自重。輕之。則人自輕。若自少年而養成一種卑下之性質。則無論何人。必不能使之棄惡而爲善。然則我中國則何如。姑無論其以小兒視小兒。則且有以小兒視成人者矣。彼固曰。子吾之附屬物也。若夫權利云云。則吾國向來無此字義。更無論也矣。嗚呼。

其三 彼之教育子女也。務使其子女爲將來社會中的人物。而不爲過去之人物。

故決不以適于故去時代之教育教之。務使其自出能力。自闢新境。若父母舉其身已過去之經歷境遇。而爲其子女之模範等事。蓋彼族所無者也。然而中國則何如。夫尊古固中國之大特性也。嗚呼。水停則污。人停則死。人之所以勝于羣物者。以其善變耳。以停滯不進之社會。而處變動劇烈之世界。吁。其危哉。

其四 彼以使其子女從事于實業爲第一義務。彼有恒言。勞動神聖也。彼視職業無上下。無貴賤。而惟以勞動爲最尊貴。而惟以自食其力。不食于人爲最尊貴。其所賤則怠惰而食人者也。故彼雖貴族富豪之子。有農夫矣。有鍛冶矣。有大工矣。有商人矣。有鞋匠矣。而皆無貴賤。而所賤則有之矣。政客官吏是也。故盎格魯索遜人之專業政治者。頗稀。除少數之學者以外。餘皆以實業爲主。以學理爲補。其國民教育之所重者。在家庭。在實際。社會所謂學校者。不過教育中之一小部分而已。未完



## 印度滅亡之原因

### 第一節 叙論

試一繙東洋史。其號爲古國者。莫支那印度若矣。然所謂印度者。嘗以一百五十五萬方里之地積。三億五千六百萬之人口。託命于盎格魯索遜人種之下。嗟嗟。山河破碎。身世浮沈。彼荼禍人種者。將長此浩劫。而不復乎。故宮禾黍。荆棘銅駝。亡國慘情。吾誠何心。而乃述此。而今日者。位于喜馬拉山北之一大帝國。其運命又屬何如。綜所經歷。何一非印度前日之歷史。廢書長嘆。誠不知已。置身於印度乎。抑支那也。夫印度者。其種姓混亂。其言語龐雜。其宗教分立。上則沈湎歌舞。而不知大義。下則熱情聲色。而不知國讎。泊乎奇政百出。暴斂橫興。乃至不能與白種之女僕交語。而始覺痛癢。欲脫羈絆。則無如膏血已盡。咽喉受扼。雖有拜提爾耶諸人。亦終無術以

圖恢復。嗚呼。印度亡矣。後之爲印度者。其亦引以爲前車之鑒矣。夫空言未來之運命。不如實證已往之歷史。爲尤得也。彼印度者。旣已演此慘劇。映入於吾人之眼簾。殆天特欲留此未亡之印度。使之有所觀感。有所奮發。而不願其爲印度之續也。則吾又安得不熟讀其歷史。一研究其致亡之原因。而力求所以免蹈此覆轍者歟。爰釐其先後之原因。而論列之。幸毋使後之視今。亦猶今之視昔也。

## 第二節 印度之地理上關係

氣候之寒暄。食物之質點。山川之疎密。皆於人身有密接之關係。故研究歷史者。地理爲重要之一部分。而於家國之興衰。亦有間接之原因焉。印度全國之地勢。起亞細亞洲中央。斗出於南海。爲一大三角形。北倚喜馬拉亞山。西臨阿拉比亞海。東枕孟加拉海。北緯自八度起。至三十五度。全國面積共一百五十五萬方里。其北境以喜馬拉亞山爲屏障。更南出一支。盡孟加拉之東部。及亞桑與緬甸之經界者。是爲奴額罷雷爾山。又西北之一支。蜿蜒南向。而達於海邊者。是爲塞甫特克山。司拉門山。與赫拉山。凡注於南方之水流。皆發源於此。夏日之間。南洋水氣。蒸騰上達。被定

時風所吹蕩。而北馳。來至喜馬拉亞連山。即降爲霖雨。因以養印度河之水源。而山之南坡。受此雨水。土地悉爲膏腴。東自孟加拉海灣。西至阿富汗國境。及阿拉比亞海之地。皆此水流所灌溉之部分也。其平地流於北印度之曠原者。則有三大河。曰印度河。曰布蘭瑪普拉河。曰恆河。印度河者。發源於喜馬拉亞山。貫克什米爾西北之依斯加爾特深峽。經槃若普州。而西南注入海。其長有一千八百餘里。布蘭瑪普拉河者。亦發源於喜馬拉亞山之後。西藏山中。東走貫喜馬拉亞山之東端。而入亞桑。流至孟加拉之東部。爲一大航路。便於運輸百物。恆河者。發源於喜馬拉亞山麓。貫通一千五百五十里之地。爲衆水之合流。印度北方。人煙稠密之田園。藉茲灌溉。以豐養物產。故土人稱之曰聖水。其南方之地。爲三邊之高原。連山環繞。其中數千里皆平土。有名之商埠。孟買。麻特。拉薩。賣索爾等。皆在焉。自昔入寇於印度者。多踰東北或西北之山嶺而來。每次順河流。遂先入者於南方。而自代居其地。當印度草昧之時。高地之亞細亞人。蒙古人。及高加索人。漸逐水草西來。從喜馬拉亞山西北之凹處。入印度。見有名之恆河與印度河。不勝驚喜過望。曰。有如此二大河流。足建



一大國而有餘矣。遂散棲於此兩河之流域。相爲孳乳。蓋無智蒙昧之原人。初未知耕牧之道。僅取自然長成之動植物以爲食品。故其爭先羣集此地者。亦足見此地從古具天然之富也。其開化遠在各國之先。良有以歟。然而各種人自西北方侵入。以來一傳再傳。即漸失其特別之精神。則又何也。蓋亦由於地方之溫度過高。而土過肥沃。人民定居之後。即由安逸而流於奢華。由奢華而流於文弱。由文弱而流於驕惰。所謂沃土之民不才。歟。余聞德國之博士阿爾騰勃爾者。留學於印度數年。專研究印度歷史。而著爲論說曰。印度爲炎熱之邦。禾稼之蕃殖。全世界中殆無其比。因此人民之欲望易給。無意他求。然其人民之精神氣象。爲炎熱所制。儉惰苟安。不知向於他邦。講求交際對待之方畧。故毫無堅固忍耐之性。其國力亦萎縮而不能伸暢。其文明雖一時蔚然發生光彩。而其精神修焉消滅。亦即此原因云。此足以證前之說矣。

### 第三節 印度之民族上關係

合數民族而居一國。其初雖有吸收化合之力。其終必生分崩離析之漸。而況種姓

不同階級。各異積弱之來。蓋有由矣。當亞細亞人之侵入於印度也。驅逐黑人種而殺戮之。或隸屬之。遂占居於恆河與印度之水涯。其中恆河與茹牟那河相合流之處。又有盎格。麻加達等人種來侵。更進入東印度。此後他邦之人種。益有侵入印度之思想。而阿利安人種。於此時結合大羣。橫溢而來。侵入印度河邊之槃若普。以最强之勢力。最新穎之文明。壓倒內地之土人而感化之。未幾印度之全地。過半爲其所奪。是爲溫都人種繁殖之始基。迨後蔓延印度全土。與其土人雜婚。其風俗習慣。隨之混淆。遂漸失阿利安人種之氣象精神。而別成一種特殊之阿利安人種。此實印度人種。本爲阿利安人種。而不加他之阿利安人種。有進取活潑之氣象。文化之發達。亦半輟於中途之所以也。然其初本恐與土人混交。因以婆羅門教義立階級法。分別四種姓。其一曰婆羅門。最清貴。此類人自云。我本始祖。從梵天口生。故取梵天爲姓。世世相傳。學四韋陀論。皆博學多才。或爲王者師。或爲祭師。凡有坐席不與餘三姓同行。自外雜類。更宜遠避。其二曰刹利。從天神之臍而生。有日種月種兩族。世掌印度之政治及兵事者也。其三曰吠舍。從天神之脇而生。此種人多從事於

農商。或爲醫師訟師。其四曰首陀羅。從天神之脚而生。專業畜牧及傭工。此外尚有數族。其中以帕利司族爲最賤。人稱之曰旃陀羅。以鞋工皮匠等爲業。在印度殆不齒於人類。并禁其受教育。要之設此種階級者。原爲防止與他族結婚之漸。在印度語曰Varana 即階級二字。中含色字之義。又其階級規條中。禁止與他之階級結婚一條。最爲重要。足以證也。然以階級故而國民之統一力因之而大害。故一旦遇外族來侵。遂失其團結抵抗之具。坐使國日殘破而已。

#### 第四節 他族之侵入類繁

凡一舊國而被數種族之蹂躪。其國民之元氣已非百年不復。若再經他族之入居。或奉其王朝。或受其轄制。則後雖回復。獨立亦終難以自振。吁可畏哉。如意大利如埃及皆其已事也。噫嘻。傷哉東方之老大帝國。其運命至於今日者。吾復何言。吾復何言。印度當紀元前五百十八年之頃。波斯王大流士者。首侵略印度。併有印度河岸之地。收其租稅。嗣後在大流士戰役後百八十四年希臘之馬基頓王亞歷山大率精兵十二萬。入於東方。由亞特渡印度河。略取印度之地。諸國兵皆敗。僅存摩竭陀國。猶欲攻之。會

兵士皆倦戰。遂班師渡印度河。凱旋於波斯。其後四年。亞歷山大崩。其勇將塞留哥斯獲巴比倫及印度之侵地占領之。當時摩竭陀國王被其大臣所弑。另立荖利耶朝。傳三世亡。珊伽朝代之。其時拔德德里亞人屢屢侵入北印度。珊伽朝傳十世亡。安度羅朝代之。此時北方之種族來寇印度之西部。終占居其地。其後又有耶婆那人者。從海上突進。略取孟加拉西南之荷利沙地。至紀元六百二十二年。亞刺伯回教勃興。以刀劍爲宏教之具。遂大擴張圖。於九百七十七年。回教之勇將士武克士王。從阿富汗之祇壽尼。進侵槃若普之地。於各處建立回教堂。多掠財寶而去。其後槃若普之王與挑戰。復爲所敗。每歲納貢賦焉。及士武克士王卒。其長子馬毛多領其地。馬毛多者。勇敢有武略。復舉兵入槃若普。擒拉保爾王塞巴爾。尋與立約。歲納貢賦。釋之歸。而還其侵地。後因羅待布土王背約。復取羅待布土及牟爾丹之地。又伐塞巴爾。塞巴爾求援兵於印度諸國。諸國王合縱禦之。終爲所敗。遂連年征服各土。毀其偶像。掠其珠寶。印度民族遂折而爲摩哈末臣僕。至一千二百九十八年。撒馬爾罕帝帖木兒。又募九萬二千之兵。大舉征印度。轉戰無前。所過殘破。終拔特里城。屠

戮降四十萬。至是印度復爲蒙古人所有。未幾聞巴牙屑之兵侵入其國境即退去。使羅保爾之總督幾儒爾代鎮其地。至千四百七十八年。幾儒爾之後裔。又將其國傳於阿富汗人。毘路利路提。至三世。暴虐過甚。威勢大衰。國內謀獨立者踵相接。於是槃若普之總督度刺路提者。至哈布爾。見帖木兒之五世孫巴卑爾。請共入印度。鎮定國家。與帖木兒帝國。巴卑爾得此機會。復進入印度。會國內有他故。屢進屢退。度刺路提。至是亦中悔。反抗之。然印度人多密通款於巴卑爾者。巴卑爾乃復大舉襲特里。激戰之後。終陷之。遂即印度帝位。建設莫臥爾朝。五年之間。平定全國。勢威大振。而印度之王侯。欲驅逐回教徒。謀獨立之心未已也。乘帝之崩。國內又大亂。是時葡萄牙人已在南印度通商。瞿侍拉土之王。婆蹉度爾。大養兵力。思圖恢復。遂借葡萄牙人之砲銃。以與帝弗馬暗戰。帝雖敗績。而其勇將舍爾。阿富汗人也。乘間併吞婆蹉爾之地。攻孟加拉。勢張甚。帝一再征之。均爲所敗。僅以身免。遂與其二弟。共歸亞瞿羅。集財寶奔槃若普。舍爾遂稱王。立阿富汗朝。其後弗馬暗。借波斯之騎兵一萬四千。襲千達巴爾。取哈布爾。悉平定阿富汗領地。於是復率騎兵一萬五千。侵

入印度。會舍爾已卒。印度王侯。復蜂起相攻。弗馬暗乘機突進。終顛覆阿富汗朝。再興莫臥爾朝。未幾帝崩。子亞克婆爾嗣。施善政。行改革。登庸印度人。使與回教徒共立區要之地。以收服人心。然至帝崩後。諸子爭位互攻。王侯各圖自立。紛紛借寇兵。竇盜糧。彼活眼剛膽之白哲人種。遂觀破此中秘藏。乘民族主義膨脹之風潮。席卷長驅。不出數年。囊括印度全國。以養成西力東漸之大勢。抑何其經略之易而奏績之偉也。嗚呼。使印度人民不先失其特殊之精神。則他族不能侵入。他族不能侵入。則國民必能保其相互一致。巍巍印度大帝國。至今猶雄長於東亞。可也。彼白人雖强悍狡黠。又何從覬覦而攫取之哉。







各國內情

## 俄人之性質

飛 生

譯者曰吾熟聞之矣。『知己知彼。』嗚呼。何吾中國人乃并此言而忘之也。吾又熟聞之矣。『天下之大患在俄。』嗚呼。何乃并此言而又忘之也。吾既草東亞新政策一篇以爲吾國民告。雖然。外交者內治之膨脹力。而內治者則國民性質之回光也。吾中國昔日一物無所見挾其茫然之概。以與他人接。夫亦何怪其敗也。敗矣。其亦可以醒矣。其亦可以詳求彼族之情形而自念矣。而茫然者。仍如故。嗚呼。其無人心也哉。夫政府貴忙或不暇從事于此。吾儕國民而欲審敵自鏡。講其所以處之之道。是可已也。孰不可已也。是篇原稿爲英人赫威克所著。其理想深入。其觀察微密。赫威克者。英之少年新聞記者。精通俄德文學。世

之卓卓有名者也。余雖不能挾糧走萬里以一攷其情事，然讀此篇，蓋恍若遊其地而接其人，用譯述其意，以介紹于我同志焉。

本門原擬草海陸二大強國一篇以問世，以迫于日，而調查參攷書，尚未齊集，故先譯此原作請俟下期，讀者諒焉。

吾自聞外交家之議論，讀無政府黨之著書，觀新聞雜誌統計之種種事業，而心目中有一俄羅斯焉。若曰俄羅斯者若何？若何？及一旦入其境，直接其人民，觀察其天然景物，而遽然驚而恍然，悟嘻，吾昔時心目中之俄羅斯，蓋不如是，不如是，吾是以知世之論俄者，非偏于一，則失于誇，非出于謬，則出于奇，是皆不足信也。俄大國也，欲察其人民之特性，蓋決非易易。吾今自種種方面上，普事觀察，而一一條論之。其一天然之觀察點及俄人之美感，余一入俄境，而瞿然起意外之感，其一則風景是已。世之論者以爲俄土者，則惟是荒荒草原也，鬱鬱森林也，必其不美觀不愉快也。而孰知斯言也。蓋未知其真相，而妄爲懸揣者也。余自瓦沙（波蘭舊都）至莫斯科，俯仰其天地河流，涓涓樹枝，垂垂皆現銀色。時泛舟筏順流而上，淡煙落霞中，茅屋點點散在各處，葵花之下，農夫刈草，時有森林叢叢一望至百里人羣之處。

高塔凌雲，余乃深嘆其天然之美，而益知俄人性質蓋誠有未易測者在矣。以俄國之風景而未得紹介于世界，斯亦可爲不思議矣。雖然蓋有由也。俄人未自知其風景之美也。余常至莫斯科之美術館，見其名畫種種，或爲勇壯從軍圖，或爲殘忍慘殺圖，而無一及俄人天然之美者。蓋俄人者少年之人，種其美感之程度，尙淺，故于多情感或奇絕怪絕之刺激的現象，則好之，而于自國高雅之美感，蓋未之動也。

以俄人爲不解自由而好爭亂，則亦未知其生活狀態之言也。彼決非有奴隸根性，而好暴亂者。彼之精神雖非快活的，而頗富精力，彼之容貌風彩雖甚粗野，而正直義務之觀念甚強，其體魄健其精神樸誠哉。其少年人種也。

俄人忍耐力甚強，而有陰鬱氣，然遇來復則彼之精神頓一變，歡嬉快樂，歌舞踊躍，彼平生亞細亞的性情，一變而爲歐洲的，雖然彼終小兒也，彼之歡樂亦如小兒彼生活之種種方面，雖未如西歐人之發達，而其思想其快樂其精神皆于將來有大發達之性質，故曰幼兒者俄人之特色也。

其二 人種上之觀察點及民族之自覺心 俄人種問題不惟外人論之。即俄亦自論之。夫以俄人之種類之複雜。有若所謂大俄羅斯、小俄羅斯、白俄羅斯。有若所謂西西安、史老扶、韃靼、芬蘭諸人種者。其紛爭之莫決也。宜也。雖然最近十年來。以俄國人類學者之苦心研究。則歐洲東北部之人種問題。殆將解決。蓋太古俄人實爲長頭人種。俄也。歐也。皆爲同一人種所棲住。自石器時代終進。而爲有歷史之時代。則以亞細亞人移住。故而人類之大變動起。廣頭人種。以如潮之勢。移植于歐洲。遂占有俄羅斯一大平原之全土。而與昔時之人種淆。此則俄羅斯人種之所由來也。廣頭人種。更進而進及亞喇伯山附近。及其高地。其他則似爲長頭人種所驅逐。故西歐之大分。則長頭人種占之。亞細亞之大分。則廣頭人種占之。而俄羅斯者。實關鍵二大種之新人種也。故自歐人視之。則爲亞族。自亞人視之。則爲歐族。要之。則歐亞混合之雜種而已。

一國土地而過廣大。則國民民族的自覺心發達必甚遲。而活動力必甚緩慢。此歐人進化所以先于亞支那。近世所以改革甚難。而日本之進化所以速于支那也。俄

人亦如之。吾以與匈牙利比較。其說尤顯。俄匈之活動力。蓋相差遠甚。蓋匈則地小。其感動靈一被迫于外族。則其自覺心勃然興起。吾視匈人。其目炯炯。其行汲汲。其運動敏活而靈變。若俄人則有若半醒不醒者。夫以人種地理言之。俄匈鄰也。而其差乃若是。得毋以國土之大小不同。而民族的自覺心乃發達有遲早歟。雖然。俄人者終有大醒之一日。俄人者幼兒也。

文學上之觀察及其女性 俄人文學之特色。則真率是也。若以小說與英人較。其尤著矣。英之小說家。以表白其一己之意見。發散其鬱勃之精神者也。雖綴之以美文。而著者靈魂之真相。蓋未曾現。俄人則不然。放曠而真率。且不惟傾作者之真情。而活現之。即其描社會人物之真相。亦出之以忠實。蓋于是中可知其精力可得。其情可見。其天性可見。其誠意真率之所在。可得其強點。並可得其弱點。試一讀諸大家之小說。則其貴族、農民、罪人、狂人之真相。皆于是乎現。有謀社會改造者。有反對者。有冷視者。有崇拜東洋者。有熱心西洋者。有尊敬已國者。雖紛然雜然而皆出之。眞實蓋俄人文學之性質。實與英國婦人之文學類。




俄人之小說尤有一特色在。則寫人情是也。無論若何之名文。苟非寫人情者。則不能見重于其社會。俄人所崇拜者。所神聖者。人情也。慘酷可也。卑猥可也。猛猛可也。可憐亦可也。而惟以能表顯人情者。爲最美。故俄之小說家。貴人情于法律宗教道德。聖人之心事。姦婦之心情。顛狂之心狀。盡所有而摹其真。則其所汲汲從事者也。俄人有女性。前僅以文學言之耳。其實于種種方面上。皆得發現之。夫感情勃然而起。則真欲實行之。實行之而不得。則一變而成陰鬱症。此女子之通性。而亦俄人之通性也。法之歷史家。有言曰。自法以北之民族。蓋雜女子性于女性國民中。故婦女獨得立顯著之地位。吾證之實際。而益信。俄人之大科學家。多婦人。大文學家。多婦人。乃至政治上之運動。虛無黨之運動。宗教上之運動。皆多婦人。蓋俄人之性質。實女性也。嘻奇矣。

其三 進化階級上之觀察及其內部之淘汰 凡人類之進步。可分三大級。始而粗豪。繼而野蠻。終而文明。是有識者所同認也。雖然。其不按階級而進。而自始至終周旋于一階級內者。有之矣。法蘭西者。文明人種之標本也。自其歷史之初現。即重

視禮節。制情慾。貴正義。發揮其聰明伶俐之天性。迄于今。未有已。西班牙者。粗豪人種之模型也。制欲至極端。激昂至極端。貧樂而忘實利。爲虛名而不辭苦痛。蓋蒙昧粗豪人種特色之最進步者也。若立于粗豪文明之間。之野蠻性。則俄人其備之矣。即其代表者言之。衣文也。帝俄大彼得也。加塞利也。帝俄女皆已脫粗豪人種之特質。而未至于文明之偉人也。故華麗而又粗放。真率而有優情多情。而復殘忍。是皆野蠻人之特性。而亦即俄人之特性也。

俄人之疾病甚多。自精神下至于肉體。讀俄人統計之報告可知也。其傳染病亦甚烈。或以爲不潔致之。而俄人實非不潔者也。其原因何在。則自然淘汰是蓋天行之自然力。實能進民族而改良之。使趨于堅實壯健。雖然。其經歷有先後。其勢力有強弱。俄人方值其強。則其一羣中之弱分子。自不得不日趨于少。悲觀者以爲是俄人之不幸。而不知是實造大國民之不可避之階級也。

(未完)



極東經營

## 俄羅斯之東亞新政策

飛 生

- 一 競爭之種類及世界之大勢
- 二 俄人外交之特性
- 三 俄人之東亞政策
- 四 俄日之親交
- 五 俄英之關係
- 六 結論

飛生氏曰。昔俄皇大彼得一世。以陰鷙狡悍之手段。乘時竊發。植其勢于東歐之一隅。不足。則移其馬首而東。東方之人。若病夫。若少年。憚之而不敢進。防之而不勝慮者。有年矣。夫俄人固以進取爲政略者也。其主義與西方諸

國將母同而或先或後以左以右一若舉全球諸大帝國之外交家之眼之手而猶未窺之攫之者則何以故何以故母亦別具一種靈敏詭譎之政略而非尋常所能窺測者歟作俄羅斯之東亞新政策

### 一 競爭之種類及世界之大勢

有政治上之競爭有經濟上之競爭政治上之競爭者何奪其土地亡其主權奴其人民其爲禍也政府受之國民受之經濟上之競爭者何吸其膏血瘵其精神乃足使全國人之先復噍類而政府可以如故土地可以如故故其爲禍也國民受之政府不受之嗚呼自今以往列強之侵略中國政策蓋已不在政治上而在經濟上矣而經濟上之競爭其禍乃更毒于政治上何以故譬之是猶人也朝割其一手夕割其一足其人必痛而其警醒也易而其反抗之力大而其人猶可以復生也若舉全身之精血而吸之其猶茫然皇然莫知其由未幾乃病瘵以死矣此言其術也若夫于政治上則未有經濟上之權既占而政治上之權乃猶能以人者也蓋其資本所在之地即爲其政治能力所到之地徵之於近代歷歷有明徵也嗚呼銳哉列強之

外交手段也嗚呼鈍哉我國民對外之眼光也殆所謂將死而不知其病也耶吾爲此懼。

雖然彼其侵略主義之改變蓋有二大原因其一曰關係于世界之風潮其一曰關係于中國之內力所謂關係于世界之風潮者何也蓋自立憲政治之確立人民之幸福日益增進于政治界上无重大之問題于是舉國民之心思才力一歸之于實業而工商業日益發達矣是其來也英美倡之于先而大收其効于是德意志繼之而商工之政策之風潮風靡全歐矣此迫于世界之大勢而不得不急轉其機者一也所謂關係于中國之內力者何也曰義和團之反抗力是也甲午一役列強知中國之无能爲于是種種野心起及夫庚子難作而彼乃深悔其昔日之政策蓋不足以亡人矣夫以數千年閉關自傲之民族一旦強之以服從于風俗不同言語不同宗教不同之異族下雖有仁聖大哲其不能相安于無事也必矣則民間之感情背東索一市西要一港夫強借一兒童所有之物兒童猶且惡之而況于一政府則政府之感情悖矣幸庚子之役而中國政府之能力已薄弱之極故不半年而遂息耳

若稍能持久而列強之禍又何可料也。若是則彼又安得不急變其政策以善其後也。此又一也。

若是諸君以爲今日之所可慮者英耳。美耳。德耳。日耳。若俄則向之所謂執土地侵略主義者也。且其商工政又不如英美也。且其內政又非立憲。而君民之爭又未亡也。況乎日英同盟則其拒俄之意明矣。故俄欲蠶食東方而英日扼之。吾姑利用其猜忌之心。偷一日之安焉可也。嗚呼。天下之鈍且愚未有如中國人之外交眼光者也。天下之淺且薄未有如中國人之外交智識者也。嗚呼。吾知可薩克之殖民地將包山東直隸而有之。而黑龍江黃河之水將全赤而我國民且將望北九叩首以大呼順民也。諸君以爲吾徒爲此以駭人乎。請少安聽吾說。

## 二 俄人外交之特性

欲知俄人今日之東方政策不可不知俄人外交之特性。其特性奈何。曰陰。曰耐。曰柔。抑吾聞之史老扶人種者其于時爲幼稚。其于性爲女子。其于文明爲半歐半亞。彼其外交手段殆由彼國民之特性所發生。此亦可謂外交界中一奇聞矣。嗟乎以

其善陰善耐善柔之政策以與我冥頑不靈之中國人遇茫茫大陸吾又安知涕之何從哉。

何爲陰陰之爲義也。復有二。一曰善伺。善乘。一曰善避。彼之能散重金以啗中國之近侍也。彼之能善與中國人結密約也。彼蓋善伺中國人之隱情而利用之也。而其乘之也又甚捷。一機之來往往人未及思而彼已布置停當者于西伯利亞于巴幹半島皆是也。而其術之巧者乃能于神鬼不覺之際利用其手段務避人之所注目而乘人之所不覺則善避之謂也。夫俄之蓄野心也人誰不知之。彼得之遺訓路易設之地圖歐人其熟慮之矣。即我中國所謂「大患在俄」之說亦發于數百年前。人能言之然則稍有其舉動列強之注目之者其無不至也。必矣。若以尋常之外交家處之蓋動輒得咎矣。雖然彼有陰之一術也。天津之役英法聯軍以迫我英也。法也。中國也。其互相注目也。彼乃乘之以取東三省以北之地矣。庚子之役列強之注目者北京也。而彼又乘之以入東三省矣。及和議既成東三省之問題起世界耳目一動而彼又逃而入巴幹半島矣。又逃而問西藏矣。東爭則西來西爭則東出自有



國際以來其神妙之手段未有如俄人者也。

耐者彼外交政略成功之大原因也。皇帝可以死。大臣可以易。而所謂統一大帝國者而終歷數百年而不變。夫西伯利亞之荒寒寂寞。而彼乃取而經營之。三十年以前。夫孰知有今日也。而今乃至于是。嘻。其氣魄之雄偉。吾人不得不瞿然驚也。而非善耐何能至是。吾于是知彼之善乘間者。蓋有由也。彼之精神甚強。其注意于一物也。始終不懈。故能有間必乘無微不入。夫俄人之外交。未必動輒得利也。克利米亞之役。事將成而厄于英尼布楚之條約。地既占而歸于我。自彼得大帝以來其外交政策之頓挫。大小不下數十次。而彼終能堅定持久。百折不撓。而遂以成今日猛虎在山。百獸震恐之勢。嗚呼。天下固未有偉大事業而不經頓挫者。也是在國民之堅定力矣。雖然。而又烏能使余一日安也。

若夫柔則天下之最善于用柔者。未有如俄人者也。彼深知欲奴隸人則不可不用懷柔政策。而乃欲先立權威。故始必以極慘之殺戮臨之。先使其神魂憔悴。肝膽破裂。夫然後顧之煦之。于是愛戴之聲乃嘖嘖于口矣。此殺于先而柔于後者也。更又

有殺此以警彼者。則又一策也。嗚呼。彼與他人之歷史。吾姑勿論。則就以近事論之。前年滿洲之被殺于俄人者。以數萬計。及今則又散二萬「露勃」于滿洲。而東三省一帶其愛戴俄人之心。又不絕于道。幾乎有東面而征。西夷怨之概。吾又聞西藏之活佛以俄羅斯皇帝爲最親愛之朋友矣。嗚呼。吾聞俄人之言曰。支那人必俄羅斯乃能統治之。嗚呼。吾心戰。

欲知俄羅斯之外交情事。猶有不可不知者一事。則外交之關繫于軍人者是也。各國之外交。任之者則外交官也。而俄人則外交官任其半。軍人任其半。蓋俄人之所謂帝國主義者。軍人社會爲其主動力。俄國之軍人最長謀略。最有敏腕。最富于外交智識。而又侵略之野心勃勃。如燃火故其守邊之戍兵常沉機以待。變一有事則奮起直追。一往无前。蓋軍人社會之功名心實。俄人蠶食世界之主動力也。

就俄人外交全體論之。則有二方面。其一則東歐。一則東亞是也。雖然又有特奇之一事。則兩方面之主動力是已。東歐方面之外交。民族主義爲之本。所謂史老扶統一主義是也。故歐人謂二十世紀中。俄奧不並強于世界。何以故。蓋奧人之小半。皆

史老扶人種故。而其尤著者則土耳其之種種政策是也。東亞之方面則民族帝國主義爲之。本今日滿洲之經濟政策。西伯利亞之殖民事業。皆是膨脹之結果也。夫同一民族。不能分屬于異族之下。務統一獨立。以求自治。則民族主義之謂也。內力既充。則膨脹于外。則民族帝國主義之謂也。其後先次序之不可相凌躐也明矣。而俄人乃並一爐而冶之。東方執一策。西方執一策。故歐人常謂世界之國之奇。未有如俄羅斯者也。誠然哉。誠然哉。

### 三 俄人之東亞政策

夫大勢之日趨于變也。既如彼。而俄人之慧眼也。又如此。然則彼之變計。蓋無可疑矣。蓋無可疑矣。其變計奈何。一言以蔽之曰。易其政治之侵畧。而爲經濟之侵略而已。吾今欲窮究其情狀。以爲吾國民告。則不得不分數節詳言之。

#### 甲 俄人之商工政及威得大臣之建策

嘻。天下之鈍且愚。未有如中國人之外交眼光者也。凡于極東發一事。列國無不張目疾視。朝野沸騰。而我中國若無睹焉。去年十月中有俄羅斯威得其人者。巡視西

伯利亞及滿洲旅順各路。而日本之駐清公使內田氏。亦于十一月歸國。吾不知我四萬萬人中。其知此事而能記臆之者有幾人也。嗚呼。而不知是區區者。實于中國之死生存亡有絕大關係在也。威得者。俄之大藏部大臣也。其巡視東亞也。蓋其經濟政策發動決意也。日使之歸國也。蓋亦以對清政策之當一變也。夫日人之所謀。吾勿敢知。茲請即以威得之所謀。與夫俄人昔日之經營者言之。

俄人之注意于經濟侵略也。固不自今日始。而今日特其宗旨決定之時期耳。蓋自甲午戰爭以來。俄人之勢力日擴于中國之西北部。而延及朝鮮。自其表面視之。則若政治上也。軍事上也。而不知其根本之所在。乃皆列于商工政。蓋彼自得鐵路之布設權。及旅順大連之永借權。以還。乃利用此而汲汲經營之。其勢力遂得根據而東。華輪船公司及中俄銀行。乃以半官半民之資本擴張其勢力于中國各地。嗚呼。彼業之所及。即其勢力之所及也。而亦即其政權之所及也。其韜晦之手段。誠狡矣哉。

謂俄人拙于商工政。此文又知其昔而不知其近者也。去歲有自北清及海參威歸者。

皆言東華輪船公司之發達。滔滔之松花江已無中國之帆影輪聲。其翩翩來往者皆俄人矣。而自南清歸來者皆言中俄銀行之發達。其支店已遍設于各處。夫當威得之創立中俄銀行也。固不惟外人疑其不成。即俄政府亦有疑之者。而今乃卒至于是。則俄人之非拙于商業可知。而東華鐵道之建設。大連港之築港及開埠。皆絕大工事也。而不數年卒以告終。則其非拙于工業又可。知此言其國民之內力也。若夫威得之建策。則尤有可驚者。日人曾屢言之。吾今節錄數端如下。

一 擴張中俄銀行之營業範圍。凡北清之官辦事業。皆得補給其資費。

一 凡吉林黑龍江二處之開礦事業。皆爲中俄之共同之事業。其資本則由中俄銀行支領。

一 自北京至張家口之鐵路。以千九百〇九年爲限。皆當竣工。是亦爲中俄之協同事業。其工費由中俄協商定之。

一 東清鐵路之乘車費。自俄曆千九百六年十二月一日起。凡中國人及中國貨物。皆得減費十分之三。

國民乎。國民乎。以爲是落落數條者庸何傷。庸何傷而不知禍乃不可思議也。而況上所舉者。特其一斑耳。吾今即就其淺者言之。夫一國之有交通機關也。猶人之有脈絡也。交通機關已握于人。則世未有其脈絡已斷。而其人尙能自存者也。一國之有財政機關也。猶人之有精血也。財政機關已握于人。則天下斷未有精血已瘳。而其人尙能自存者也。彼之建此策也。蓋竊欲謀我之財政交通兩機關而占據之者。也。此就政治言之也。若夫自經濟上言之。則二十世紀中。苟得立于經濟界者。則其國興苟弱于經濟界者。則其國亡。夫西比利亞本荒寒之土也。使苟其興也。則彼之雄于經濟界必矣。故其減乘車費以招徠中國人也。蓋欲自振其市場也。彼能賤之。彼能貴之。而鳥知小利在目前。而大禍乃隨其後也。嗚呼。目極寥天。斯人未悟。哀生民其憔悴呼天。帝兮無言。慎毋使後之身受其禍者。乃讀此文而流涕也。 未完





記事

# 內國近事

## 東三省撤兵問題

自中俄兩國既調印滿洲撤兵條約後。向來注意於該問題之英日政府。皆謂俄人既允撤去滿洲之兵。從此東三省可得暫保安全。乃近觀俄國調集滿洲內地之兵。屯駐於鐵道各線路。而撤兵之約。幾至空存其名。俄人藉口於保護鐵路。反以強大之兵力。盤據中國北方之要害地。其勢力已日見增加。他日若遇戰爭之事。俄人之調集兵役。必能愈目便利云。

## 俄國新艦隊之巡行

俄羅斯近以保護黑龍江及烏蘇里之航路為名。將兵艦二十五艘。新編成一小艦隊。巡行滿洲之沿岸。故一旦遇有戰事。必得迅速調集其海軍。

## 滿洲稅關問題

俄國擬沿滿洲鐵道各線路。設置稅關。先於達爾尼地方。首行創辦。並擬派遣稅務司一員。以管理各項稅



則一切事權皆不歸總稅務司管轄。現總稅務司赫德君竭力唱反對之意見。然聞交還鐵路之約內實已預附此條。俄人此次之計畫。本係有挾而來。中國政府頗有不飽拒絕之勢。

#### 要案紛來

交還天津及關內外鐵路諸問題。既見着落。於是中國問題。似漸入安全之境。然近來各國要求開鑿礦山敷設鐵道之權。又覺紛至沓來。最初俄國之署理黑龍江將軍。受黑龍江總督之命。力向中國政府要求索東三省之礦山探掘權。既得中國政府之允許。即訂立條約。建設公司五所。專事經營。法國亦相繼而起。向政府要求鄂武地方之煤礦開掘權。比利時要求四川之鐵道敷設權。政府亦不敢決意拒絕。至四川十六縣之煤油煤炭礦之開鑿權。已於去年末。承政府許與英國某公司開辦。此外如德美日本之經營。及意大利之要素租借港灣。無不相逼而來。政府既大度包容。有求必應。數年以後。中國之富源及一切交通機關。將全屬於外人之手矣。真割肉食虎之慈悲菩薩哉。

#### 日本對中國之企畫

去年末駐劄北京之日本內田公使歸國之際。日政府詢以中日交涉。當以何者為重大之問題。內田氏曰。支那之鐵路權盡入西人之掌握。日本若不急索福建鐵路。恐不能與歐洲列國爭競。支那交通各權。惟日本獨少。今日支那倚我甚重。若要索鐵路。必能如願將來敷設之時。福建全省作為幹路。其支路一由福建沿閩江入江西。經撫州南昌。以達九江。一由建寧經浦城入浙江。沿錢塘江而至杭州。一由福建泉州至廈門。連絡沿

海諸府。如此經營將來日本於支那南部。必能增進勢力云云。後聞此事由日本外務大臣。咨詢駐劄北京使館中之某參贊。並聞其參謀妥洽後。即當向中國外務部要求云。

#### 中州鐵路近聞

河南懷慶府至山西澤州之鐵路。已由福公司總辦哲美森君派工程師前往查勘。並聞春間當着手開辦。本年即可竣工。

#### 西陵鐵道工事

中國鐵路之敷設權概為外人所掌握。中西各報中。幾於無日不論及之。不謂近竟有不動聲色於咄嗟間成一完全主權之鐵軌者。斯亦僅矣。聞 兩宮因計謁 陵之便。自皇宮至西陵。新築一鐵道。近已告竣。所經過各鎮之線路。皆蓋造兵營。每處駐紮袁世凱部下之兵千五百名。以保護之。

#### 恢復海軍近聞

中國海軍自甲午戰爭以後。既已一蹶不振。前聞直督袁世凱計畫恢復北洋艦隊。其豫算第一期之造艦費。共千五百萬兩。近聞已經批准。並派出水師提督晏桂題使準備一切云。

#### 通商總查局之設立

聞直督袁世凱之計畫。將設立一通商總查局。以冀發達中國之商務。日前曾將其意見電商總督張之洞。茲揭其大要如下。一在北京設立一通商總查局。調查各通商口岸進出口貨之數量。與金額之比較。並講求獎

勵糾正之法。以期發達商務。(二)準備擴充海軍。以期保護對外貿易之事業。其經費。由沿海各省分担。並使增收煙酒各稅。(三)派遣貿易觀察官赴歐美日本各重要之通商口岸。考察彼此貿易之消長。物產需要之狀況。隨時詳細報告。以期增進貿易事業。(四)各省設立商業學堂。授實習之教育於從事商業者之子弟。

#### 商部消息

載振貝子條奏設立商部之摺。早經外務部與政務處請旨依議。後聞有某疆臣於召見時。曾面奏云。現既有商務大臣。不必更立專部。致多耗費。刻下商務無多。即由臣等兼辦足矣。故近日都中設立商部之議已寢。

#### 江西官立銀行之成立

江西省今回擬設官立銀行。資本金共八十萬兩。由江西布政司飭厘金局籌撥。其本店設立在南昌府。而九江、漢口、上海、鎮江、各處。亦皆分設支店。開民間之信用尚厚。故發行一千文之紙幣共百萬張。皆能視為現金。通行於市。

#### 償金問題之結果

中國政府。每年分解各國之賠償金。每當交付之期。各國故意高擡金磅之價。致暗中受虧甚巨。政府對此問題。曾屢討議。並懇求各國以後收受銀貨。不必轉轉折兌。致多折耗。聞美國政府首先允諾。而各國大相反對。此案由駐在北京之各國公使。已屢次會議不決。茲聞英國之提議。已允以十年為限。準以銀貨交兌償金。然各國之不能表同意者。尚難暫允此提議云。

#### 內河輪船之補助金

蘇申杭內河通行之日本大東輪船公司。已設立三四年。與之競爭者。向惟有寧商戴生昌一家。近年又添設數局。或定期開班。或每日航行。與大東公司齊驅並駕。然以數商之力。欲與大東爭勝。頗覺危險。查大東公司每年曾得彼國政府之補助金。故有時大減價格。欲摧折我國商人設立之局。以肆其壟斷之術。聞去年日政府曾發給其補助金共四萬七千餘元。此外有郵船會社之兩清輪船。每年共補助五萬元。均由遞信省給發。若遇事變之際。政府得使用其船員及其船舶云。

#### 蒙古王東游傳聞

蒙古喀喇沁王以振興蒙古。屏翰強俄為已任。實諸王中之矯矯者也。現在北京曾與各國之公使參贊相交。並聞擬中曆二月頃。由京出發。赴日本游歷。日政府聞此消息。以蒙古王出游海外。實屬翊舉。擬特別優待。以盡主禮。然外部各大臣。皆不能表同意云。

#### 美提督之諛辭

美提督馬依爾司前謁見皇太后時。太后頻稱其在斐列賓之戰功。馬提督亦稱贊太后之功。謂實能遠超英故女皇維多利亞之上云云。英人聞之。皆冷評其諛詞之過當。

#### 伊國無線電信之計畫

伊大利擬在北京大沽間。設置馬爾克尼之無線電信。已將其旨申請於北京外務部。

## 各省人口現在數

據戶部衙門最近之調查。各省及內外蒙古、滿洲、西藏、土耳其斯坦之現在人口數。列表如左。

省名	人口數
直隸	二〇、九三七、〇〇〇
山東	二八、二四七、〇〇〇
山西	一二、二〇〇、四五六
河南	三五、三一六、八二五
安徽	一三、九八〇、二三五
江西	二六、五三二、一二五
浙江	一一、五八〇、六九二
福建	二二、八七六、五四〇
湖北	三五、二八〇、六八五
湖南	二二、一六九、六七三
甘肅	一〇、三八五、三七六

陝西	八、四五〇、一八二
四川	六八、七二四、八九〇
廣東	三一、八六五、二五一
廣西	五、一四二、三三〇
貴州	七、六五〇、二八二
雲南	一二、七二一、五七〇
滿州	八、五〇〇、〇〇〇
蒙古	二、五八〇、〇〇〇
西藏	六、四三〇、〇〇〇
土耳其斯坦	一、二〇〇、〇〇〇
總計	四二六、四四七、三二五

## 俄國設置稅關之要求

俄國擬在達爾尼港設置稅關。屢向中國政府要求。英日兩國頗多抗議。於是政府決意謝絕俄人之要求。然駐劄北京之俄公使。謂英日居第三國之地位。於國際法上。實認為無抑制的効力。中國政府唯圖切己之利益。以解決之。不必因此而生顧慮。俄人又將該提案。嗾使盛京將軍增祺向政府斡旋。以圖償其所欲。並聞俄

八  
人提出該問題。向政府要求者。實不僅達爾尼一港。茲揭載其條目如下。(一)以增進清俄兩國之通商事業爲目的。清廷當認俄國在達爾尼、奉天、哈爾濱、哈勃爾加及張家口等處。設置稅關。(二)前記各關之稅關長。當任用俄人。(三)新稅關設置後。凡清國輸出入物品之稅率。當格外低廉。俾得特別之便宜。

#### 伊國之經營浙礦

伊大利人愛羅加巴氏。近借貸道泰公司資本金六百五十萬兩以經營浙江省温州、處州、嚴州、衢州各礦山之探掘事宜。

#### 德國經營膠州灣費

德國自佔據膠州灣後。旦夕經營。不遺餘力。茲聞該國政府預算千九百三年之經營費。計總額兵五千二百八十七萬馬克。內五千二百四十二萬馬克。由本國政府補給。其餘四十萬馬克。由殖民地收入之稅。以充補之。

#### 德國軍械之輸入

北京之議定書中。曾載以後不准以軍械輸入支那。各國當共守其約。近有德國商船裝載軍刀二千柄。密圖輸入中國。該船經過秦王島時。偶被查出。當即扣留。據言其輸入之原由。因支那現在之兵隊。皆掛帶新式軍刀。故擬暗中輸入。以求銷售云云。然聞該軍械實係袁世凱所定購。未知確否。現總稅務司赫德君。擬求政府之訓令。再行辦理。

#### 觀兵式之舉行

戊戌之秋。兩宮曾擬行幸天津。舉行陸軍觀兵式。旋因八月之變。事遂中止。聞本年二月中。皇太后及皇上將行幸西陵。其歸途中。在保定府附近。擬重舉陸軍觀兵式。並擬召集直隸、河南、山西、陝西諸省之新練兵。約二萬名。調赴該地合操。已派出袁世凱爲總指揮官。統率全軍。

#### 外國近事

##### 科命布之排斥日本人案

坎拿大政府。以英領科命布洲。對雇役日本人事。所制定之炭礦條例。移民法。及其他諸種法律。已申明其不表同意之旨。

##### 達的紐爾海峽事件

駐在君士但丁堡之英國大使。因去年九月間。有俄國水雷艇四艘。通過達的紐爾海峽。爲違背國際條約。向土耳其政府抗議。並要求土政府。此後英國之軍艦。於該海峽。當得同等之特權。澳意二國亦照會土政府。詰問俄艦通過該海峽之事。其餘各國尚未預聞其事。

##### 馬撒德尼牙之改革

據俄國維爾米半官報云。俄羅斯及澳大利兩國。要求馬撒德尼牙政府之改革。其意見已能一致。所提議之



改革案。(一)關於該國之各種租稅徵收。及官吏將校之俸給支給。使其迅速整理財政。(二)任命白耳義、荷蘭、及瑞西人爲將校。以監督其憲兵隊。

#### 德國海陸軍之預算

千九百三年之德國海陸軍預算表。已於本年一月發表。計增加海軍費千八百萬馬克。而減少陸軍費五百萬馬克。

#### 英國貿易之近狀

據英國商務院所發表千九百二年之貿易表。與前年相比較。計增加輸入稅七千萬磅。輸出稅三百五十萬磅。

#### 美國擴張海軍之提議

據華盛頓電。美國代議院之海軍委員。近又提議添造戰鬥艦三艘。巡洋艦一艘。此案業已決定通過。

#### 俄國對朝鮮之企圖

駐韓之俄國特命大使。近接本國政府之訓電。(一)運動韓政府派遣韓國皇太子赴聖彼得堡。訪問俄皇。(二)勸令韓政府聘用俄人阿爾克塞。爲韓皇之顧問長官。(三)要求韓國北方之電線建設權。使與俄國之電線相接連。

#### 朝鮮皇太子東游消息

駐韓之日本林公使。近亦勸令韓政府。乘日本大坂府博覽會開會之期。派遣皇太子游歷日本。聞韓政府以俄國大使運動在前。尙難決定。又聞韓太子如果游日本。必以加藤增雄氏爲隨行之顧問長官。

#### 檀島燒疫事件之結果

前年檀香山發生黑死病之際。美人以殘酷手段。燒燬中國及日本人之租界。其傷心慘目之狀。至不堪言喻。事後。由日本政府要求美政府賠償其居留民之財產損害金。茲聞是案於本年一月十九號。在下議院通過。而上議院亦早已承認。並無異議。遂將其旨。電達日本外務省。故旅居該島之日本人。不日即可收領其損害賠償金。惟中國人之被害者。既無本國政府之要求。又不能得公使領事之保護。故目觀日本人之收受金額。仍不免向隅云。

#### 俄國工業之衰敗

俄羅斯之南部。近頃於工業上大呈衰敗之象。一切炭礦、鐵礦、及製造諸工廠。悉行停工。勞働之失業者。皆陷於困窮之境。其最甚者。爲塞倫特市。貧民耗群成隊。搶劫富商大家之事。紛紛而起。而市街中之疾病及餓死者。亦充斥於道。其慘狀至不堪入目云。

#### 澳收重稅

澳大利政府。現擬將進口穀物及各種製造貨物。抽收重稅。以維持本國之貿易事業。若此案果擬決定實行。將來英美兩國之商務。必大有關碍也。

### 法國貴族稱號之廢止

法國上議院中。近提出貴族稱號廢止案。一時之表同意者。皆竭力運動。以期此案之決定。按法國廢止貴族之稱號。前已經過二回。一在千七百九十年時。禁止貴族之稱號。及千八百八年拿破侖第一。以皇子貴族之名。既已廢止。乃另設新貴族之稱號。後至千八百十四年。竟全復往時貴族之稱號。一在千八百四十八年。即革命初起之時。亦禁止用貴族之稱號。然至千八百五十二年時。拿破侖第三採用克德達之議。又恢復貴族之稱號。若今回之提議。果能決定通過。是為第三回之廢止法案也。

### 俄德交誼

德國皇太子此次游歷俄京。非常受俄國皇太后及諸皇族之歡迎。已將感喜之忱。電達維廉。帝並開德太子。尙擬巡訪伊大利、雅典、埃及及君士但丁堡各地。

### 法國社會黨之勢力

法國社會黨約翰爾氏。已被選為代議院之副議長。此事可證法國之社會黨。漸得占有勢力之地位。

### 土耳其宰相之辭職

土耳其宰相哈德巴西。屢建議整頓土耳其在歐洲一部之地方行政事宜。土帝始終不能採用其言。哈氏遂決意辭職。

### 美國廢除石炭輸入稅

數月來美國因石炭礦夫同盟罷工。致全國需用之石炭。非常缺乏。近日雖日夜採掘。猶有供給不足之患。伊利諾斯地方。有搬運石炭之運車。由此經過。竟被村民切奪。現在下議院決議。限一年間。免除石炭之輸入稅。使外國之石炭。踴躍輸入。以濟其困。

### 非洲東北部之鐵道開通式

法國政府近決定派遣海軍一隊。臨非洲東北部之基比吉爾。與哈拉爾間之鐵道開通式。又聞阿比西尼亞王曼納利克。亦擬親臨該鐵道之開通式。

### 德國增設東洋外交官

德國外務省所決定之豫算。擬在朝鮮設置公使。上海增設第二副領事。西貢增設領事館。漢口、廣東、南京、各地。皆築造領事館。並改新嘉坡之領事館。為總領事館。

### 英國增設外交官

英國外務省議定在俄領之海參威設置一貿易事務官。以期增進英國在該港之商務。

### 英墨移住條約之成立

英墨兩國商訂之移住條約。近已成立。凡屬英領事管轄之支那勞働者。亦得移住於墨西哥國內。

### 英俄於中央亞細亞之觀念

俄國維蘭米之半官報。近論英國派遣馬克麥少佐至撒斯敦（近波斯國境、阿富汗之領土）一事。謂波斯與

阿富汗之私爭。與英國毫不相涉。今英國公然出此舉動。俄人實不能開視之也。

#### 德國之豫算案

千九百三年德國之豫算案。近已發布。計募集公債二億二千萬馬克。使平均歲入歲出之款項。而其附屬之覺書中。有九千五百萬馬克。以備救濟聯邦財政之困難云。

#### 法國之豫算案

據法國豫算委員之報告。本年所募集公債四億四千萬法郎。實非必要之款項。因節減政費三千七百五十萬法郎。儘足為增加歲入費二千二百五十萬法郎之補助云。

#### 日本海軍區之改定

日本之海軍區。於本年重行改定。廢去室蘭海軍區。而盡全國之海岸海面。定為四海軍區。每區定一軍港。設鎮守府以統率之。茲揭其區畫如左。

#### 第一海軍區 橫須賀軍港

由羽後國陸奧國界起。沿本土東海岸。及南海岸。至紀伊國南牟婁東牟婁郡界之海岸海面。並北海道之海岸海面。

#### 第二海軍區 吳軍港

由紀伊國南牟婁郡界起。至長門國大津豐津郡界。又由筑前國遠賀宗像郡界。沿九州東海岸。至日向大

隅國界之海岸海面。及四國之海岸海面。與其內海。

#### 第三海軍區 佐世保軍港

由筑前國遠賀宗像郡界起。沿九州西海岸及南海岸。至日向大隅國界之海岸海面。及隱岐對馬。沖繩諸島之海岸海面。並臺灣澎湖列島之海岸海面。

#### 第四海軍區 舞鶴軍港

由長門國大津豐浦郡界起。沿本土西海岸至羽後陸奧國界之海岸海面。及隱岐佐渡之海岸海面。

#### 朝鮮冊立皇后之風傳

朝鮮京城內。近來喧傳宮中將冊立金毓嚴之女為皇后。若此計畫成立。宮中將大起波瀾。

#### 朝鮮新借款之運動

李溶納。李根澤。閔泳煥。近與白耳義國之領事。在索太科邸內相會。合協議借款之事。聞此會議之結果。白耳義領事尚未允洽。

#### 英國陸軍之評論

倫敦泰晤士報。近論英國之陸軍。謂後備兵僅在三萬以下。而陸軍之豫算。竟增加二千二百萬磅。其實陸軍之真相。實大非南阿戰爭以前之比。其結論又曰。今日英國之陸軍制度。不過假裝局面。以欺一般之納稅者而已。

## 華盛頓列國會議之變動

南美委內瑞拉之事件。列國既定在美京華盛頓公開會議。駐委美公使巴溫氏。即委國之代表者。抵美京後。已將解禁封鎖。爲正式談判先議條例之旨。通告列國使臣。而列國使臣。則以委內瑞拉不先提供實際之保護。決難解禁封鎖。各關係國方在交涉開始之際。不意德國之亞美利加艦隊。忽發砲向聖加爾砲臺猛擊。此事傳至華盛頓。各國之代表者。皆大驚。德國此次之輕舉妄動。實欲阻礙列國會議之進行。然據德國之艦隊司令官所發之電。則云委國砲臺。先發砲攻擊德之貢脫洛砲艦。故德艦還擊之。又聞聖加爾砲臺。已被砲彈炸裂云。

## 英國下院議員之處刑

英國加爾維州選出之下院議員靈基氏。於南阿戰爭之際。曾有暗中援助布鴉人之跡。近受大法官阿爾巴斯敦。陪席判事維爾斯。及惹奈洛氏之訊問。認爲有悖逆之行爲。已宣告其死刑。後聞格外寬減。科以終身懲役之罪。

## 法國騎兵隊之廢止

近法國議會中提出之陸軍豫算報告書。擬廢止騎兵隊。而改爲騎馬步兵隊。及自行車隊。此案能否實行。須俟陸軍省之洽議。

## 俄法在朝鮮之新運動

俄國特派大使烏愛巴。代理公使斯達因。日前同訪法國之駐俄公使佛郎西氏。並會同前朝鮮度支部大臣李容翊氏。協定各條件如下。(一)俄國代理公使與法國公使。當協力奏請韓皇。使復李容翊之舊職。(二)因補救韓國之財政。由俄清銀行貸一千盧布。雲南新基克德會社貸八百法郎。與韓國之度支部。(三)以西比利亞鐵道監督盧亨布爾(前法國公使館書記官)爲度支部之顧問官。

## 哈爾濱日人請設領事館

日本人之寄居哈爾濱。及該地附近之處。不下一千餘人。向歸牛庄日本領事兼轄。茲聞居留該處之日人。申請外務省設置領事館。或領事分館。但哈爾濱一地。雖名爲俄清銀行之借租。定則已歸俄政府之管理。既未置租界。又未公認外國人之居留。故日本外務省對設置領事館之請願。頗覺躊躇難決云。







雜錄

## 東報時論

滿洲開放議

錄日本滿洲民原作

滿洲滿洲。以爲祖宗龍興發祥之地。不容漢人雜居者。是清國康熙乾隆以還。歷朝之遺蹟也。然迨至後世。無論漢人即俄人韓人來而旅居。以營生計者。亦頗多。而清廷昇平日久。禁網疎濶。無復嚴禁之。則滿人外之住滿洲者。年衆一年。已我邦人小越某。嘗游滿洲。著白山黑水錄有言曰。山東一省人民移住滿洲者。大約一年一萬人。此皆以山東地瘠人稠。土毛之富。不足自養。而滿洲土壤肥沃。物產豐饒。大易爲生。以故民之移之也。輕扶老攜幼。在在成羣。久之。闢草萊。構家屋。竟爲子孫永住之計。彈春附近之地。清韓二國之界。而距今卅年。韓人越境潛至者。開墾土田。從事稼穡。不下數千人。清廷初不之知也。至光緒七年。吉林將軍銘安。命知府李金鑑。詰之于韓。韓國有司。深謝其罪。且陳其國土貧小。人民窮困事情。請大國務恩。特許暫時租借留居。而此種韓民至今尙盛。俄國夙與滿洲接界。清初以來。稱爲勦敵。乃今日氣運一變。一則益弱。一則益強。弱者每豪

削。盛。強。者。常。逞。侵。畧。滿。洲。全。部。幅。員。據。大。清。一。統。志。云。東。西。五。千。里。南。北。六。千。八。百。三。十。里。南。至。渤。海。及。黃。海。西。以。興。安。嶺。爲。界。東。抵。日。本。海。北。以。外。興。安。嶺。爲。界。抵。鄂。德。斯。克。海。即。今。俄。疆。烏。蘇。里。黑。龍。江。左。岸。皆。其。地。也。迨。有。道。光。咸。豐。內。外。之。患。前。而。予。以。俄。而。至。近。時。則。所。謂。東。清。鐵。路。遠。承。西。伯。利。鐵。路。而。橫。貫。滿。洲。以。達。大。連。營。口。旅。順。各。處。者。經營。積。年。其。功。始。成。而。哈。拉。賓。之。地。以。吉。林。省。第。一。之。平。野。沃。土。而。爲。俄。人。官。民。輻。輳。中。心。之。區。規。模。宏。壯。推。大。都。會。且。團。匪。騷。亂。以。來。俄。兵。始。大。入。滿。洲。則。俄。人。之。來。而。營。業。此。地。者。亦。益。甚。衆。也。今。清。俄。二。國。條。約。新。成。而。俄。兵。以。期。還。故。國。其。人。民。留。于。彼。者。清。廷。據。約。當。益。加。保。護。而。務。無。復。生。事。端。也。不。然。俄。人。之。強。悍。日。夜。窺。隙。者。豈。其。默。然。袖。手。而。止。哉。夫。以。如。此。之。事。情。而。處。如。此。之。時。勢。即。今。日。清。廷。者。其。於。滿。洲。也。祖。宗。之。遺。謨。不。容。他。人。雜。居。者。蓋。未。能。盡。墨。守。而。無。變。更。則。自。今。以。後。其。處。之。者。果。如。何。而。可。也。

吾。嘗。於。本。報。論。之。大。意。以。爲。今。天。下。者。列。國。均。衡。勢。力。之。時。也。俄。國。已。入。兵。於。滿。洲。今。又。聽。于。列。國。還。之。爲。清。國。者。宜。及。此。時。速。舉。滿。洲。而。開。放。門。戶。以。與。同。盟。列。國。共。策。其。開。發。之。業。也。不。然。清。國。而。一。朝。有。變。乎。俄。國。所。以。逼。清。必。將。益。急。而。列。國。所。以。求。清。亦。必。將。大。至。故。爲。清。國。計。者。其。於。滿。洲。彼。列。國。之。邦。交。休。戚。利。害。相。關。係。者。日。以。益。深。則。他。日。俄。人。之。計。亦。必。將。自。有。所。變。而。無。復。侵。略。之。患。也。蓋。吾。之。爲。清。廷。計。者。實。在。于。開。放。滿。洲。門。戶。而。大。縱。內。外。人。之。雜。居。營。業。其。間。也。且。此。一。滿。洲。而。開。放。門。戶。也。不。惟。清。廷。永。蒙。此。利。即。清。民。之。稱。漢。人。者。移。住。益。衆。韓。人。之。來。居。者。亦。必。益。盛。而。我。日。本。人。民。出。游。俄。疆。而。互。市。清。韓。二。國。者。又。必。將。逐。年。而。益。至。也。烏。稽。老。林。望。之。如。雲。千。里。無。際。皆。太。古。時。物。車。馬。橫。過。六。十。里。不。見。天。日。此。豈。非。當。年。吳。兆。壽。目。擊。之。語。乎。而。

其。漁。獵。也。於。牧。丹。沿。江。又。於。嫩。尼。江。無。數。大。魚。小。魚。不。可。勝。食。弓。矢。之。利。加。之。火。鎗。鳥。獸。棲。息。山。林。者。亦。不。可。勝。用。其。牧。畜。也。於。三。姓。白。楊。木。於。松。花。江。自。呼。蘭。北。廟。小。子。至。齊。齊。哈。爾。五。百。餘。里。廣。漠。草。野。可。以。飼。養。數。百。萬。頭。馬。興。安。嶺。西。西。海。拉。爾。之。地。古。產。良。馬。李。唐。未。造。契。丹。勃。興。實。賴。其。力。其。質。易。也。於。遼。河。于。營。口。船。舶。上。下。江。者。一。日。七。千。五。百。六。百。隻。營。口。一。年。外。國。商。船。出。入。大。約。英。國。三。百。三。十。六。日。本。二。百。二。十。四。德。意。志。一。百。八。其。他。俄。美。法。蘭。多。者。七。八。十。募。者。六。七。此。僅。據。我。明。治。三。十。一。年。清。國。光。緒。二。十。四。年。所。計。而。得。者。也。其。後。數。年。蓋。或。有。過。而。無。不。及。也。而。其。耕。耘。也。平。原。曠。野。目。不。見。山。岳。殆。無。際。涯。在。松。花。江。者。三。千。方。里。在。東。遼。河。者。四。千。方。里。在。遼。河。者。三。千。五。百。方。里。在。齊。齊。哈。爾。以。南。嫩。江。以。西。者。一。千。方。里。在。墨。爾。根。以。南。嫩。江。東。西。者。七。百。方。里。在。吉。林。門。土。者。五。百。方。里。在。牧。丹。江。及。寧。古。塔。附。近。者。五。百。方。里。此。皆。屬。其。已。墾。之。田。而。其。未。經。開。拓。者。又。不。知。其。幾。千。萬。里。也。

嗚。呼。天。府。沃。野。自。然。之。富。如。此。其。盛。而。其。人。民。則。僅。僅。少。數。家。味。野。蠻。樸。樸。狂。狂。如。此。其。陋。其。在。上。者。徒。徇。祖。宗。舊。訓。而。不。知。時。變。智。闇。力。弱。不。能。自。守。而。彼。強。隣。狡。焉。思。啓。日。夜。窺。隙。相。機。而。動。噫。是。奚。異。于。農。夫。至。愚。者。承。父。祖。美。田。舍。而。不。治。徒。付。荒。蕪。哉。既。不。以。利。人。又。不。以。自。利。終。之。經。界。墾。滅。隣。之。黠。者。乘。而。并。之。我。將。無。辭。以。抗。爭。者。也。有。國。家。而。長。民。人。者。不。當。用。此。愚。計。也。蓋。清。之。以。滿。洲。爲。別。天。地。而。奄。有。漢。土。食。漢。之。稅。役。漢。之。民。二。百。五。十。年。而。間。有。利。則。收。于。滿。人。有。害。則。歸。于。漢。人。漢。人。意。中。歎。然。者。久。矣。近。時。氣。運。之。變。歐。西。列。強。頻。來。侵。迫。漢。人。唱。變。法。自。強。者。往。往。有。論。其。內。地。開。放。縱。外。人。雜。居。以。爲。得。策。而。議。者。或。以。民。智。未。開。而。其。

機尙早也。今滿洲而爲開放。則其得失利害彼固可就而經驗之矣。是滿人以地率爲先導而漢人從其後也。滿漢人民安危相資。勢逸互代。又可以隨而融和。漢人平生之歉然以益統一國中人民之服從也。爲清廷者與其徒拘泥不變而招天下笑。侮孰若善融和人民內情而共防禦列國外患也。

案滿洲開放者何也。蓋明知俄人之欲得商業上利益而已。亦思所以染指之也。蓋明知滿洲爲大利之所。在不欲中國之閉之也。其篇中既不以利人。又不以自利云云。蓋幾乎「世界者文明種族所應有之口吻」矣。各節所言與「俄人之東亞新政策」一篇可以相發明。故錄之以資參攷焉。至其說之是否。與夫與我國民之關係奚若。則讀「新政策」可以知之矣。

### 世界政策

日本 渡邊國武著

Weltpolitik - Weltpolitik! 即吾人所謂世界政策者是。實德人慣用之新文字也。溯厥由來。萌芽于十九世紀之末。今則已蓬蓬勃勃。若朝暾之初升。若春花之怒放。踴躍風發。鼓翼飛揚。日進而未有艾焉。二十世紀者。實此怪物發達長成。光怪陸離而演其大活劇之時代也。

吾試釋其義。則其意味甚廣。其條理甚繁。或謂爲殖民政略。或謂爲貿易保護。或謂爲工業侵襲。或謂爲領土擴張。人人而異其解。率難下一完全無缺之定義。要之合此數者。臨機應變。奇正兼備。水陸並進。相機而運用之。合力而籌畫之。是實世界政策之精髓焉。

自十九世紀所開創者。若交通機關。若商工業。若海陸軍。若國際貿易等。之日發達而日進步也。縮萬國若比隣。登黃白于一堂。前此之風馬牛不相及者。今則利害日密接。影響日敏捷。關係日複雜。遂使世界各國。若同一大團之條約聯邦焉。若同一大區之商工業競爭場焉。其勢之來也。無有能脫其藩籬。超然逸出孤立而獨存者。凡立國于此時代者。不論其版圖之廣狹。人口之衆寡。軍兵之強弱。民間之貧富。其當爲根本之政策者。則斷不能不取世界政策也。蓋二十世紀者。實爲世界政略獨占之時代。舍此則無能立國者。

透觀世界之大勢。即順其大勢而運之籌之。熟按己國之地位境遇。即自其地位境遇而計之畫之。蓋能適應世界之大勢者。而後能造乘世界之大勢。以是求其道。則于世界政略庶幾矣。

立于世界一大活劇場。執國家一大活物。而把持之運轉之掀翻之簸弄之。以發展其國力。增進其幸福。潤步高視是實世界政略之本領也。吾人其無視此爲危言壯語也。若我帝國指日本不及今時而確立世界政策之基礎。規畫世界政策之方針。以開發展國力之端緒。則至本世紀之中葉。必感國力之微弱。自衛之無道。危機之來。可翹首而待。噫。其無趁起。因循。循左支右吾。以自失其機。而自戕其國哉。

是故欲確立世界政策之基礎。規畫世界政策之方針。則當先察國力發展之主力爲何物。以予所見。若欲立于二十世紀競爭劇烈之舞台。其國力發展之主力。則有三焉。曰商工業。曰海運業。曰殖民業。以外交政略伸張之疎通之。以海陸軍備發展之保護之。本末輕重不誤。其權衡是爲實行世界政策唯一無二之關鍵秘訣也。換國外務大臣哥敦司克氏嘗曰。六十七二世紀。爲宗教戰爭亂之時代。十八世紀。爲自由主義勝利之時。

代。十九世紀爲民族主義之時代。二十世紀則爲商工業界生存競爭之時代。氏所言者。雖過于簡畧。然以大體觀之。則誠可謂眼光如炬者矣。

十九世紀大事業中。若普魯士之再造德意志帝國。塞其尼亞之建設伊大利王國。日本之脫封建割據之陋制。而復古統一。皆距今三十年前事。而爲民族主義產物之重要者也。

德意志帝國當民族主義之告成功也。即一轉而注眼于二十世紀世界之大勢。而感世界政策之必要也。于是振興實業不遺餘力。廣立商工業學校。以課各殖民地之地理商況。語學并他種種之情勢。及其學生一旦卒業。而爲技師商人。則當未至其殖民地之前。而已熟通其言語。洞達其情勢。故常不藉土人之助。而能自樹其業。其製造業亦與英法之惟知製造上等品物。不顧外客之嗜好者有異。其用意專在投顧客之嗜好。應下等社會之需用。而製造廉價之物品。着着進步改良。大有壓倒英法市場之勢。至今德意志侵襲之聲。殆將遍于全歐矣。

德意志既以振興商工業爲政策。然商工業之發達。實首在交通之便利。于是極力獎勵造船航海之事業。當其帝國建設之始也。其商船僅百五十隻。今則增至三千三百九十隻。其噸數僅八萬二千噸。今則增至百三十四萬七千噸。其發達之盛況。可窺其一斑矣。又感海軍擴張及根據地之必要也。于是千八百九十八年通過其海運擴張案。而前後復占領膠州灣。拉特尼牛其尼各地。

以德意志之境域觀之。其一方則隣于怨深怒結之法奧二國。他一方則接于俄國。軍備之不可一日怠者。固

無待論。故其軍費之膨脹。爲世界各國冠。然其他方面。則常注目于二十世紀世界之大勢。知徒諱民族主義之難立國于今後也。于是機鋒一轉。獎勵其商工業。發達其海運業。勃興其殖民業。確立世界政策之基礎。規畫世界政策之方針者。莫不致其全力而實行之。軍備經濟。二不肯馳。其結果遂致富強。幾爲世界各國冠焉。至伊大利王國。其結果則有大相反者。世人動曰。伊大利加入三國同盟。過度擴張其軍備。致破壞財政之基礎。失墜國民之經濟。是蓋未能熟知伊大利者也。蓋伊大利之爲國也。形如長靴。其西北東接法郎西瑞士。奧大利匈牙利。其南則突入地中海。海岸防禦線達千九百三十八啓羅米突之長。外對各國。欲保獨立之地位。內對各府。欲消軋轢于無形。其擴張軍備。又何能已。所患者其一面則以擴張過高。而與國力民力不相應。他面則不能若德意志之能獎勵商工業。確立世界政策之基礎。以逞其遠圖大略。以備其二十世紀國際之競爭。卒致財源涸絕。民力凋殘。而陷于慘狀耳。今試一顧我帝國之現狀。自復古統一告成以來。者凡三十餘年。抑何其進步之遲遲也。蓋我國數千年來絕世界之交通。昧萬國之大勢。固難持此比德。然自民族主義告成後。能注眼大局。爲國家之大計者。未必無一二人。惟所憾者。故內務卿大久保利通。周遊歐美各國。後于世界之大勢。洞達而明曉焉。乃一洗其舊見。獎勵殖產之業。舉全力以建設國家發展之基礎。不幸斃于賊刃。後之繼其遺響者。遂寂寥而無聞焉。嗚呼。既往之事。喋喋何爲。我帝國苟能一轉其機鋒。確立世界政策之基礎。規畫世界政策之方針。奮力而實行之。則今固猶未晚也。不見夫美國乎。彼所傳來。不侵人尺寸土之們羅主義。今則一舉而併布哇。再舉而合非立賓矣。彼固非徒貪版圖之廣也。蓋豫知二十世紀世界商業之中心點在



太平洋及支那之沿岸而先造其根據地也不見夫英國乎彼數百年來所執之自由貿易主義今則一變而爲保護主義而豫審濶步世界奇策矣又不見夫俄羅斯乎排除財政之萬難而舉全力于西伯利亞之鐵道以開闢世界之新路發揮久藏之天產密接中俄之聯絡者亦不外欲發展斯老夫之雄力而已蓋二十世紀之大問題即國力發展之大問題也其勢之來大有一瀉千里之勢豈能復容東方英國之酣睡哉

余顧天下有識之士大聲疾呼振袂而起踴躍風發叱咤一世政府政黨實業家教育家咸當踴躍奮興以造一有人格之國家氣魄充實其總身熱血迸發其滿腔精神透徹其全軀脈絡貫通其五體專心一意以向此世界政策而導其活動之方針他若實業教育販路探究資本構成殖民保護海員養成航運事業設種種之方法手段而改良之擴張之則方能濶步于二十世紀之世界然余猶有進焉與世界政策無直接之關係者若法律若規則若官衙若吏員若繁文縟禮宜一切改良之省畧之以復其簡易素朴勤儉着實之美風是亦余深所希望者也

然按我國現時之政況則寔有不堪浩歎者所謂行政刷新其刷新者何在所謂財政整理其整理者何在所謂民業發達其發達者何在噫處此優勝劣敗之世界而猶欲以因循支吾塞其責者吾知將不旋踵而有亡國之憂矣吾爲此懼吾因退而草世界政策一篇以告天下有志有識之士

余草世界政策畢然猶有不能已于言者世界政策者主張國力之發展者也彼腐儒漢學者流以治平爲政之極致者常斥此爲冒險之政策不知國家者乃一大活物也夫太陽不昇則下不下則昇大陰不盈則缺不

缺則盈國力亦然不發展則縮少不縮少則發展斷不能同時而停止留滯于同一地位境遇者是實世界大勢上一大活機也此等無識之士見若井蛙不知世界大勢爲何物吾又何屑與辨雖然開我維新之宏議者若西鄉木戶大久保諸先輩其理想的開國進取大國是實與此世界政策名異而實同也我國當道之士其無趨起因循左支右吾以自誤哉

譯者曰吾譯世界政策竟不禁萬慮叢生百感交集其腦若錯其魂若失噫東方之老大帝國乎生焉息焉離焉嬉焉昧于勢暗于識重于奴隸根性夢豈猶演太古野蠻時代之劇焉而不知世界之舞台已開戰鬪已酣滅國之方法愈新生存之競爭愈烈勢若萬馬奔騰狂浪洶湧日迫日激日演日劇窮追捷趨而來焉而乃俯仰小天地中酣嬉自若吸其精血枯其膏肉使如機器待若牛馬冥然罔覺夷然若常是其去民族主義者不知其幾千萬里又何足以語世界政策雖然世界政策者民族之國家所用之政策也今日我之所遇皆民族的國家也不知外不足以語內吾譯世界政策吾愈感民族主義之必要蓋進化有階級焉故有發大願力而欲刷新國民之性質而一洗其腐風一掃其舊毒則未有能脫民族主義者民族主義乎民族主義乎現爾身于歐美大陸吐爾氣于白人之間何爲乎客我何爲乎客我民族奄奄大陸沉沉吾日馨香以禱祝爾之發達今長成兮

## 奇奇怪怪

本誌原章向无此門茲特添增專取學術或事業上之多趣味而有實益者以饜讀者焉

## 乞食新聞

乞丐而有新聞也。斯誠可爲新聞中之新聞矣。

西洋乞丐亦一種職業也。既有職業矣。因之有機關部焉。以謀其發達。以圖其進步。斯理之常。無足怪者。雖然以乞丐業而有進步而有發達。且以圖發達進步之故而發行新聞紙。則自有新聞以來所未有也。有之。自佛之巴黎起。

乞丐之新聞。皆乞丐自作之。其楊言曰。不涉政治。始不偏文學。乞丐作之。乞丐讀之。其特色一。則有一門曰『市況』。凡關於乞丐之經濟事業。皆逐一報道之。其價每部計中國四十文。

此新聞之經濟亦與尋常同。蓋依告白而立者也。歐美各新聞之得利皆由告白之多少以爲準其乞丐告白亦頗有味錄其一如下

## 雇人

海水浴場之附近地雇不具者一人用以乞食其人須無右手者凡合格者請至……惟須有推薦契且納若干之保證金

如此類每發行不下數十種準此則可知其乞食之情狀矣。有方法有條理皆甚精密皆各應其己之能力及嗜好而擇適宜之地以乞食焉。歐人之乞丐乃亦加人一等耶。

此新聞上凡富人之結婚日葬式日及誕生日命名日皆詳細無遺。一一報道之。乞食者案其日之次序可以

從事焉。

此新聞之目的。不僅在報道事實而已。又欲大謀乞食業之發達。有論說有隨筆。凡關於乞食之教育及乞食的終養及方法地位歷史等皆屬之。且有來函一門。凡雄于乞食界及希望乞食的名譽者各各揮其樸大之筆。風發雷厲吐氣焰焉。

吁。乞食而亦有求進步者。歐人真無事不求進步哉。

## 猿語研究談

有名之猿語研究者阿愛加納博士近頃自阿非利加歸。滯留于美國之費府。依其研究之結果。則猿語有根本語七。因此七語而變其調則又易別意。其基礎語如下表

意	日音	西音	譯音
食	フーウ	Whoo-w	呼
飲	チユーウキ	Ch-ew-y	欺又一維
危險或襲擊	イエック	I-eegk	衣愛克
友情或戀	ワーアー	Oo-ah	惡阿
可	ヌウア	Nevoh	奴阿
有物將來	チイイ	Ch-i	欺……

來此

ユーフウ

Yoo-hu

由……吼

博士以猿語研究故。往非洲者三次。于法領之根額叢林入者。蓋二年。居一鐵網箱中。與其周圍大小雜多之猿相習。乃以研究其語言云。

加納博士之猿語研究之思想。發于十四年前。其後三入非洲。與猿相交際。今始歸。至貴府之動物園。以其獨得之語。與所蓄之猿語。果哉。博士之妙音發。Wow-w 一聲而猿來食。Chew-y 一聲而猿來飲。Leeg-le Leeg-le 而猿驚皆變顏色。集于一隅。戰慄不已。嘻。奇矣。今將其猿語研究之歷史。述之以爲世之博學者勸焉。

余十五年前一日。偶至動物園。園中有獼猴。食則以一大盆飼之。余立其盆之旁。其旁又有小猿二。皆見獼有恐色。常若稍兵然。以伺獼之舉動。

余重留心察之。而覺有異。何以故。當獼之睡時。二猿皆發異聲。于是他猿皆安心。以嬉及嬉之起。則此二猿又發一聲。而他猿皆慌然。見驚色。一若屏息以待者。于是余始信猿必有語。而研究猿語之志。由是起焉。(未完)

### 解頤雜錄

盧騷自殺後。其民約之學說。漸流入陰界。枉死城中。羣情洶洶。勢將決裂。閻王大怒。欲入之地獄。有告閻王曰。是種火于烈柴矣。不如遣之同陽。爲乾淨也。閻王不得已。命返魂使者押之歸。且移檄各處。不准其再入陰界。君子曰。自由真不死哉。

吾國初呼墨西哥銀曰洋錢。繼呼本國之銀幣亦曰洋錢。且略之曰洋。鄉人某初入城購物。店夥告以需洋若

干。某不解。店夥釋之曰。洋猶言銀。某恍然曰。吾前不解學洋學。談洋務者。何以日多。原來爲此。

某甲貧而信佛。日誦佛號不置。然日益貧。頗含怨念。夜夢佛謂之曰。明日縣令過汝門。高呼其名。當得善報。甲醒。如所言。令大怒。笞之百。歸而愬于佛。且尤之。復夢佛謂之曰。一呼縣令。即還笞責。吾與縣令較。則孰尊。日呼吾名。毫不怒汝。我佛慈悲哉。

### 瑣談片片

開關以來無雨地。奈意盧河之下游。有二瀑布。其間地自開關以來未曾下雨。

世界最古之樹。墨西哥有檜樹一株。四圍百二十尺。已有六千年之長壽。次則亞非利加之婆捕蒲樹。亦有五千七百年。實可稱世界最古之樹也。

鯨壽。今日動物中最長壽者爲鯨。三百歲乃至四百歲之鯨。時有捕得者。欲判其年齡之長短。可視其骨之層數而定之。

蟻腦。蟻之腦髓若與其身體爲比例。則比各何種動物爲大。

軍用鳩。德意志軍隊飼養八千隻。遞信鳩。

鐵名刺。德意志克虜伯砲製造家克虜伯男爵常用極薄之鐵片。爲名刺。

富乞丐。巴里劇場附近有一乞兒。忽罹疾病。倒於地。巡捕使人擡至慈善病院。檢其身邊。乃有三十萬佛朗之銀行存摺。

郵票 世界現日發行郵票之種類約在一萬三千種以上。  
秤字天平 非賴圖西亞之造幣局有精密天平一種。持同重量之紙二張。使一張書數字。返置天平。則忽起不平云。

犬之飯館 米國紐約埠。有專備犬食之飯館。每日來食之犬不下數百頭。

魚之登樹 太平洋通賴泰蒲島邊有一種章魚。八足能以其足攀海邊之樹而上之。其目的在捕樹上之蟲。以爲食。人見之則自樹落通入海中。

中國輸出之頭髮 每年自中國輸出之頭髮。其價格約值九十萬圓。

一分時間世界之生死 統計一分時間世界之死亡數爲六十七人。世界之出產數爲七十人。一年之後。世界人數可增加百二十萬人。

世界之國語 依德意志學者所調查世界人口三分之一爲支那語。一億萬人爲印度語。八千九百萬人爲俄羅斯語。四千八百萬人爲西班牙語。

人間之衣服住處 世界人類之全體其中五億人着衣服。二億五千人裸體。七億人蔽其身體之一部分。而此五億人者。以家屋爲生活。七億人者以土穴。或小屋爲生活。此外二億五千人。則全不知有家屋。惟以肉體衝雨露犯霜雪而已。

種痘與結婚 瑞典諾威男女欲結婚者。兩造皆須持有已種痘之證明券。否則不許結婚。

男女之優劣 男女之優劣。因腦髓之消長而分。女子自三十歲後腦漸減其重量。若男子則雖四十歲後亦不減。以故女劣於男。

皮膚之氣孔 人身皮膚一英寸之間。有一千氣孔。使人體表面有十六平方英尺。則有氣孔二百三十餘萬。此氣孔善開通以維持康健。故身體不潔之有害。即此可見。

毆妻之刑 德意志毆妻之罰。最奇妙。亦最有効。其法自犯事之禮拜六。被捕入獄。至禮拜一放還。其下禮拜亦然。直至期滿而止。意蓋取其無事也。若禮拜一至禮拜六須作工以養妻。倘被捕是妻反爲所累矣。


女之天國 亞米利加洲亞比西尼亞國。其女子之權利比世界各國爲大。爲亞比西尼亞法律所認定。凡財產屋宇等皆爲妻所有。若良人侮辱其妻。不論何時。可放逐良人。倘良人悔罪而賠一母牛又半駱駝。(良人認爲與半駱駝同值)則妻許寬其罪。習以爲常。反之而妻侮辱良人。則爲妻應享之權利。且妻可以已之志意自由。由良人離緣。而良人則不能云。

佛蘭西之探偵 佛蘭西探偵之老練者。長於換形術。頗有可驚者。有一探偵與其友約此四日中必與爾遇四次。而必不使爾知爲我。若敗露。我將不爲探偵矣。乃於此四日中第一回扮作修鞋匠。第二回扮作推馬車者。第三回扮作老紳士。第四回扮作飯館中信官。皆與之說話。十分親熱。而總不能認其爲探偵。

俾斯麥之腦髓 據醫學博士賈麻所算定。其重量實超過歐洲一切天才家。約重六十五翁斯。又五分之四。比之寇皮愛六十五翁斯。又二分之一。擺倫六十三翁斯。又四分之一。康德五十八翁斯。西廬來盧五十七翁



斯又二分之一。皆過之。塞歐洲。近日所罕見也。歐人腦之平均重量。約在四十九翁斯以下。那破命之功名。一將成功萬骨枯。此唐人詩也。而今更有二百倍於此者。就佛蘭西之歷史而攷之。蓋那破命之功名。塞佛蘭西二百萬人之生命而購得者也。



軍事小說

## 少年軍

少年軍何爲而起哉。我同胞亦曾讀美國一斤南北戰爭之歷史乎。紀元千八百六十一年。卒以黑奴問題。啓南北戰爭之大劇。丁斯時也。戰雲慘淡。戰血淋漓中。而忽現一種不可描寫之光彩者。華華少年軍一隊是也。此篇乃當時南部兵學校之生徒。砲烟彈雨中之一少年之從軍日記耳。記少年軍之歷史。僅得其鳳毛麟角。雖然讀之令我之精神油然而然。飛舞不止也。乃述其口吻。以正告我同胞少年。

嗚呼。我少年其諦聽。其大聲喝采!!!喝采!!!

時惟千八百六十二年之秋。余年十有五。秋風瑟瑟。鬼氣嚶嚶。過威尼亞大學校。則石徑草深。鐵鍵鏽澀。入威廉中學校。則夕照如灰。校旂欲睡。咄余以前所見一隊擲龍擲虎之勇少年。而竟何往。而竟何往。嘻。而孰知其生徒。其教員。皆拋書卷。仗刀劍。

血飛骨躍。以跳入最活潑之戰。鬪盤渦裏。

余威尼亞兵學校之生徒也。余之同學。皆南美之華族之富豪之少年也。當戰爭之初。余之學校。亦曾有義勇軍一隊往。所謂「南黨之種子」是也。然往未數月。而戰況愈烈。告警之電日夜奔至。時也。諸港已經封鎖。輸運之途。既塞。餓糧乏而無濟。制服敵而無易。我同儕于四回砲彈聲裏。肅肅以行。習戰術也。

時戰傷之將校。養病歸來。尙扶病負痛。奮身當教授之任。爾時扶短仗。以授同儕數學者。折足之砲兵。士官確西玉也。揮空袖以示諸生。羅甸學淺者。斷腕之少佐。雷頓也。今日着血鎧。佩缺劍之畫豆英。踉蹌演說于講壇。明日創百孔。淚萬斛之麥獨那德。丁寧囑于教院。而于是一團熱血欲迸之少年。眼所經口所噉。腦所擊刺耳膜所轟動。除誓死!!!誓死!!!誓戰死以外。無他榮。無他願。無他希望。

戰酣矣。風潮急矣。一片雄壯劇烈之戰聲。日日咆哮于我儕之四顧。而短氣南部。偏以戰爭凶耗外。無他報告。弔故友之淚未乾。告敗軍之警又臻。無幾而平生最親最愛之校長。祈約聖忽爲諸少年揮淚昇來。以入彼生前最希望最敬重之校門。而同

儕木立階下。彷彿見彼無聲之唇溢出不言之教誨。長者呼之而不應。而經此一番無聲之演說。所簸蕩所衝擊所驅遣。而我一校之少年。盡化英雄飛去。

斯時南部之戰。鬪加。僅剩弱兵疲馬一組。日日受敵人之摧折不已。氣不得不沮。勢不得不潰。而十餘州中。有一點戰心勃勃如燃如沸者。僅一巢之雛鷹。其翼躍躍。僅一穴之乳虎。其聲嗚嗚。少年軍哉。少年軍哉。積一身之雄心奇憤。忍之無可忍。鬱之無可鬱。時維千八百六十四年。我所愛殺敬殺之一隊少年。乃忙忙碌碌。星夜致書郵于父母保證人。乞返校從軍之令。

擊鼓冬冬。不情之天地。又送春至。練兵場細草青青。其如烟兮。遠岫朝露依依。其如醉兮。東家西村。飛香競妍之薔薇。較英雄之血。其尤紅兮。時則五月初十日晚也。咳。今日又暮矣。無聊之太陽。又沉沉入山。去黃昏一渡。刁斗聲寒。好夢初濃。人聲靜寂。而忽然一聲怪喊。直達耳畔。愕然驚覺。惟聞招集之喇叭亂調。不已。燈火燦爛。足音雜沓。急整裝赴操場。矐矐之眼。唯見行伍肅肅。人聲寥寂。副長官持軍書悲壯誦曰。諸君諸君。敵人之侵入宗土。僅咫尺矣。我同生共死之同胞。實逼處此。悲夫。蒙大

辱以生者毋寧死。今日我南部數十州祖宗汗血之遺，唯各人一絲一毫自擔任之。今以晨五時組成步兵隊一、砲兵隊一，各携餽糧，由斯丹頓前進。

余當時之心臟，余當時之情形，雖數千百之詞章家不足以形容之。余又喜余又驚余之心如波之湧，忽上忽下，余之顏如潮之流，忽冷忽熱，余不自知其何以然。余不自知其何以然。副長官一番和淚和血之宣告畢，忽裂帛一聲，同出于口曰：男兒!!!男兒願爲祖國有所盡。于是肩外套腰裏糧一衣一劍，長揖校門而去。

十二日一隊少年軍，乃經過斯丹頓女學校。諸女子皆全學之舊友也，乃出而祝之曰：「諸君此去其鑒戰喋血，果本分也。雖然甘死不如義死，義死不如視死如歸。諸君乎其擎旂而歸來，否則乘楫而歸來。」當紅粉青年多情叮囑依依不捨時，而忽一拖泥帶水支離憔悴之騎兵倉卒奔至，以乞援軍。急詢之，知北軍大將西偉已率悍卒數隊直逼南軍之屯，兵僅離十里。于是珍重一聲，皆執轡而起。時日色已蒼蒼矣。

未幾遂露陣以待敵。爾時夜色如墨，熱腸如火，全隊肅肅笑語聲沈立天幕之外，翹

首遠望，惟見火光點點明滅，各處嘻是我之哨兵也。而北軍則已挾我軍三倍之勢以臨于前。至半途而進發之號令下，我儕遂肅然以待行。時則蒲婁斯頓佐官仰天跪禱曰：「皇天祐我少年。」斯時同儕耳膜中忽貫一種可哀可敬之聲，而心中目中腦中乃不知有家鄉，不知有父母，不知有生死勝敗，而僅張其且裂之眼，嚙其既破之唇，以伺敵。未小時戰鼓震戰旗揚，而一聲前進之號令下。

未幾而日出矣。少年軍復露餐而待戰，歡呼高唱，儼若尋常。有滑稽者持指剪向吾儕曰：「爲諸君剪去黃毛，免得夢中向保姆呼乳也。」且問曰：諸君戰死，果何以爲葬儀？願敵人爲我紼，綴敵人之土地爲我棺槨，敵人之國門爲我鐫紀念碑。于是羣頤盡解。未幾進擊之號令復下。前軍呼，後軍應。忽途遇首將勃克林，齊從傳令士官脫兜帽爲禮。諸軍士歡聲雷動，答之。移時人馬之影恍如電過，回首舊途，丘林疏處馬首角立者，其我哨兵也。烟霧迷離，餘燼未滅者，其我昨宿所燃之篝火也。已而途窮，忽左向之號令下。嗚呼，道路一轉，而如狼如虎，鋒利不得迫之敵軍已逼我眼下。遙望黃沙莽々，南向則擊我左翼之敵軍步兵在也，東向森林叢薄外，制我右翼之



敵軍騎兵在也。而制我之表面者。則敵人數十尊之巨砲。映碧草而光愈白。氣愈寒。其咄咄逼人畏也。嗚呼。號令一聲。而大砲小銃之聲已直接于耳。

時則以屠龍搏虎神鬼不可測之技倆。遣僕盧頓一隊以對敵人之左翼。由確盧一隊以擊敵人之右翼。復以六十二聯隊短兵相接。以制敵人之肘。以三少年司輜重隊。以余爲番兵伍長。時也余頗懊喪不已。何以故。蓋余昔曾以從軍志願。強請于父。父曾嗤我爲乳臭兒。臨陣必蜩縮鼠。瑟余大惱之。然今日苟徒奉此不動尊一矢不發。歸則我父將嘲笑我。我何忍。我何忍。我乃以那破崙苦戰埃及指金字塔勳三軍之意。演說于輜重車上曰。

諸君敵據于我前。果同儕所戰競者也。雖然吾謂吾儕所怨者不在我。之前而在我之背。今既乘輿而來。苟昂藏七尺軀。不與敵人一相接。吾歸去。吾同胞將以嘲笑之。矢射殺我彈丸之死。易名譽之死。不可忍。余擬率我三軍。矯令赴敵。有畏死不前者聽。

是時惟聞贊成一聲。同儕拋器具脫行囊。執輕輕之快鎗。矯然鵠立以待進擊之令。

于是委輜重車以囑數下士。既大隊前進之號令下。戰旗搖處。少年軍兔起。鵠落以逍遙于颶風暴雨不情爆裂丸之場裏。時同儕曰「冷然善也。何僥倖得此清涼。以令我奔走國事之熱汗焦勞。國事之熱血其消去收去。」言未畢。忽崩天烈地。敵軍巨彈一丸直擊少年軍之腦蓋。余馬遂蹶。余身遂墮。倒臥于一鮮血塗附唇如煦沫之魚。微動之一士官希盧之側。惟怒目眈眈。見少年軍突飛猛進而已。移時爲赤十字軍拾去。當此時也。我少年軍已前進約三百碼。變戰線爲凹形。敵人之左右翼皆爲擊散。惟一旅極困難。極艱險之中軍。死戰二小時。始僥倖以一彈中敵大將之右腕。于是敵北負。少年軍乃奪其巨砲二尊。其敵兵百。嗚呼。此乃少年軍積無數之苦楚。拋無數之淚血。購來第一次吐氣時也。

然以少年軍偶然之小勝。遂惹敵人不可思議之羞怒。時也苦戰初罷。喘息未定。征塵未拂。忽敵人討戰之怒鼓急捷而不已。於是少年軍不得不亡命前趨而響應。奈何未及敵軍二百碼。而倏忽四尊猛烈之大砲。同聲一聲。傷哉。一隊少年軍。直接彈丸之表面。而如何遁。而如何避。而士官克蒲斃。柯洛克薦倒。謝郁斯倒。馬科讀哀盧。



倒。而可憐。背直裂。淚橫流。之老將。急急臥射之號令下。而少年軍如弱草驚風。直臥于肝腦塗附之黃土上。斯時。惟大膽不敵之少年。衣維安治者。緊握戰旗。血眼睨敵。人直立而不怖。

時少年軍中之一部分。偶形退色。士官俾齊尼忿然執快鎗叱咤曰。『有敢走者。我先射之。』佐官蒲婁斯頓微笑慰之曰。『諸君生同族。死同方。快樂無過于是。』且挺身爲之前驅。于是一隊烈烈轟轟之少年。乃狂吼一聲。以直奔敵軍之中堅。而敵乃大潰。而衣維安治遂挾旗先登。奪敵人之砲臺。一時也陰雲初破。紅日西沉。一片胭脂。輕染戰旗。于硝烟迷漫。凱歌宏亮中。重點少年軍于二百二十五人中。已折其五十六人矣。

嗚呼。此一日果我少年軍戰勝快樂之日。實我少年軍極悲痛之日也。時既刁斗以招殘軍。搜至麥田。復見死骸三。其唇灰紅。齒潔白。血眼四迸。隻拳緊握。枯草而不釋者是威尼亞校中優等學生克勃盧也。行復數武。則年末十六之懦柯獨由兒在。沈沈酣醉。其可愛之顏色。映夕陽而愈紅。惟其雙手張戰衣。臂前流血未乾。宛有剖卻。

心肝。令示人之意焉。至一森林處。復見一息尚存之撻納篤。睜腥紅之淚眼。發如絲之哀聲。叫。『我友致意父母男兒當爲言。』未終而氣已絕。丁斯時也。暮靄茫茫。弓月灣灣。余立此無聲之野。余對此無聲之友。余忽思及當時在校之時。余忽思及數週前。長揖校門之時。余忽思及當時同游獵。同演習。同嬉戲之時。余忽思及戰之前夜。故友持火以視我之時。余忽思及今日午前于輜重隊之旁。與故人相別之時。嗚呼。歲月如馳。人天揮手。自戰事至今二十餘年矣。然當日黃昏之淚。迄于今猶沾我襟也。

圍已解。軍旣旋。而同儕乃大宴會于雄鬼暇暇。篝火沉沉之腥血圈子裏。時北軍降人曾私語曰。『何處小魔兒。白旂豎處。竟令乃公手足箝制而無所措。』蓋白旂者。我少年隊之軍旂也。此旂之制。敵人目劇矣。時北軍每嘖嘖曰。『當衝不願迎白旂。臨陣不幸逢小兒。』嗚呼。余等一隊。警齡好丈夫。狠貪狠吼之敵人。果作如是觀。果作如是觀。

翌日少年軍乃奏凱而東旋。達利西孟篤而父母。而諸兄伯姊。而同胞國民。開一歡。

迎會州人。蟻集于郊。幾如墻堵。無老無幼。無野無市。均欲一拂我少年軍之征塵。一執少年軍之敝轡。以爲榮。以爲快。以爲娛樂。而我一隊少年軍。祇慚愧一聲。而逕去。嗚呼。當龍跳虎蹲戰爭之時。同儕皆翩翩絕世少年也。自近頃以來。有夜臺長睡者。有風塵奔走者。其大半則皆霜髮斑斑垂二毛矣。光陰荏苒。滄桑盡易。惟余學校之校旗。仍飄飄于夕陽影裏。迄于今。未有異而少年軍三字。則刻入世界上。不雕之木之腦影中。迄于今。未曾忘。

譯者乃曰。夫美。世所謂好平和之國民也。而其樂戰。乃若是。吾于是。不解吾中國人之性質也。彼死於水火。死於盜賊。死於疫癘。而不畏。而一言戰。則皆搖首喪氣。以思走。何以故。曰畏戰。死。惟畏戰。死。於是甲午之役。死者數十萬。庚子之役。死者數十萬。嗚呼。吾中國人。其果畏死耶。則吾舉世界列國之死亡者。而比例之多。莫吾中國若也。舉歷史上之破壞事業。而比例之多。莫我中國若也。昊天不弔。降喪下民。自有歷史以來。未有如中國民族之慘者也。然其習於死也。如此。而畏死也。又如彼。于是吾敢斷斷曰。惟愛平和。乃戰爭死。惟畏戰死。乃喪其父若母。若家室妻子。若國。 (完)



偵探小說

## 專制虎

專制虎一篇。俄羅斯虛無黨一段極英雄短氣之公案也。俄廷既以較毒蛇猛虎更狠之苛政。應酬國民。且有一羣猙獰靈警之偵探。爲餓虎作俚。水母增目。雖民間風吹草動。無可逃其耳目。然而虛無黨則以斷頭吸血爲滋味。以西比利亞配地爲極樂世界。日日以爆裂丸討政府之應酬不止。間有小挫。却增彼一番秘密舉動之智識手段。前仆後起。至今日出沒宮廷。蔓延朝野。吁。可謂雄矣。此篇所譯亦虛無黨中一段公案也。探者奇。虛無黨之手段更奇。蓋有咄咄逼人。之氣焉。

吾輩雖未曾遊英京倫敦。而設之于理想界。覺其莊嚴華麗極撩亂我眼花也。其哈德公園過數武。則俄伯爵阿蘭克之私邸在焉。伯爵旅于英。三閱寒暑。奢靡晏逸。人

人僅知其爲逐逐于勢利場中人。惟好客如命。且熱心于慈善事。此亦不過富家翁之故智也。夫人早逝。僅遺二女。伯爵視之。不啻掌中珠。其一切家事。有從一僕人口中呼出。爲愛聖夫人者。掌之。夫人英國產也。年僅三十許。氣宇軒昂。學問淵博。兼通數國語言文字。尤好談政治。名人巨子。日夕顧從者踵相接。監督伯爵家事如全權大臣。然夫人待人最溫良。惟有二奇癖。一則梳洗時。必獨處于幽暗無光之斗室中。雖伯爵之女公子偶闖入之。且呵責也。次之爲好旅行。然未示人以方。苦詢之。則呵責如前。

流年似水。忽忽旅況。又度一春。時適英正月杪。爲俄元旦。伯爵大開宴會。祝賀新年。俄國習俗。屠蘇一酌。爲極鄭重之禮。伯爵不得不依樣葫蘆。勉強從俗。然而天不做美。偏送一陣冷雪。爲伯爵祝品來。是日倫敦城變作白銀世界。且滴水成冰。行人裹足。此時雖伯爵具有倒屣迎門之雅意。恐不免夜半虛席矣。不料黃昏初渡。車水馬龍。來賓如織。不但倫敦一處。竟有自法蘭西德意志瑞士計。日趕到者。是日蒞席者計九百七十四人。古人云富潤屋。德潤身。幸伯爵之私邸。雖再增來賓數倍。尙可

容膝。是時賓主寒暄數語。遂整齊赴宴。直至十二時酒闌燈盡。賓主次第離席。伯爵復邀賓朋進一所重階洋房。蓋俄元旦。必盡宗教上儀式。此室備爲跳舞唱歌之用。故平日踪跡罕至。且離食堂約得半里距離。來賓既魚貫入內。但見點着十二盞紅薔薇罩電燈。銀光瀉地。逼人眉宇。四面雕窗。恰用天鵝絨遮住。左側凹形耳房。安置幾許薄記。不過標着聖書名詞而已。此室雖屬尋常祝賀之用。而門戶機關。甚精巧。且重重用紅革釘就。關閉無聲。故處此室內。幾如別有洞天。此時賓主歌頌既畢。伯爵復掌一冊薄記。支吾誦讀。賓主紛紛聚訟。既而晨鷄高唱。而來賓遂絡繹辭去。雖然。此日之盛會。來賓紛集。而除俄人外。竟不得一人焉。咄咄怪事。

賓主星散之後。二十分。伯爵重至密室。忽眼光一閃。恍惚有人影自凹形耳房倏然遁出。四遍踪跡。恰鷄犬不驚。草毛不動。人耶魅耶。梁上君子耶。咄咄怪事。

伯爵自慰之以眼眩。乃寢其事。千復兩週。適倫敦之音樂會盛舉。伯爵乃挾其二女以偕往。晨妝初竟。次女納他烈戴白羽之春冠。曳文華之長裾。面覆鵝紗。腰競蜂支。時適繞螺旋之樓梯。娉婷下轉。忽覺一種不可思議之物。劈頭淋下。恰踏踢得納



他烈錦繡一團變作雨淋的乳鳴一般。咄咄怪事。

納他烈絕叫一聲。合邸家人急急奔至。原來是一從新年會前二禮拜進來之新僕人。提着紫金乳酥壺而樓梯下轉。偶一失足。不情之乳酥壺遂直敬納他烈一身。而此嬌生慣養素未一經委曲之千金。乃怒火烈焚直奔乃父伯爵前。而此僕人則尚執空壺木立于樓梯上。齒欲噤而不能淚滿眶其欲流。顏色其青而黃而紫。雖欲直呼愛聖夫人大慈大悲救苦救難而不敢。

而此時愛聖夫人見可憐可恨之情狀。幸而夫人是文明人。且英國無野蠻法律也。直痛斥一番。限十分鐘內將僕人驅逐而已。然此僕人偏戀戀不忍去。奈何覆水難收。乃對夫人重重施禮。含淚說一聲。偶得報恩。雖啣環結草。生死不忘。

此時納他烈怒容已息。又經夫人好言撫慰。于是重整靚妝與伯爵攜手同車竟去。過數日忽夫人旅行雅興又發。遂將家政囑托伯爵長女克德雅。至次日晚六時遂乘上等涼車向毒惟進發。原來毒惟臨海對岸是法國境界。所以英人到歐洲大陸恰以此地爲咽喉。是日苦雨連綿烈風飄忽。途中泥水儼如墨汁。旅客幾稀時忽來

一男子。穿着重裘。帶一頂虎皮獵帽。狗頭鼠眼。向旅客一一注視而尤經心于愛聖夫人。已而車走雷聲倏忽已抵毒惟。夫人復乘船向法國逕去。直抵海岸復購善泰維車票前進。善泰維原爲瑞士名勝。在歐洲推爲第一。夫人上車時始見此鬼鬼祟祟之男子。乃踉蹌喪氣去。

夫人既安抵瑞士未數日。而極驚神駭鬼崩天烈地之一大謠傳至。謠傳于何起。起于最繁華最森嚴幽靈不得入之俄皇冬宮。嗚呼俄皇宮廷之日夜戒嚴。無待余嘖嘖也。俄皇膳貴戚先嘗之以備毒也。俄皇行侍衛環行之。以備刺也。俄皇之休息室。則憲兵巡查。晝夜拱立。而目不動。足不敢遺。以備爆裂丸之飛空直入也。然而虛無黨偏渾俄廷人物一爐而鑄之。而爲皇先嘗食之貴戚中。有虛無黨在。爲皇環行之侍衛中。有虛無黨在。爲皇守備休息室之憲兵巡查中。有虛無黨在。其真爲王黨者實庸庸碌碌惟有戒虞外。無他能也。當時侍衛長維拉伏克大佐。曾供職三月遂易其華華美少年爲白頭翁。噫若是其劇也。

先是俄國有大偵探名米加野者。已退老山林。時忽得維拉伏克一急電招之至。彼



莫知云何也。急赴宮至維拉伏克密室。見其倚電信箱而木立。若經大駭出神者。及近其身。猶不之覺。直呼之始醒。無他言。惟握偵探之手急呼奈何。奈何。細詢彼。則云昨夜俄皇所居之寢室傍。忽有一平日最忠信篤實之衛士。名維拉其未者。私繪周圍地圖。爲一暗查所見。捕之。彼即片裂地圖而盡吞之。至今不過十一點鐘。然已用炮烙刑拷問者三矣。且彼已若口噤。卒未曾發一言。臨刑時亦未曾呼痛也。偵探曰。彼究何人哉。維拉伏克曰。噫。其虛無黨也。偵探曰。然現其人何在。曰。在獄。曰。將何處之。曰。以死刑。然不知其繪圖何意。必得其踪跡也。偵探曰。是無益矣。曰。何故。曰。必不供矣。閣下不知虛無黨之宗旨。耶。彼以爲事成。則全體之益。事敗。僅一人之禍耳。閣下曾見虛無黨事。除偵探得知外。有曾口供一次者乎。維拉伏克曰。然則奈何。偵探曰。釋之。復其原職。維拉伏克憤然作色曰。咄。汝嚙語耶。偵探曰。何敢。夫死者無言。而生者長喋喋也。閣下果能釋之。區區之事。余極力擔任。維拉伏克曰。釋之。殊非異事。偵探曰。今上既依閣下爲性。也乞敕令一通何難。維拉伏克始領悟。于是偵探未出宮門而敕維拉其未復原職之詔下矣。雖然。此事乃旅居英國之俄伯爵新年

會前一月事也。

繼拉其未何人也。不言而喻。知其爲虛無黨也。彼既蒙玆天驚石破不可思議之解脫。而心愈駭。而腦囊中一種疑團。愈不可消却。雖然。不得不強爲歡笑。以訪彼平生所眷愛之情婦。時則大偵探米加野尾其後也。怪哉大偵探於此時遂拾繼拉其未而日日踪跡其情婦。日者其情婦偶途遇一名倍蘭德夫人。握手寒暄。而大偵探不覺眉飛目舞。自語鐵案。鐵案而去。元來倍德蘭夫人爲流西比利亞某貴族虛無黨魁之妻。今日祕密議會之長也。於是大偵探遂伏眼線于其家。而其繪地圖埋爆藥之隱情乃得。

(未完)

道力戰萬類敵

茫課其功

不能勝寸心安

能勝蒼穹

# 新浙江與舊浙江



## 浙聲

讀史乘十萬卷。羅上下。亘古今。數五大洲百十國之興衰成廢。綱舉而目張之。慷慨雄談。津津然不以爲厭。橫坤輿圖。七萬二千里。指摘其形勝。批卻導窺。數其物產。窮其沿革。畢然見文明之輸灌。而于彼族之通人學子。識其里居。憶其姓氏。每于空山閉門。風雨入戶。慨然有起古人于九京之想。撫卷而嗚咽之於乎。斯亦可與入儒林之選而。無媿色矣。雖然我嘗與之游里井之間。經兒時釣游之地。徒步出郭。迷不知返。盲然不知里居之所向。而叩以一鄉之習慣人情之所趨。鄉先生之生平。與夫大兵革大水。火下至村農佃老一家瑣屑爲載。籍所不詳。志乘所不錄者。瞠目結舌。噤不能出一語。反不若婦女傭役。據故老所言。寒夜絮語爲通人所忌諱。而屏爲不經之談者。足以激發鄉情。動人憤臆於乎。通人通人。非不枵然大也。我爲其無用。

而培之。

我浙人也。數典忘祖。則吾豈敢。今之言強中國者。亦多矣。通都大邑。不少讀書名士。與之言中國之興亡。愀然作色。奮几抵地。怒目裂髮。悍然以中國鬼雄自許。搏髀而呼曰。強中國。強中國。下至鄉曲。縉紳。浮薄少年。奇衣翩遷。執一二書報。往來于名流社會。从人之后。拾唾餘而不恥。譁然相逐曰。強中國。強中國。甚至大球虎狼。一方島國。假名友邦。藉口同種。不惜出其政策。網羅而魚肉之。講壇儼然。以服从爲先導。而猶囂囂然揭其主義。以示人曰。是教育也。吾代謀之。吾亦以強中國爲望者也。夫中國之範圍亦大矣。強之之言。要非名流浪子所得假爲口實。而更不容他人有所參議。于其間。抑更以中國內容言之。家異教。人殊業。百里之內。語言不同。南北之間。風尚互異。而其種種社會。又各有其特別之性質。保守之習俗。雖以極奸雄之手段。不能合海內而一之。然自秦漢以來。戴首一尊之下者。垂二千年。此中國所以爲今日之中國也。雖然大勢所趨。萬夫辟易。今者又民族主義大潮流橫決之一日矣。此浙江潮之所以作也。

雖然我又思之。奇突不平之士。憤然于公德之腐敗。痛大羣之不可合。讀意大利歷史。血淚欲枯。不得已而發聯邦之思想。庶幾各君其土。各公其奴之一境矣。然我又悲其無此一日也。夫將發也簡。其終也鉅。此天下事之公例也。涓涓細泉。潰爲江河。吾恐數年數十年後。必有其互相搏噬。互相芟夷。元黃血戰。殺人滿萬之慘境。當周之季。七國相軋。秦祖龍乃起而吞之。雅典斯巴達諸族相併。而亞力山大乃攘而臣之。於乎。此亦談分治者所無可如何者矣。雖然。分治者又今日萬事萬物起點之一途也。時勢英雄我非其選。我亦揮一掬淚于風雲萬里。洶洶涌涌之浙江潮而已。浙江潮之名譽。振動于古。歷史者自伍員始。鴟夷一怒。發爲雄聲。千載下道其事者。猶鬚眉怒張。風動四坐。以此負浙江之特色。雖然。俚說荒唐。王仲任之言辨矣。我又不滿于浙江潮者。一事。南宋之季。趙氏以孤兒寡婦。受元人之凌奪。孤城垂沒。元人聚兵于江干者以萬數。城中老弱以爲敵人必死于此地矣。而潮汐不至者三日。中原竟以陸沉於乎。潮而有靈。汚我浙江也亦久矣。何稱爲雖然無稽之言。縉紳不道。今者要爲江湖革命之一日。而我浙東西之少年之奇士之學潮之思潮之文潮爲

事業大潮流之先河者。風激水湧。拔大空而特起。雄哉浙江潮。自今而後始發現于世界。

我嘗屏居一羣之外。獨抒臂臆。感觸無時。攬中原之大勢。狂呼霸徒四顧蒼茫。人無應者。既而思曰。我浙江有獨立之社會。三而浙東西之文學。不與焉。一商社會。首數寧波。舉吾浙之解事小兒。無不知甯人以商雄于中國者矣。雖然。我又放觀其一群之外。以爲甯人之商業精神。猶可畏。吾浙江十一府之通都名會。其絕大之商場之勢力。圈孰非甯人執其牛耳。而寧波一邑。富家至數百萬者。不少概見。況以數十年前。風氣未開之日。甯人之挾重貨。走海外者。動數百萬人。而其足跡所經之地。必有一非常固結不可解之團體。而海上會館一事。旬日之間。蒼頭走卒。莫不奮臂與法人死抗。至血肉狼藉而不悔。是亦甯人之大特色矣。夫泰西文明國二百年來。以商業爲世界問題者。夫既人知其說矣。而彼族之大官通人。縉紳碩士。不惜著爲學說。伸其權力。揮張而揚厲之。以商業自由爲當時倡。於乎彼族之以商力陶鑄全球者。非無故也。我甯人何恃乎。以云國力。則魚肉無時驅之。惟恐不暇。而一一讀書之士。與夫巨室大老。又鄙之爲市儈。薄之爲商賈。不屑與之通一語。或有一二自海外挾

貲歸鄉里者。則親戚交游。百端以身家口腹累之。而公論不以爲非。於乎。此不能不歸咎于中國之積習矣。然甯人獨能百折不回。視重洋爲戶庭。逞其冒險進取之心。走異國不稍退。於乎。此豈甯人種性之特別與。雖然。富而無教。識者羞稱。我又不禁爲甯人悲矣。吾嘗獨海乘舶東渡。太平洋接甯商之一部。則其衣冠如故。搖尾曳長裾。見華人之易服飾者。動色嗤笑之。於乎。其毒根雖種。自向來之習慣。與先前數年之學說。然亦獨立性之不可磨滅者歟。此其一。

一、工社會。浙江非以工名者也。而居然有大工場。若隱若現。若塞若通。掩躍于大江以東者。温州是已。百產之盛。物價之平。去浙西殆倍蓰。而其民之質樸不彫。耐勞苦。忍饑寒者。又非浙西大郡以浮靡相扇者所可同日語也。夫工產之地。必其地理社會風俗。以及日用起居。皆有特別之結構。而后可成爲完全無缺之工市。温州濱大海而居儼然一國。雖以非常變亂。兵戈猝起。全浙流離。而温州可以獨立。布帛菽粟。充牣于內。雖以凶荒旱潦。全浙騷動。温州又可以獨立。而其人心風俗。又富于排外之性質。實業之思想。不爲種種社會所移。而矯然有以自成一習慣。於乎。此固



太西文明國工人之資格也。然其居人乏于交通之知識。不能與海內名都競爭。利市而商權反握于甯人之手。若牛革若粟米若柑柚航海達北直者。其利權皆操自他人。而其民之不能生息于其鄉者。爲佃傭于浙西。歲常十餘萬。甌人不自治。吾恐十餘年後。甌人無富家矣。

抑吾又聞之。尙武性亦以甌人最甚。白晝挾刀杖。悍然尋仇。官吏不能禁。雖士人女子。必有悍然之氣概。不似浙西之文弱。洪楊之亂。童子登陣而觀。拍手歡呼。以瓦擊敵。寇兵爲之駭退。庚子之變。村民奮白梃以排外。離瑞安數里。與鄉兵相鬪。而城人之往觀者。負手而立。相去僅數武。以視浙西之一聞兵警。戰栗欲死者。又相去幾何矣。於乎。工社會而無強立不畏死之雄風。則奴隸耳。牛馬耳。歐洲各國其工人多聯盟罷業。挾持其政府者。要必具此野蠻力。甌人既有此特質矣。而其地自明季以來。多不爲外人所注視。故種族之大防。亦不若浙西之甚。我嘗中夜獨坐。鬼哭磷飛。攬大地圖。圍視而點數之。甌人其猶粵東與。嗚呼。三年蓄艾。須之有時。我于甌人有厚望焉。此其一。

(未完)

## 浙江文明之概觀

公 猛

以予觀於我浙江。文明則未也。而先流於文弱。文明文明。而何足云。而何足云。即文明矣。雅典文明矣。印度文明矣。迄於今。不能於地圖上占一顏色。文明文明。而何足云。而何足云。雖然。其歷史又烏可誣也。我今敬遺我浙人一言曰。第一與天然爭。第二與時代爭。與天然爭者。何也。今試思我浙人。染一文弱之惡名者。果何由乎。錢江以西。山川秀麗。河流便利。天然之力。強乃能造成一娟娟秀士。而又以交通便利。走中國最廣。故一若文弱人。乃爲浙人代表也。若夫越江以東。則山林漸衆。而其人民之武力。蓋甚強矣。然雖強。可恃乎。尙武性。不出三十里。其可謂之尙武乎。蓋是皆其人爲力薄弱。而不能與天然爭勝。故雖然。吾以求之歷史。則有之矣。若有明是也。以王始。以黃終。彼皆能以人爲力。利用其天然。故理想凌天氣魄。蓋地而鼎革之際。奔走海外者。猶踵相接。嗚呼。吾猶夢寐見之。嗚呼。浙人毋忘吾歷史。所謂與時代爭者。何也。吾熟鑒中原文明之趨向。自北而南。浙江者至有明而極盛。今則漸入於南矣。蓋自黎洲以後。銷沈者三百餘年。流風遺烈。渺焉

無聞。嗚呼痛哉。凡是皆不能與時代爭勝者也。吾以求之歷史。則有之矣。若項王是也。當二千年前而獨能率其子弟。爲歷史上的人物。懷哉懷哉。與時代爭勝者。其人固如是哉。嗚呼。吾猶夢寐見之。嗚呼。浙人毋忘吾歷史。而不然者。雅典文明矣。印度文明矣。文明不成而流文弱。此又歷史之羞而予心所傷也。

披我國之地圖而觀之。見夫背山面海。左江淮而右閩粵。中貫以錢江。甌江兩河流者。非我浙江乎。其間人民三千數百萬。地方七千數百里。物產數十萬種。高原平原。大河細流。無所不有。動物植物。礦物無所不備。江山誠耐人留戀哉。吾且觀其民之活動。力登高而望之。見夫松杉栢。鬱鬱蒼蒼。蔓山盈野。向日而爭光者。非我浙人之林業乎。稻梁粟菽。瓜瓠果實。山竊水曲。平鋪如織。非我浙人之農業乎。梵宮古剎。高聳雲天。使建築術不工。何以至此。極目水天盡處。泛一葉之舟。握如箸之機。以與波濤爭。一旦之命。非我浙人業漁者乎。之江之濱。鑑水之曲。帆檣林立。其造船術之發達何如。乃讀鄉先哲學士大夫之遺書。其理想之高。超出乎天天而入於人人。發爲文章。雲蒸霞蔚。光怪陸離。我浙江人於政治界。哲理界。文藝界。其位置固居何等。

乎。蓋自中原文物輸入我浙以來。風發雲厲。電掣雷鳴。遂以成此日之形勢。而此日者。則又存亡之鍵。興廢之機也。其亡也。則土地爲人占焉。妻女爲人奴焉。一切歷史化爲物語。一切盛業化爲古蹟。其興也。則且將挾其一切哲理。一切藝術。乘此滾滾汨汨飛沙走石。二十世紀之潮流。以與世界之文明相激相射。相交換相融和。放一重五光十色之異彩。以灌溉我二十一行省之同胞。浙江者文明之中心點也。吾浙人其果能擔任此言乎。抑將力不勝任。徒爲歷史羞乎。夫歌舞昔人者。所以示後人也。而不然者。則當此滄海橫流。視天沉醉。方將沉痛迫切之不暇。而又何用予之鼓吹休明者爲哉。

雖然文明之發生也。必在大江大河之上游。我浙江位揚子江之下游。而又僻處其右偏處西南。又多山以爲之障礙。故但能發揮之光大之及究其文明所自來。不得不歸黃河揚子江上游之各地。憶自我漢族由帕米爾高原發生以來。過伊犁。越新疆。以至於黃河流域。受四圍之影響。一種文明思想。遂滑滑乎吾腦中。久之。又久而中國之文明生焉。浸假渡河而南矣。浸假渡江而南矣。迤邐迤邐。沿襄湖。超蘇皖。以

直達於我浙江。既受中原之影響，而又以靈秀之山川，豐穰之土地，鼓鑄而製造之，而浙江之文明遂生焉。

即其方面，以細爲研究，其所歷之程次，與所經之階級，蓋可分爲四時代。自大禹至至春秋爲萌芽時代，自越勾踐至西晉爲生長時代，自晉南渡至北宋爲漸進時代，自南宋至明末爲發達時代。

萌芽時代，峒嶠之碑，巍巍乎屹立會稽之山巔，嗟乎！此何物也？此亦一金字塔焉。此我浙江文明之鼻祖所留遺之紀念焉。唐虞以前，書缺有間矣，其詳不可得而知。以意揣之，我浙江爲蠻族所盤踞，無可疑也。及洪水之興，浙江地處窪下，必沈沒於潭潭萬頃之洪濤中，間有一二出水高者，而蠻族之焰方張，自大禹荒度以後，浙江之半部分，遂出現焉。然三江者，大陸之極端，三江定而大功告成，於是我漢族四千年前全知全能之一偉人，施神明不測之手段，以開化此狃狃榛榛之蠻方。史傳『禹到越，上苗山，大會計，因更名苗山曰會稽』，又言『禹會諸侯於塗山』（塗山亦會稽山）執玉帛者萬國。夫不能計其數，而總記之曰萬，意其時北至幽冀，南至交趾。

東至青兗，西極流沙，無遠不屆。無國不來，如風鳴，如水湧，如魚之縱壑，如蜂之朝王，跼足屏息，奔騰輻湊。各挾其國之政治學術技藝，爭先恐後，奔赴於一點，懿歟！休哉！上古之文明，蓋無不流入於我浙江，以築百代之基礎。冠裳萬國，玉帛九重，迄今摩挲古碣，瞻仰崇碑，猶依稀彷彿於吾人眼簾中也。雖然，文明之種子雖廣布乎，而蠻風猶未息焉。當少康封庶子於會稽，『尚文身斷髮被草萊而邑焉』，則禹雖萬能，總不能使蠢蠢之蠻族，一躍而入於文明之域，蓋爲天然力所限也。欲文明之發榮滋長乎，不得不待二十餘世後之勾踐。

生長時代，勾踐之困於吳焉，身爲僕隸，妻爲賤養，嘗穢牧馬，極人生不堪之苦。既而歸越，引爲大恥，奇辱，思得一當，以洩其宿憾。勾踐以憤發之心，寔行改革，而吾浙之文明，遂如六月之苗，得甘霖而暴張，將放之花，被濃露而怒開。他日之食其賜而聞其馥者，勾踐勾踐，謂非汝所賜而誰賜之乎？吾欲崇拜浙江，吾先欲崇拜浙江之英雄，吾欲崇拜浙江之英雄，吾先欲崇拜浙江，試即當日所表見者，約略言之。政治：置內外相以位文種范蠡，有掌財政者，大夫臯如職之，有掌軍旅者，大夫

緒稽郢職之有掌獄訟者。大夫若成職之有爲行人者。大夫曳庸職之有爲諫官者。大夫皓進職之有司天文者。大夫計硯職之設官分職。綱舉目張。上下一心。勵精圖治。內和萬民。外結與國。擴張軍備。以撼強敵。嗟乎。他日滅吳淩楚。橫行淮上。號稱霸王。天子致賀。豈幸也哉。其政治之發達有如此者。

軍事。當國人之不願從軍也。施以愛。洵其名。有來者。王食之。夫人衣之。以鼓舞其愛國之心。及國人皆願從戎矣。於是量其居。好其衣。飽其食。以簡銳之。而軍士之體魄強。聘處女於南林。迎陣音於西楚。教之擊劍。教之挽弓。而軍士之智識盛。然或足智多謀。強力善戰。而無百斷不回之敵愾心。以統一之。仍無當也。於是軾龜以激之。使懷心樂死。而軍士之德全。不數年。遂有習流二千。俊士四萬。君子六千。諸御千。以之伐吳。一戰而破。再戰而滅矣。其軍事之發達有如此者。

農業。物別三類。桑稻粟爲上物。黍麥爲中物。赤豆大豆瓜菓蔬食爲下物。類戶以種之。教以四生之道。惕以四死之故。春生夏長。秋成冬藏。三年五倍。越國熾富。其農業之發達有如此者。

工業。范蠡仰觀天文。發紫宮。作小城。周百二十步。西北立飛翼之樓。東南築伏漏之竇。陵門四達。以象八風。起離宮於淮陽。立上苑於樂野。築燕台於石室。建駕台於成邱。其建築術果何如哉。吳越之戰。越以大翼小翼中翼爲船軍戰。又曰。戈船百艘。意其時必習於造船術無疑。夫劍天下之利器也。而其制傳自越。世傳越王聘歐冶子作劍。一曰純鉤。二曰湛盧。三曰豪曹。四曰魚腸。五曰巨闕。歐冶子之造兵術。後世猶難之。吳王好服之離休。勾踐乃使國人采葛。織細布以獻之。吳王大悅。其織布術之工。又可知矣。類舉以觀。其工業之發達有如此者。

文學。讀烏鵲之歌。則黯然而悲。誦采葛之詩。則悠然而有所思。歌送軍士之章。則又赤面耳熱。使我神旺。嗟乎。『三軍飛降兮。所向皆殂。一士判死兮。而當百夫。道祐有德兮。吳卒自屠。雪我王恥兮。威振八都。』此非我浙江二千年前之文字乎。其文學之發達有如此者。

美術。巧工施校。制以規繩。雕冶圓轉。刻削磨礪。分以丹青。錯畫文章。嬰以白璧。鑄以黃金。狀類龍蛇。文彩生光。此非越獻吳之木乎。其彫刻圖畫。迄今想像及之。



猶覺玲瓏精緻。光彩爛然。其美術之發達有如此者。

綜而觀之。其時百度修明。萬物維敘。農服其疇。士修其業。百工居肆。以給人用。養心悅目。娛魂蕩魄之具。無不畢具。及外寇之來焉。又能萬衆一心。不惜犧牲。一身以衛全體。流血滂滂。食進不止。其腦力其體力直欲於東海之濱。開一新世界。長驅直入。以與中原爭優劣。豈不壯哉。自此以後。歷秦漢而至魏晉。天下合一。於政治上。軍事上。無所表見。其他則代有進步。騷擾乎與中原並駕而齊驅矣。雖然。於經學於哲理。中原巍巍數大儒。後先鼎足。方興未艾。而浙江僻處海濱。尚不被其風潮。無足觀者。欲使他日著中國文明史者。不至置我浙江於蕭末乎。時乎時乎。尙有待焉。(未完)



## 文苑



### 新奉化歌

再世 馮生

新奉化。新奉化。吾爲此名君莫訝。大地民族主義正發皇。生斯土者敢獨謝。溯昔錫我縣名。未爲臧。仿佛蠻夷之國下眞王。至今傳之千餘年。奴隸根性將母亡。吾竊懷此恥。吾獨走徬徨。仰思古賢哲。俯念今梓桑。有宋諸老興詩禮。有明一代盛冠裳。其時頗進文明界。二百年來故步僵。獨有戀直倔疆老骨性。時時仗義好爭競。方今世界盛行競立爭存優勝劣敗天演義。吾乃爲吾同胞兮舉手以鳴敬。吾更爲同胞兮加額以相慶。慶吾奉化兮人文興。龍津鳳麓起峻嶒。東西文字頒並習。理實科學要同徵。況有遠游扶桑者。蟲蟲烈烈勢奔騰。慶吾奉化兮地理美。半山半陸又半水。膏腴之地足稻粱。汗下之鄉充鱸鮓。銀礦煤礦更希奇。富甲五洲立可俟。並此二難良不惡。吾拜新民吾其作。一小分子自錚錚。四大自由何落落。保國保種先保羣。箇人

義務社會義務都要著。吁嗟乎大廈兮將傾。燕雀兮哀鳴。吾願吾同胞兮動魄而驚心。吾願吾同胞兮。衆志以成城。吾願吾同胞兮。爲獨立自尊之國民。吾願吾同胞兮。救罹一切苦厄之衆生。新奉化兮新奉化。播此名兮歐和亞。播此名兮歐和亞。吾將約吾同胞兮。泛九曲之谿入四明之山。少自暇。

支那寄生近作。陸錄。秋興。淮南木落楚波平。十二樓臺臘月明。北渚衣冠愁帝子。西風環佩弔湘君。懷沙空抱靈均志。衡石誰憐精衛心。歸夢怕隨鴻雁去。江關哀怨不堪聞。鐘鳴落葉故鄉心。大好江山送夕曛。白髮伶官秋試笛。綠髮小婢夜調箏。女蘿窮窕思君子。杜若芳馨贈美人。省識九歌哀怨意。靈脩不見涕縱橫。

閒庭落葉送哀蟬。羅袂無聲倚曲欄。客子行行悲逝水。夢魂黯黯戀家山。芙蓉遲暮開江上。楊柳婆娑滿漢南。聞說九關多虎豹。帝鄉回首一洄瀾。御溝流葉出宮牆。老樹秋聲繞建章。九辨歌殘思恍惚。四愁詠罷淚蒼涼。碧雞霸氣沉汧水。銅雀荒臺憶洛陽。散盡黃金餘白髮。周南留滯獨神傷。題百年一覺。羣龍無首太平世。萬物有情烏託邦。好夢百年渾一覺。紅塵彈指已滄桑。不勝地老天荒感。無限海枯

石爛情。理想忽開新世界。殘山剩水總精神。自述。鉛華落盡見真相。始信波瀾起寸心。槁木死灰猶有性。清歌紅淚總無情。憑將俠劍酬孤志。莫把儒冠誤此生。欲覩靈脩傷數化。高邱返顧涕縱橫。少年讀易識憂患。壯歲著書多苦辛。諸行無常觀世事。一塵不染見精神。完全魂魄兼修體。往返天人自在身。惟有愛悲深印腦。難將慧劍鏟其根。自題小影。色相成塵吾喪我。猶留幻影在人間。現身無量娑婆土。不爲鉛華乞駐顏。乘大貞丸赴滬誌感。赤手空拳思獨立。望門投止歎無家。大貞丸上船頭月。一夜催人鬢欲華。華嚴國土如斯大。各有前途努力行。未淨根塵生百感。魚龍夜氣落滄溟。悲愛吟。無限纏綿情。一把辛酸淚。茫茫世界中。惟有悲與愛。黃浦江邊獨步。靈魂不死吾猶在。軀殼輪迴何足論。我乘願船尋住著。江天寂寞正黃昏。南潯道中。自由血與強權戰。敢爲飄流改素心。滿地江湖不歸去。夢魂和月到南潯。去去行。去去復去去。遠山長河湄。去去欲何之。誓脫奴隸羈。男兒失自由。何用家室爲。不能長相保。敢辭長別離。燕雁自南北。溝水各東西。忍淚一揮手。浮雲天之涯。海枯石見底。自由終可期。去去何所言。但言長相思。

京口夜泊 驚波迸作不平響。孤客船頭苦憶家。喚起愁心無那甚。夜來江上聽  
 悲笳。夢煙愁霧黯平楚。酒醒今宵鐵甕城。半夜月明人不寐。時聽船尾打潮聲。  
 江風吹水鼓聲響。冷月照人毛骨寒。湖海豪情今夕減。卻思歸去臥家山。嗟余腦  
 印偏多感。未免有情便起愁。一樣春江花月夜。看來蕭瑟似深秋。曉發塘沽 不  
 似江南曉色清。五更鼓角塞雲橫。村雞帶月啼茅店。此是人間勞苦聲。亂後重過  
 天津 羣龍戰野立黃血。太息繁華成古邱。重上天津橋上立。殘陽廢壘不勝愁。  
 杜宇聲聲啼血痕。白河春色半成塵。重來愁煞桓司馬。無復當時楊柳青。  
 地名以楊柳  
 多 野望 燕北雁南常作客。天高地迥獨登臺。山從絕塞衰延起。水繞長城鳴咽  
 來。碧血已隨秋草盡。野花猶傍戰城開。小黃河上悲風颭。極望中原無限哀。

銷膏



調查會稿

秀水城鄉各鎮烟每日銷膏捐數表

地名	銷膏兩數	捐項錢數
府城內外	六〇七、八七五	二四三、一五
王江涇	七九、	三一六〇、
南漚	四四、二	一七六八、
濮院	二五、五	一〇二〇、
油車港	三五、五	一四二〇、
西市	一四、五	五八〇、
馬庫漚	一二、五	五〇〇、
池灣	一一、五	四六〇、

浙江潮 調查會稿

新陸	一三九、五	九五八〇、
陶家涇	七、五	三〇〇、
上陸港	八、七	無
莫家涇	七、	無
盛家廊下	八、一	無
尖斗角	十一、五	無
總數	一二二、一七五	四三二〇三、

## 海鹽地理之關係附沿革

海鹽縣始於秦。屬會稽。在華亭鄉。今松江府後陷爲湖。移治武原鄉。今平湖東關西漢仍之。東漢時屬吳郡。復陷爲湖。移治故邑山。三國時孫權析縣南境爲鹽官縣。晉及宋齊梁亦屬吳郡。惟梁析東北境置前京胥浦二縣。又以海鹽胥浦二縣立武原郡。陳以海鹽縣屬海甯。隋省入鹽官。唐屬蘇州。析縣北境與華亭。後唐屬改

杭州晉又改屬秀州。今嘉興宋元明同。惟明析縣東北境爲平湖縣。至今仍之。

有山脈。有低地。有海洋。有河流。北接乍浦。南包澉浦。洋海環乎東。島嶼突立而爲之屏。而海鹽之地理於以成。而海鹽之海口於以險。然而論我浙險要海口者。動曰舟山羣島哉。乍浦哉。而獨不及海鹽。雖然。舟山也。乍浦也。誠險矣。不知舟山爲吾浙之前門。乍浦爲我浙之後門。而海鹽者。實併乍浦而成我浙之後門者也。故海鹽之地。理因以險。險曷在。曰在澉浦。蓋乍浦與海鹽之澉浦相并列。唇齒相依。憂患與共。斜對舟山羣島。而東北接江蘇之金山吳淞一帶。皆有密接之關係也。我浙人其欲探浙江之地理爲異日自治之一助耶。敢將海鹽之內陸之外海之駐軍險要地以告。夫欲知海鹽內陸之形勢。不得不得知海鹽之山脈。海鹽以山脈支出之故。而地勢之高下。河流之利益。道路之通塞。亦隨之而異。海鹽之山脈。起自天目。由賀霞及破石之東西山。而達於南部澉浦一帶。以高陽雲岫爲最高。瀕於海者。有秦駐長牆等山。故論其地勢。則南部富山嶺。北部富河流。南部地勢高。北部地勢低。論其河流則北部運河之利。不能及於南部。南部。永安湖之利。俗名南北湖中橫一堤。各有河開用。不能以畜水故與北部諸河之利不能通。



及於北部。論其道路則北部水陸各路隨在可通。而獨於南北部交通上。水路祇能及長川壩。角里堰。不能直達澈浦。惟陸路可以達之。南北地勢之懸殊如是。而南北年歲之豐歉亦相反矣。

雖然海鹽之地理豈足以內陸之形勢盡哉。蓋猶有外海在海鹽之海流。風浪甚勁。沿海一帶。多築石塘以衛之。若巫子。若舜山。若簑山。若白塔等山。皆排列海中。而尤以白塔秦駐二山間九王臺海峽之交流。直衝而撲於海鹽城東者爲最勁。每遇夏秋之交。大風作時。沿海石塘常爲所摧兼之沿海多有鐵板沙。而深淺因以不一。惟黃道關左近有龍潭口。水深可泊。城東勅海廟之處水勢雖深。而潮流勁悍。石塘險凸。船不能近。餘則潮落沙出。一二里不等。此海鹽海口所以不能爲泊船良港者。蓋由海島峻險。沙土橫亘所致也。

內陸之地勢既如此。外海之潮流又如彼。而駐軍之險要地。自不得不斟酌內外之形勢。以爲根據。海鹽向設千總員於澈浦。築城駐守。康熙時更定營制。自東拱寨以西至廟山寨。屬澈浦汛。青山寨以東至落水寨。屬海鹽守備。九里墩以東屬乍浦守

各派兵分防。道光時又添設外海水師。所管黃沙塢。葫蘆山。頭團青山。秦駐山。五口汛。外海自舜山西北。黃山西屬澈浦水師。舜黃山之東南屬鎮海水師。東北屬乍浦水師。同治時裁撤廟山。渾水。平陽。東拱。姚官。大步。二寨。落水。八汛。及青山秦駐撤歸水師汛口外。又建黃道關西山角炮台一座。修談仙嶺寨一座。此海鹽歷來駐軍之險要地也。然數十年無事。軍士腐敗已極。不堪復用。各險要地徒擁虛名。而無實駐之防軍。一朝有事。誠可危也。



浙江潮第一版四期

癸卯正月二十日出版  
同三月三十日再版  
同七月十五日三版  
甲辰十月十五日四版

編輯兼發行者

浙江同鄉會

日本東京神田區駿河臺鈴木町

十八番地留學生會館

發行所

浙江同鄉會雜誌部

日本東京淺草區黑船町廿八番地

印刷人

榎本邦信

日本東京淺草區黑船町廿八番地

印刷所

東京並木活版所

每月一回定期陰歷十二月發行